


T 3204/5232.82

9

CHINESE - JAPANESE LIBRARY OF  
HARVARD - YENCHING INSTITUTE  
AT HARVARD UNIVERSITY  
DEC 12 1939



揚州府志卷之二十八

哈佛大學漢和  
圖書館珍藏印

人物一

海江涵孕誕毓才賢博稽載籍累百盈千拔尤選  
勝爰著於篇昭示來許牛斗同懸作人物志

漢召平廣陵人秦二世二年平爲陳勝徇廣陵未下聞  
勝敗走秦將章邯且至迺渡江矯陳王令拜項梁爲楚  
上柱國曰江東已定急引兵西擊秦梁乃以八千人渡  
江而西遂以滅秦

漢書

劉瑜字季節廣陵人少好經學尤善圖讖天文曆算之  
術州郡禮請不就延熹八年太尉楊秉舉賢良方正至

京師瑜上書陳事言中官比肩裂土立嗣傳爵乖開國承家之義女嬖充積勞散精神生長六疾常侍黃門亦廣妻娶怨毒之氣結成妖青第舍增多窮極奇巧州郡官府各自考事姦情賂賂皆爲吏餌民愁入賊輒興誅討又陛下以北辰之尊幸宦官之舍因此暴縱無所不容惟設置七臣以廣諫道遠佞邪之人放鄭衛之聲則政致和平德感祥風矣於是特詔召瑜問災咎之徵指事按經識以對執政者欲令瑜依違其辭更策以他事瑜復悉心以對八千餘言有切於前帝竟不能用拜爲議郎及大將軍竇武欲大誅宦官乃引瑜爲侍中事久

不發瑜與武及陳蕃書宜速斷大計得書將發武又不從蕃計武蕃及瑜皆被害宦官悉焚瑜所上書以爲訛言子琬傳瑜學舉有道不就

後漢書

劉熊字孟陽廣陵人光武帝之曾孫廣陵王之孫俞鄉侯平之季子子守約履勤儉敦五經仕爲酸棗令旣練州部卷舒委蛇賞善礪頑勤恤民隱貪宄革情清修勸慕德惠潛流鬯芳旁布吏民愛之若慈母畏之如神明相

與採摭謠言刊之碑石

金石古文

徐璆字孟玉廣陵人少博學辟公府舉高第稍遷荊州刺史時董太后姊子張忠爲南陽守因勢放濫贓罪數

億璆當之郡太后遣中常侍以忠屬璆璆對曰臣身為國不敢聞命太后怒遽徵忠為司隸校尉以相威臨璆至州舉奏忠賊至億使冠軍縣主簿詣大司農暴其罪又奏五郡守及屬縣有賊污者悉徵案罪威風大行中平元年與中郎將朱儁擊黃巾賊於宛破之張忠怨璆與諸閹宦構詞中之璆遂以罪徵以破賊功得免官歸家後再徵遷汝南太守轉東海相所在化行獻帝遷許以廷尉徵道為袁術所劫授璆以上公璆嘆曰龔勝鮑宣獨何人哉守之必死術不敢逼術死軍破璆得其盜國璽及還許上之并還前所假汝南東海二郡印綬司

徒趙溢謂璆曰君遭大難猶存此耶璆曰昔蘓武困於匈奴不墜七尺之節况此方寸印乎後拜太常寺卒於

官 後漢書

臧旻廣陵射陽人有幹事才熹平元年會稽妖賊許昭起兵句章攻破城邑眾以萬數拜旻揚州刺史進兵連戰三年破平之遷旻為使匈奴中郎將 後漢書

謝承書云旻達於從政初為徐州從事累遷揚州刺史討賊有功遷匈奴中郎將還京師太尉袁逢問其西域諸國土地風俗人物種數旻具言道里近遠人數多少風俗燥濕山川草木鳥獸異物名種不與中

揚州府志 卷之二十八  
國同者口陳其狀手畫地形逢奇其才嘆曰雖班固  
作西域傳何以加此轉拜長水校尉終太原太守

袁綏廣陵人爲漢太傅掾廣陵太守張超討董卓以綏  
領廣陵事子廸與陳國陳融陳留濮陽逸沛郡蔣纂皆  
就吳丞相陸遜弟瑁遊處瑁謂其單貧有志割少分甘  
與同豐約廸孫暕字思光作獻帝春秋 魏志

三國陳矯字季弼廣陵人太守陳登辟爲功曹時廣陵  
爲孫權所圍登令矯求救於曹操矯說操曰鄙郡雖小  
形便之國也若蒙救援使爲外藩則吳人剽謀矣操奇  
矯欲留之矯辭曰本國倒懸奔走告急縱無申胥之效

敢忘弘演之義乎操乃遣兵赴救吳軍旣退操辟矯爲  
司空掾除魏郡西部都尉曲周民父病以牛禱縣論棄  
市矯曰此孝子也表赦之遷魏郡太守時繫囚千數至  
有歷年矯悉覽罪狀一時盡決丕立封高陵亭侯遷尚  
書令丕子叡立進爵東鄉侯一日叡猝至尚書門矯跪  
問曰陛下欲何之曰欲案行文書耳矯曰此自臣職非  
陛下所宜臨若臣不稱其職請就黜叡慚而反其亮直  
如此加侍中光祿大夫遷司徒卒諡貞侯 魏志

徐宣字實堅廣陵人曹操辟爲司空掾屬會馬超亂操  
將西征見官屬曰今當遠征宜得清公大德以鎮統之

乃以宣爲左護軍留統諸軍還爲丞相東曹掾出爲魏郡太守丕立爲御史中丞賜爵關內侯轉散騎常侍從至廣陵六軍乘舟風浪暴起丕船回倒宣方病獨凌波而前丕壯之遷尚書叡立封津陽亭侯加侍中光祿大夫嘗上疏陳威刑大過又諫作宮殿窮盡民力皆手詔嘉納及卒遺令布衣疏巾斂以時服追贈車騎將軍諡貞侯

魏志

陳本矯之子嗣父爵歷郡守九卿操綱領舉大體能使羣下自盡有統御之才不親小事不讀法律得廷尉之稱優於司馬岐等遷鎮北將軍假節都督河北諸軍事

魏志

張紘字子綱廣陵人舉茂才公府辟皆不就避難江東孫策創業遂委質焉表爲正議校尉從討丹陽策身臨行陣紘諫曰主將乃籌謀所自出不宜輕脫自敵小寇建安四年策遣紘奉章至許留爲侍御史孔融等皆與親善曹操以紘爲九江太守紘以疾固辭操聞策卒欲因喪伐吳紘諫以爲乘人之喪旣非古義若其不克成讎棄好不如因而厚之卽表策弟權爲討虜將軍領會稽太守操欲令紘輔權內附出紘爲會稽東部都尉後權以紘爲長史從征合肥權率輕騎將往突敵紘諫曰

揚州府志 卷之二十一 五  
此偏將之任非主將之宜權從其言而止既還將復出  
軍紘又諫止紘建計宜出都秣陵從之令還吳迎家道  
病卒 吳志

吳書曰權每有異事密計及章表書記常令紘與張  
昭撰作初琅琊趙昱爲廣陵太守察紘孝廉昱後爲  
笮融所害紘在東部遣主簿至琅琊設祭并求親戚  
爲之後權聞而嘉之子元清介有高行官至南郡太  
守尚書元子尚有俊才孫皓時爲侍中中書令

閔鴻廣陵人仕爲吳尚書與丹陽薛兼紀瞻吳郡顧榮  
會稽賀循齊名號爲五俊 吳志

范慎字孝敬廣陵人爲吳侍中出補武昌左部督治軍  
整頓孫皓移都甚憚之詔曰慎勲德俱茂朕所敬憑宜  
登土公以副衆望以爲太尉慎自恨久爲將遂託老耄  
軍士戀之舉營隕涕慎初爲太子登賓客目之曰究學  
甄微游夏同科又云竭忠知己之君纏綿三益之友時  
人榮之著論二十篇名曰矯非 吳志

呂岱字定公海陵人初爲郡縣吏孫權召署錄事出補  
餘姚長募精健千人平定會稽賊督十將取長沙三郡  
留鎮長沙又與魯肅禽斬叛將遷廬陵太守代步騭爲  
交州刺史降高涼賊帥又討鬱林夷賊破之桂陽滇陽



賊起詔岱討之斬首獲生萬餘人封都鄉侯交阯太守  
士燮卒其子徽不受朝命岱請急進兵徽肉袒降斬之  
進封番禺侯岱既平交州復進九真斬獲以萬數進拜  
鎮南將軍還鎮長沙會武陵蠻叛岱與潘濬共討定之  
廬陵會稽賊並起岱督劉纂唐資等分部討擊皆見斬  
獲廖式作亂諸郡搔擾岱自表輒行悉討斬之時年已  
八十拜上大將軍晉大司馬岱清身奉公初在交州歷  
年不餉家妻子饑乏權聞歎息以讓羣臣加賜錢絹始  
岱親近吳郡徐原慷慨有才志岱知其可成賜巾襦與  
共言論後遂薦拔官至侍御史原性忠壯好直言岱時

有得失原輒諍又公論之或以告岱岱嘆曰是我所以  
貴德淵者也原死岱哭之甚哀曰德淵岱之益友今不  
幸岱復於何聞過談者美之卒年九十六遺令殯以素  
棺疏布葬送制從儉約子凱皆奉行之

吳志

晉陳騫字休淵魏司徒矯子騫起家尚書郎累遷太尉  
轉大司馬所在有蹟士庶所懷既位極人臣年踰致仕  
入朝乞骸骨詔遣侍中敦諭固請許之位同保傅在三  
司之上賜以几杖不朝安車駟馬以高平公還第薨年  
八十一贈太傅諡曰武騫少有度量嘗爲夏侯元所侮  
意色自若元以此異之

晉書

劉頌字子雅廣陵人漢廣陵厲王胥之後也少能辨物  
理司馬氏辟爲相府掾奉使於蜀時蜀新平人饑土荒  
頌表求振貸不待報而行由是除名武帝踐祚拜尚書  
郎典科律申冤訟累遷中書侍郎咸寧中詔頌巡撫荆  
襄奉使稱旨轉黃門郎遷議郎守廷尉時尚書令史扈  
寅非罪下獄詔使考竟頌執據無罪寅遂得免時人以  
比張釋之在職六年號爲詳平轉河內太守郡界多公  
主水碓遏塞流水轉爲浸害頌表罷之百姓獲其便利  
後除淮南相嚴整有政績舊修芍陂年用數萬人豪強  
兼并孤貧失業頌使大小計功受分百姓歌其平惠在

郡上疏言封建用人諸政優詔答之元康初從淮南王  
入朝詔爲三公尚書又上疏論律令爲時論所美以光  
祿大夫卒諡曰貞

晉書

華譚字令思廣陵人祖融父譔皆仕吳譚期歲孤母年  
十八守節鞠養及長好學不倦揚州刺史周浚引爲從  
事史愛其才器待以賓友之禮太康中刺史嵇紹舉譚  
秀才至洛陽武帝親策之時九州孝秀策無逮譚者同  
郡劉頌時爲廷尉見之嘆息曰不悟鄉里乃有此才等  
除郎中遷太子舍人本國中正後爲鄆城令過濮水作  
莊子贊永寧初爲郟令於時亂後境內饑饉譚撫卹有

政績再遷廬江內史加綬遠將軍時石冰之黨屯據諸縣譚遣司馬討平之以功封都亭侯建興初帝命爲鎮東軍諮祭酒譚博學多通著書三十卷名曰辨道上牋進之帝親覽焉轉丞相軍諮祭酒領郡大中正久之加散騎常侍屢以疾辭卒於家贈光祿大夫子化爲征虜司馬討汲桑戰歿

晉書

戴淵字若思廣陵人舉孝廉出補豫章太守加振威將軍以討賊有功賜爵秣陵侯出爲征西將軍都督兗豫幽冀雍并六州諸軍事假節加散騎常侍鎮壽陽帝親幸其營勞勉將士臨發祖餞置酒賦詩至合肥而王敦

舉兵詔淵還鎮京都進驃騎將軍尋石頭失守淵與諸軍攻石頭王師敗績淵率麾下百餘人赴宮受詔與公卿百官於石頭見敦敦問淵曰前日之戰有餘力乎淵曰豈敢有餘但力不足耳又曰吾此舉天下以爲何如淵曰見形者謂之逆體誠者謂之忠敦笑曰卿可謂能言參軍呂猗深憾淵說敦曰周顛戴淵有高名足以惑衆近者之言曾無愧色公不除恐爲將來憂敦以爲然俄收淵害之淵素有重望四海之士莫不痛惜焉賊平冊贈右光祿大夫諡曰簡

晉書

戴邈字望之淵弟少好學尤精漢史才不逮淵儒博過

之弱冠舉秀才尋遷太子洗馬出補西陽內史永嘉中  
元帝版行邵陵內史丞相軍諮祭酒於時凡百草創學  
校未立邈上疏言帝王至務莫重於禮學宜以三時之  
隙漸卽修建累數百言疏奏納焉於是始修禮學代劉  
隗爲丹陽尹王敦作逆加左將軍及敦得志淵遇害邈  
坐免官敦誅後拜尚書僕射卒贈衛將軍諡曰穆

晉書

潘京廣陵人素有理鑒名知人戴淵父會稽太守昌雅  
重之淵初舉孝廉仕不遂往武陵省父父遣淵往就京  
與語旣而京稱淵有公輔之才聲名遂著

晉書

高嵩字茂琰廣陵人悝之子少好學善史書司空何克

爲揚州引爲主簿舉州秀才除太學博士初父悝封建  
昌伯以納妾致訟被黜及悝卒嵩自繫廷尉訟寃停喪  
五年不葬表數十上帝哀之下詔聽傳侯爵由是見稱  
累遷黃門侍郎簡文帝輔政引爲撫軍司馬時桓温擅  
威率衆北伐軍次武昌簡文患之嵩爲作書喻以禍福  
温得書還鎮嵩遷侍中哀帝雅好服食嵩諫以爲非萬  
乘所宜後以公事免卒於家

晉書

宋梁曠廣陵人爲山陽內史廣陵王誕反執其妻子遣  
使要曠曠斬使拒之誕怒滅其家及誕平朝廷嘉曠誠

節擢爲後將軍

宋書

南齊荀伯玉字弄璋廣陵人齊高帝鎮淮陰以伯玉爲參軍高帝爲宋明帝所疑徵爲黃門侍郎深懷憂慮而無計得留伯玉教其遣數十騎入魏界安置標榜魏果遣游騎數百履行界上高帝以聞得復本任由是見親待高帝還朝令伯玉知家事建元元年封南豐縣子世祖在東宮專斷用事任左右張景真其伎人皆著御衣乘畫舫坐胡牀觀者咸疑是太子內外祇畏莫敢言伯玉密啟上收景真殺之愈見親信軍國密事多委使之時人爲之語曰十敕五令不如荀伯玉命

南齊書

梁杜天合廣陵臨澤人大同中天合及弟僧明與周文

育并從廣州督護盧安興頻征徠獠有功安興死復副其子子雄時交州土豪李賁反刺史蕭諮奔廣州臺遣子雄與高州刺史孫罔討賁時瘴癘方起子雄請待秋討之廣州刺史蕭暎不聽蕭諮又促之子雄等不得已行至合浦死者十六七餘衆潰散蕭諮啟子雄及罔與賊交通梁祖敕於廣州賜死天合謀於衆曰盧公累代遇我等厚今見枉而死不爲復仇非丈夫也我弟僧明萬人之敵若圍州城召百姓誰敢不從城破斬二侯祭孫盧待臺使至束手詣廷尉死猶勝生縱不捷亦無恨衆從之乃與周文育等率衆結盟奉子雄弟子畧爲主

攻刺史蕭映吏人並應之一日衆至數萬陳祖時在高  
要聞事起率衆來討大破之天合遂被殺

陳書 按天合事以後漢

書例之宜入獨行傳中志不設獨行類故附於此

唐上官儀字游韶本陝人父弘爲隋江都宮副監因家焉大業末弘爲將軍陳稜所殺儀幼藏匿獲免貞觀初舉進士太宗聞其貫墳典工文詞召授弘文館直學士遷秘書郎時太宗好屬文每遣儀視草預撰晉書轉起居郎高宗嗣位遷秘書少監龍朔二年加銀青光祿大夫西臺侍郎麟德元年上以武后專威福密召儀議之儀奏后專恣海內失望宜廢之以順人心命草詔左右

奔告后后詣上自訴上曰此上官儀教我耳后乃使許敬宗誣奏儀與宦者王伏勝及故太子忠謀大逆下獄死籍其家子庭芝歷周王府屬亦被殺庭芝有女爲中宗昭容侍草制誥追贈儀楚國公庭芝天水郡公以禮改葬

唐書

李邕字太和江都人善子也少謁李嶠願一見秘書嶠曰秘書萬卷豈時日能習邪邕固請乃假直秘書未幾辭去嶠試問奧篇隱帙了辯如響嶠嘆曰子且名家武后朝嶠爲內史薦邕可任諫諍召拜左拾遺御史中丞宋璟劾張昌宗等反狀武后不應邕立階下大言曰璟

揚州府志 卷之二十八  
所陳社稷大計當聽后色解可璟奏中宗時召拜右臺  
殿中侍御史彈劾任職遷戶部員外郎明皇卽位爲御  
史中丞左遷括州司馬起爲陳州刺史貶遵化尉徙澧  
州司馬開元中起爲括州刺史復坐誣枉上識其名詔  
勿劾後歷淄滑二州刺史邕早有名重義愛士久斥外  
不與士大夫接及入朝人傳其眉目瓌異阡陌聚觀後  
生望風投謁門巷填溢復以讒媚出爲汲郡北海太守  
天寶六載宰相李林甫忌邕名盛因傳以罪遣羅希奭  
就郡杖殺之代宗時贈秘書監邕文長於碑頌官屢黜  
天下慕其名盧藏用嘗謂邕如干將莫邪難與爭鋒但

虞缺折耳

唐書

李鄘字建侯邕從孫建中間登進士第又以書判高等  
補秘書省正字李懷光辟至幕府累擢監察御史懷光  
反河中鄘刺賊虛實及所以攻取者白之朝德宗手詔  
褒答懷光覺嚴兵召詰鄘詞氣不撓懷光囚之及河中  
平馬燧破械致禮表佐其府以言不用罷歸洛中召爲  
吏部員外郎元和後拜淮南節度使王師討蔡鄘以兵  
二萬分壁鄆境貲餉不仰有司後以吐突承璀薦召拜  
門下侍郎同中書門下平章事鄘不喜由宦官倖進至  
京師引疾固辭改戶部尚書俄檢校尚書左僕射兼太

子賓客分司東都以太子少傅致仕卒諡曰肅

唐書

王播字明敷其先太原人父恕為揚州倉曹叅軍遂家江都之瓜洲貞元中播舉賢良方正異等補盩厔尉以善治獄稱為三原令豪強犯法未嘗少貸歷遷京兆尹時禁屯屬鞬佩劍姦人冒之剽劫又貴戚家馳獵近郊為民害播一切禁止盜無所匿憲宗以為能進刑部侍郎領諸道鹽鐵轉運使時帝討淮西播哀財用給軍興得無乏超拜禮部尚書長慶初出為淮南節度使仍領使職浚十里港以便漕民賴其利太和八年入朝拜左僕射復輔政累封太原郡公卒贈太尉諡曰敬

唐書

王起字舉之播弟也貞元中擢進士與播並舉賢良方正異等元和末累遷中書舍人數上疏諫穆宗畋遊拜禮部侍郎宣武押牙李弁叛起與播俱上疏請詔王智興討之卒定其亂以戶部尚書判度支靈武邠寧多曠土奏為營田以省餽輓歷河中節度使方蝗旱粟價騰踊起下令家得儲三十斛斥其餘以市否者死神策士怙勢不從寘於法由是瘡積咸出民賴以生授檢校尚書右僕射為山南東道節度使濱漢多塘堰聯屬民弗完治起至部修復遂無凶年會昌中命典貢舉進尚書左僕射封魏國公凡四舉士多知名人服其鑒卒年八



十八贈太尉諡文懿起性友悌居播喪哀戚加於人尤嗜學非寢疾不輟廢

唐書

王龜字大年起之子性高簡武宗知其名以左拾遺召不赴崔璵觀察宣歙表爲副龜樂宛陵山水從之咸通中改太常少卿同州刺史牙將白約素暴橫常譁言月廩薄以動士心爲亂龜捕殺之人皆震慄徙浙東觀察使卒贈工部尚書子蕘力學有文詞以鐸當國不貢進士終右司員外郎

唐書

王式起之子以廕爲太子正字擢賢良方正累遷殿中侍御史大中中爲晉州刺史會河曲大歉民流徙他州

式勞卹之活數千人時特峨胡亦饑將入寇汾澮聞式嚴備不敢逼境徙安南都護至則浚壕繚柵寇不可入時交趾數有變懼式威不自安相率夜圍城合謀式徐被甲引家僮乘城責讓矢旰交發叛者走翌日盡捕斬之初容管災歉不歲貢式始上輸大犒宴軍中歸質外蕃而占城真臘慕義悉入獻亦還所掠王民寧國劇賊仇甫亂明越觀察使不能討宰相選式往代式聞賊用騎兵乃閱所部得吐蕃回鶻遷隸數百發龍陂監牧馬起用之集土團諸健兒爲向導擒甫斬之餘姚民徐澤專魚鹽之利慈溪民陳瑛冒名仕至縣令皆豪縱州不

揚州府志 卷之二十一  
能制式窮治其奸皆榜死咸通三年徐州銀刀軍亂以式檢校工部尚書徙武寧節度使視事三日悉以計誅亂兵終左金吾大將軍

唐書

王鐸字昭範式之子會昌初擢進士第累遷御史中丞中和元年拜同平章事二年黃巢陷長安鐸入對噫嗚流涕固請討賊乃以爲諸道行營都統移檄天下時諸將環賊莫敢先發鐸檄至號令肅然將士皆奮巢勢日蹙宦者田令孜料賊必破欲功出北司乃搆鐸於帝罷爲檢校司徒義成節度使鐸功幾成而以讒見奪然卒因其勢收復京師四年徙義昌節度使過魏州樂從信

利其輜重侍妾伏兵高雞泊劫殺之以遇盜聞朝廷不能詰天下痛惜焉

唐書

李磻字景雲鄜之孫也大中末登進士累遷戶部郎中分司東都劾奏內園使郝景全不法事黃巢陷洛磻挾尚書八印走河陽時留守劉允章爲賊脅遣人就磻索印拒不與襄王之亂磻流寓淮南高駢受僞命磻苦諫不納入爲翰林學士辭職歸乾寧元年召進禮部尚書同中書門下平章事崔昭緯素疾磻諷劉崇魯劾之下遷太子少傅復爲李茂貞等所論又罷爲太子少保上猶注意復用之及王行瑜韓建擁兵闕下列磻罪殺之

都亭驛行瑜誅詔贈司徒諡曰文僊嗜學家有書至萬卷世號李書樓所著文章及注解諸書傳甚多

唐書

五代嚴可求同州人隨父遷江都少爲吳幕僚吳王歿張顥欲自立厲聲謂諸將曰軍府誰當主者三問莫應可求前密啟曰方今四境多虞非公主之不可然今日則恐太急顥默然可求急趨出書一紙內袖中麾同列往使宅賀衆莫測既出教宣之乃吳王母史太夫人教也大畧言隆演當次立諸將宜無負楊氏辭旨激切顥氣色皆沮以其義正不敢奪吳王隆演乃得立顥知爲可求所賣夜遣盜刺之可求度不免爲書辭府主盜執

刀臨之可求操筆無懼色盜粗識字見其辭氣忠壯曰公長者吾不忍殺遂舍之去南唐時歷遷門下侍郎尚

書右僕射同平章事

十國春秋

嚴續字興宗可求子以父廕補千牛備身遷秘書郎南唐主以女妻之官兵部侍郎進尚書及宋齊邱專國公卿多附之惟續持正不爲屈拜中書侍郎兼三司使終鎮海軍節度使諡曰懿初續以少貴倦學因力教羣從子弟砥礪儒業晚歲尤屈身下士壽春人劉奐性方言直續薦爲監察御史起居舍人時論善之

十國春秋

高郁廣陵人楚王馬殷爲湖南留後以郁爲謀主署都

軍判官初殷畏淮南荆南廣南之強議以金帛結之郁曰莫若上奉天子下撫士民訓卒厲兵以修霸業於是殷始修貢京師開平時郁復勸殷令民得自造茶以通商旅而收其算歲入凡萬萬計命民輸稅者用帛代錢機杼遂絜於吳越殷地大力完得邀封爵與諸鎮抗者郁謀居多而內外疾郁功者讒郁之短殷子希聲矯令殺郁是日大霧四塞殷怪之吏以狀白殷拊膺大慟曰吾老耄使勛舊橫罹冤酷吾亦不久於此矣

十國春秋

李貽業廣陵人事南唐爲翰林學士李主昝殂大臣欲奉宋后臨朝命中書侍郎孫昇草遺詔貽業曰此奸人

所爲大行嘗謂婦人預政亂之本也安肯自爲此若果宣行貽業當對百官裂之議遂寢李主璟語貽業曰疾風勁草於卿見之保大中以兵部侍郎卒諡曰簡

陸游

南唐書

李德誠廣陵人幼從吳武王征討積功至江南馬步軍使與諸將圍安仁義於潤州仁義就執德誠拜潤州刺史歷撫虔洪三鎮節度使平南將軍中書令李主受吳禪以佐命拜太師封趙王自洪州入覲命宮人迎勞於路百官班謁於門朝堂設幄爲具每有大議遣執政就第諮問然爲人謙恭沉厚終始如一卒諡忠懿子二十

八人皆右職

陸游南唐書

李建勳字致堯德誠第四子少好學能屬文尤工詩家世將相然杜門不預世事所交皆寒畯裘馬取具而已李主昇鎮金陵預禪代之策拜中書侍郎同平章事璟嗣立以開國元勳又聯姻戚尊遇之與宋齊邱埒出爲撫州節度使建州之役諸將無復紀律建勳請官出金帛贖俘掠還其家召拜司徒致仕賜號鍾山公營別墅於山中放意泉石曰吾自知不壽求數年閒適耳疾革遺令勿封樹立碑遺他日毀斲之禍贈太保諡曰靖

陸

游南唐書

何敬洙廣陵人初爲金陵裨將累遷天威軍都虞侯破西巖延平下建州除楚州刺史嘗從數人親出里巷察人疾苦吏之苛刻無不知之每坐廳事與賓客譚宴民有白事者隨其所言親加剖析無不厭服及移鎮鄂州周師入淮詔移郭外居人入城爲備敬洙不從乃背城除地爲戰場曰職當効死於此安能閉門自固也後以勳舊拜上將軍奉以上公之秩

馬令南唐書

潘祐廣陵人少貞介文章贍逸敏於議論仕南唐爲秘書省正字直崇文館輔後主於東宮後主卽位遷史館修撰改知制誥論時政無所避後主手扎敦諭祐七表

不止因請休官遠去乃徙祐專知國史時江南衰削祐所上諫疏有陰陰如日將暮之辭後主惡之又其所薦黜與時輩不協因誣以他事劾祐祐自刎母及妻子徙

饒州

馬令南唐書

喬匡舜字亞元高郵人弱冠能屬文仕南唐爲駕部郎知制誥進中書舍人周侵淮南諸將無功元宗議親率六軍禦之匡舜涕泣上疏切諫上怒流匡舜撫州旣而師竟不敢出後主立起爲司農少卿遷刑部侍郎以老病乞骸骨後主憫其貧給俸終身

嘉靖惟揚志

宋徐鉉字鼎臣廣陵人十歲能屬文不妄游處仕南唐

李煜爲吏部尚書宋師圍金陵煜遣鉉求緩兵鉉旣行煜欲止上江援兵勿令東下鉉曰江南所恃者援兵奈何止之煜曰方求和解而復決戰豈利於汝乎鉉曰要以社稷爲計豈遑顧一介之使煜泣而遣之及至雖不能緩兵而入見辭歸禮遇皆與常時同後隨煜入覲太祖責之聲甚厲鉉對曰臣爲江南大臣國亡罪當死不當問其他太祖嘆曰忠臣也令爲太子率更令直學士院從征太原軍中書詔填委鉉援筆無滯辭理精當時論能之累遷左常侍卒鉉精小學好李斯小篆臻其妙隸書亦工有文集二十卷新定說文質疑論稽神論

宋史

崔希甫高郵人有才畧宋將沈承禮攻江南請為府判  
 官江南平潘美薦於太宗召見拜太子中允面賜金紫  
 命知原州召還拜監察御史凡朝廷更置諸道事務及  
 指揮沿邊將帥多命希甫乘傳處分輒稱上意賜金帶  
 仍命懸魚時號重金御史子琮擢進士第萬曆府志  
 陳知微字希顏高郵人咸平五年進士除將作監丞通  
 判歙州累轉京東轉運副使奏還東平監所侵民田六  
 百八十家又決古廣濟河通運路罷築黃河歲減夫役  
 萬計召拜比部員外郎知制誥淮南饑遣知微巡撫所  
 至按視儲糧察諸吏能否使還判吏部銓又判司農寺

糾察在京刑獄天禧二年加玉清昭應宮判官卒錄其  
 子舜卿為太常寺奉禮郎知微儀狀甚偉沉厚有材幹  
 不務繳察有集三十卷子堯卿大中祥符五年進士及

第 宋史

杜鎬字文周其先世居杜陵徙家楊子鎬初仕江南李  
 氏亡仕宋太宗即位遷國子監丞崇文檢討適將祀南  
 郊彗出宰相趙普以問鎬對曰當祭而日食猶廢况謫  
 見如此乎普言於上從之改太子贊善歷殿中丞國博  
 加祕校是時承平右文鎬以博學數被禮遇朝廷每有  
 疑議輒咨訪焉遷駕部員外郎改直祕閣會修藝祖實

錄命鎬檢討故事景德中修冊府元龜進拜諫議大夫  
 龍圖直學士會帝以澶淵之盟為恥王欽若勸帝封禪  
 且詐為天瑞帝猶豫問鎬曰古謂河出圖洛出書果何  
 事鎬不喻旨應曰此聖人以神道設教耳帝意乃決命  
 鎬同詳定東封儀注累官權判尚書省事京兆郡開國  
 侯鎬博聞強記朝廷每得異書多召問常手疏本末以  
 上士大夫有所著述必訪問鎬應答無倦所居僻陋僅  
 蔽風雨燕居多具醪饌以待賓友和易清素士類重之  
嘉靖惟揚志 按宋史本傳鎬無錫人其孫杞為真州  
 通判未言移居揚子乃嘉靖志暨各舊志俱云徙家揚  
 子或別有本姑  
 存之以俟考

孫長卿字次公揚州人為校書郎天禧中通判河南府  
 秋大雨軍營壞其眾將叛長卿馳諭推最惡一人誅之  
 眾遂定詔汰三陵奉先卒汰者羣譟長卿矯制使還具  
 言不可汰之故朝廷為止知和州民訴人殺其弟長卿  
 察所言無理問其貲曰上等也家幾人曰惟此弟耳曰  
 然則汝殺弟也鞠之服郡人神明之為江浙荆淮發運  
 使歲漕米至八百萬或疑其多長卿曰吾非欲事羨羸  
 以備饑歲耳改陝西都轉運使踰年知慶州州據險高  
 患無水長卿為鑿百井泥陽有羅川馬嶺棧道危險長  
 卿訪得唐故道闢為通塗熙寧元年知定州河北地大



震城郭倉庾皆隕長卿盡力繕補神宗知其能轉兵部侍郎留再任明年卒長卿長於政事性廉潔定州當得園利八十萬悉歸之公既歿詔中使護其喪歸葬

宋史

沈播其先湖州武康人父玉知真州軍事遂家焉播天聖二年登進士第授楚州司法參軍再調貴池簿佐其令有聲嘗攝銅陵縣有兄弟爭財播爲辨其曲直卒感悟讓財同居其去也二縣之人泣涕追送焉循道守官

屢絀於時卒於京師四子皆舉進士

萬曆府志

孫錫字昌齡江都人天聖二年進士授巢縣主簿改鎮江軍節度推官知仁和縣撫下仁恕以父喪去服除充

國子監直講改著作佐郎遷開封府推官以事謫出會明堂恩詔還同判尚書刑部奏赦逮捕親屬繫獄者一百二十三人復爲開封推官隨尹奏開封當改者數事上然之道士趙清貺出入宰相龐籍家受賕下府勘實坐杖配沙門島行兩日死御史劾府希宰相旨故杖殺清貺以滅口仁宗疑之悉罷知府推判官以錫知太平州清貺事獨判官王礪所決錫不自辨未幾仁宗悟非其罪復以錫提點淮南路刑獄活大辟十三人考課爲天下第一召爲三司戶部判官求知宣州許之召五縣令約以州所下書有不便封還尋知舒州發常平廣惠

倉以活陳許汝潁蔡流人及歸計口量遠近給食遣之  
去者率錢買香焚於府門比代去州人闔城門留之官  
至尚書度支郎中以老致仕神宗卽位遷司封賜金紫  
卒有文集二十卷

宋史

張方平字安道其先宋人徙揚州舉賢良方正遷著作  
佐郎知諫院夏人寇邊方平首乞合樞密之職於中書  
以通謀議帝然之遂以宰相兼樞密使西師久未解方  
平言應因郊赦開其自新之路帝喜改慶曆赦元昊竟  
降使契丹還權知開封府府事叢集方平獨默記決遣  
無少差忘拜御史中丞以侍讀學士知益州或扇言儂

智高在南詔將入寇攝守亟調兵築城民大驚擾朝廷  
發陝西步騎往戍蜀詔趣方平行方平曰此必妄也道  
遇戍卒皆遣歸他役盡罷上元張燈城門三夕不閉得  
印部始造此語者梟首境上而流其餘黨蜀人遂安嘗  
畫上十四策富弼讀其奏漏盡十刻帝稱善弼曰此國  
計大本也悉行之英宗時遷禮部尚書爲學士承旨帝  
不豫召至福寧殿帝憑几言言不可辨方平進筆請乃  
書云明日降詔立皇太子方平抗聲曰必潁王也嫡長  
而賢請書其名帝力疾書之乃退草制神宗時王安石  
行新法方平極論其害帝聞憮然哲宗立加太子太保

薨年八十五贈司空諡文定 參宋史行狀

呂溱字濟叔揚州人寶元中舉進士第一直集賢院同修起居注進知制誥出知杭州入為翰林學士疏論宰相陳執中奸邪仁宗還其疏溱曰以口舌論人是陰中大臣也願出以示執中使得自辯執中去溱亦以侍讀學士知徐州賜宴資善堂遣使諭曰此特為卿設也徙成德軍時方開六塔河宰相主其議會地震溱請罷之以答天戒後以龍圖閣直學士知開封府溱精識過人辨訟立斷豪惡斂跡已而疾卒贈禮部侍郎帝悼念之詔中書曰溱立朝最孤知事君之節絕跡權貴故中廢

十餘年人無言者方擢領要劇而奄忽淪亡家貧子幼必至狼狽宜優給賻禮官庀其葬 宋史

周孟陽字春卿其先成都人曾祖敬述知泰州遂家焉敬述仕蜀為膳部郎及歸宋知江州奏免誅逆命者二千人作大冢廬山下葬暴骨萬餘多陰德寶元中孟陽第進士教授諸王府記室英宗居藩邸禮重之會除知宗正寺力辭表凡十八上皆孟陽文又從容陳古事以諷英宗竦然起拜及為皇子愈堅卧不出孟陽入見卧內勸之曰天子知太尉賢且叅以天人之助乃發德音何堅拒如此英宗曰非敢徼福以避禍也孟陽曰今已

有此跡設固辭不拜使中人別有所奉患寧免乎時中使趨召十輩又命宗錡傾宮往請不能動及是意乃決帝卽位加直祕閣同知太常禮院數引對訪以時務最後召至隆儒殿殿在邇英院中羣臣未嘗至人疑且大用帝亦諭以不次進擢孟陽固薦人以代乃遷集賢殿修撰同判太常寺兼侍讀神宗初立孟陽入奏事帝望見哭左右皆泣下旣上疏陳五事言祖宗之制願無輕改語極剴切拜天章閣待制卒詔特官其壻及子孫三人孟陽恬於仕進自奉簡約有腴田數頃盡與弟姪其歿也無以爲葬近臣以聞兩宮惻然加賜子孫累舉進

士貴顯世其家

參宋史泰州志

潘及甫字憲臣江都人博通經史厲志文行聞胡瑗倡學於湖往從之瑗見其文喜曰非諸生比也遂補學職妻以女弟慶曆中與兄希甫同登進士爲懷仁尉筠州判官及知分寧霍邱壽春三縣所至咸著政績遷祕書丞充楚王宮太學教授律宗室以禮法神宗嘉之後以屯田員外郎通判江州遷左朝散郎親族之貧寡孤幼者皆賴其撫卹晚得目疾每命子姪執策讀於前終日傾耳危坐無倦容未卒前一日猶卧聽周書漢史口占爲詩而卒

嘉靖惟揚志

孫覺字莘老高郵人少從胡瑗學登進士第調合肥主簿嘉祐中擇名士編校昭文書籍覺首選進館閣校勘神宗卽位直集賢院擢右正言神宗將大革積弊覺言弊政固不可不革革而當其悔乃亡神宗稱其知理熙寧二年詔知諫院同修起居注知審官院王安石早與覺善驟引用之將援以爲助青苗法行議者謂周官泉府民之貸者至輸息二十而五國之財用取具覺條奏其妄曰成周賒貸特以備民緩急不徒與也故以國服爲之息說者不明鄭康成釋經乃以王莽計贏受息無過歲什一爲據不應周公取息重於莽時况載師所任

地漆林之征特重所以抑末作也今以農民乏絕將補耕助斂顧比末作而征之可乎國事取具蓋謂泉府所領若市之不售貨之滯於民用有買有予并賒貸之法而舉之倘專取具於泉府則冢宰九賦將安用耶聖世宜講求先王之法不當取疑文虛說以圖治安石覽奏怒始有逐覺意會曾公亮言畿縣散常平錢有追呼抑配之擾安石因請遣覺行視虛實覺旣受命復奏言如陳留一縣前後曉示請錢卒無一人至者以此見民實不願望賜寢罷安石以覺爲反覆出知廣德軍徙湖州松江隄沒水爲民患覺易以石高丈餘長百里隄下悉

化爲良田歷知亳州知應天府入爲太常少卿  
哲宗卽位遷諫議大夫時諫官御史論事有限毋許越  
職覺請申唐六典及天禧詔書凡發令奏事之未便皆  
得奏陳論宰相蔡確韓縝進不以德確自訟有功無罪  
覺隨所言折之確竟去縝白遷覺給事中辭日間者執  
政畏人議已則遷官以餌之願與縝俱罷踰月縝去進  
吏部侍郎領右選改左擢御史中丞數月以疾請罷除  
龍圖閣學士提舉靈仙觀以歸覺有德量爲王安石所  
逐及安石退居鍾山覺駕往道舊從容累夕迨其死又  
作文以誄談者稱之所著有文集奏議春秋易傳行世

宋史

孫洙字巨源廣陵人錫之子羈卬能文未冠擢進士包  
拯歐陽修吳奎舉應制科進策五十篇指陳政體明白  
剴切韓琦讀之太息曰今之賈誼也再遷集賢校理知  
太常禮院治平中求言洙疏時弊要務十七事後多施  
行兼史館校討同知諫院乞增諫員以廣言路王安石  
主新法多逐諫官御史洙乃力求補外知海州方春旱  
發運使調民濬漕渠以通鹽河洙持之不下三上奏乞  
止其役旱蝗禱於胸山徹奠大雨蝗赴海死尋幹當三  
班院三班員功罪籍不明吏爲姦欺洙革其甚者八事

定爲令同修起居注進知制誥洙言還叙不宜用一定之詞詔自今封贈蔭補每大禮一易他皆隨等撰定元豐初兼直學士院澶州河平詔作靈津廟碑神宗獎其文擢翰林學士纔踰月得疾時參知政事闕帝將用之數遣中使尚醫勞問竟卒帝臨朝嗟惜常賻外賜錢五十萬洙博聞強識明練典故雖對親狎者未嘗發一鄙語文辭典麗有西漢之風士大夫共以丞輔期之不幸早世一時憫傷焉

宋史

楊處厚字純甫江都人以父閱恩補齋郎加校書郎不受召爲婺州浦江尉均平徭役邑人悅服爲永康錄事

叅軍地控威茂同官皆武人處厚善於協恭兵民之政無不關預守賴以治卒於官

萬曆府志

王幾字彥成江都人知舒城未赴丁父憂王安石知其才選宰長洲縣縣號難治幾弛張以時豪強懾服歲饑廣爲賑救民無轉徙權勢者欲侵撓之執法不回治聲聞京師仕至大理寺丞

萬曆府志

孫馨字叔靜錢塘人父直言徙江都馨年十五遊太學蘓洵滕甫稱之調越州司法叅軍守趙抃薦其材知偃師縣蒲中優人詭僧服隱民間以不語惑衆相傳有異法奔湊其門馨收按奸狀立伏辜韓縝鎮長安辟入府

留五年簽書四川判官或薦於朝擢提舉廣東常平徽宗初召爲屯田員外郎初磬與蔡京善常言京才勝德恐貽天下憂至是京還朝遇諸塗逆謂曰我若用於天子願助我磬曰公誠能謹守祖宗之法以正論輔人主示節儉以先百吏絕口不言兵天下幸甚磬何爲者京默然京既相出磬提點江東刑獄未幾入爲少府少監戶部郎中時縣官用度無藝磬與尚書共疏論之當國者不樂徒磬開封以顯謨閣待制知曹州再徙鄆州邑人子爲草祭之謠指切蔡京磬以聞京怒使言者誣以他事提舉鴻慶宮起知單州遂致仕靖康二年卒年八

十六贈銀青光祿大夫諡通靖磬篤於行義在廣東時蘇軾謫居惠州極意與周旋二子娶晁補之黃庭堅女黨事起家入危懼磬一無所顧時人稱之

宋史

孫覽字傅師覺之弟也幼警悟治平二年進士知尉氏縣有屯將遇下虐士卒謀因大閱殺之以叛覽聞之馳往士猶羣語不顧覽呼諭之曰將誠無狀然天子何負汝輩乃欲致族滅耶卒乃解散神宗壯其才以爲司農主簿舒亶判寺且兼諫院欲引覽自助覽不答亶怒用帳籍違事劾覽出提點利州湖南常平改京西轉運判官入爲右司員外郎荆湖開疆命往相其便覽言沅州



所招溪洞百三十宜從本郡隨事約束勿建官置戍以爲民困自辰州至融江口可通廣西鹽省北道餉餽悉從之使還爲河東河北轉運副使進寶文閣待制由桂徙廣又改渭州夏人入邊檄大將苗履禦之履稱疾移告覽立按其罪竄諸房陵軍中肅然召知開封府至則拜戶部侍郎與蔡京論役法不合出知太原夏人據橫山並河爲寨秦晉之路皆塞覽謀復取葭蘆戍阻險不得前夏人數萬屯境上覽下令吾兵少須滿五萬夏人聞而濟師覽不爲動相持久忽令具糗糧嚴兵械曰敵至矣數日果大入奮擊敗之遂城葭蘆而還策勲加樞

密直學士覽雖立邊功議論多觸執政屢遭黜削歷知河南永興徙成都辭不行降爲寶文閣待制卒

宋史

孫升字君孚高郵人治平二年進士簽書泰州判官哲宗立爲監察御史朝廷更法度逐奸邪升多所建明嘗上疏曰自二聖臨御登用正人天下端良之士俊偉之才俱收並用近世得賢之盛未有如今日者願於耳目之臣論議之際置黨附之疑杜小人之隙疑間一開則言者不安其職使循默之風熾而壅蔽之患生非朝廷福也遷殿中侍御史以梁燾事出知濟州踰年提點京西刑獄復拜侍御史論翰林承旨鄧伯溫草蔡確制稱

其定策功比漢周勃欺天負國豈宜親承密命不報以  
天章閣待制知應天府改集賢院學士紹聖初翟思張  
商英摭升過劾之削職知房州再貶果州團練副使汀  
州安置卒 宋史

喬執中字希聖高郵臨澤人父竦教授里中從遊者多  
以文學知名執中初入太學補五經講書五年不謁告  
王安石見而器之命子弟與之遊治平四年擢進士調  
須城主簿時河役大興部使者不得人一夕譟而潰致  
大獄執中往代遂怙然富民賂吏將創橋所居以罔市  
利執中疏其害使者入吏言使成之執中曰官可去橋

不可剗也卒不能奪王安石爲政引執中編修熙寧條  
例選提舉湖南常平時張惇討五溪檄執中取大田離  
子二峒峒路險絕期迫執中但走一校諭其首卽相率  
歸命召爲司農丞提點開封縣鎮諸縣牧地民耕歲久  
議者將取之當夷邱墓伐桑柘萬家聚泣執中請於朝  
詔復予民改提點京西北路刑獄時河決廣武埽危甚  
相聚莫敢登執中不顧立其上衆隨之如蟻附不日埽  
成元祐初爲吏部郎中遷起居郎權給事中有司以天  
下讞獄失出入者同坐執中駁之曰先王重入而輕出  
卹刑之至也今一旦均之非好生之意也進刑部侍郎

紹聖初上官均撫執中爲呂大防所用以寶文閣待制知鄆州執中有仁心屢典刑獄活以百數一夕夢神人昇以騎都尉諱旦爲客言之少焉談笑而逝

宋史

沈銖字子平楊子人播之孫少從王安石學舉進士第官國子直講改審官主簿坐事免元祐置訴理所被罪者爭自列銖獨不言紹聖初起爲太學博士祕書省正字崇政殿說書受旨編元祐臣僚章疏以進講拜右司諫辭改起居郎中書舍人俄引疾以龍圖閣待制知宣州卒

宋史

沈錫字子昭銖弟也崇寧初爲講議司檢討蔡京方銓

次元符上書人欲定罪錫曰遠方之士未能知朝廷好惡若概罪之恐非敦世厲俗之道京不從除衛尉丞累遷太常少卿拜兵部侍郎以徽猷閣待制知應天府徙江寧張懷素誅朝廷疑其黨有脫者江淮間往往以誣告興獄錫至郡有告者按之則妄也具疏於朝由是他郡繫者皆得釋歷知海泰汝宣四州以通議大夫致仕卒

宋史

吳祥真州人中進士第爲吉州軍士推官選開封縣丞大臣稱其才遂爲祕書省著作佐郎歷知考城龍門二縣遷大常博士復知蘄水縣父喪服除朝京師以疾歸

初祥屢試不第既刻苦事學率其弟務竭立養親及從事吉州弟死祥爲孤女數人營嫁在開封衣食常不足而親舊至京相向如歸喪父稱家以葬人或憂其貧欲出財以爲基址祥曰貧吾素也喪乃欲爲利乎既歸僦屋以居卒幾不能葬

儀徵舊志

張汝賢字祖禹先世廬陵人徙居真州第進士初調贛縣主簿以御史中丞薦除監察御史善爲章奏語約而意至元豐間除侍御史以論尚書左丞王安禮與俱罷元祐初復爲吏部郎迎事立決吏不敢欺後使閩越奏弛茶鹽增價除新額十之八又以赦令蠲民所負官錢

米五十餘萬閩人德之淮南饑克江淮等路制置發運副使居歲餘以左司郎中召還有疾道卒

萬曆府志

張汝明字舜文汝賢弟也少有聲太學元祐中登進士第歷簿丞叅軍滯州縣者二十年未嘗一語干進大觀中召寘學制局充檢閱文字預考貢士不悅者誣以背王氏學詔究之徽宗覽其去取錄曰考校盡心寧復有此特擢監察御史嘗攝殿中侍御史卽日劾蔡京市恩招權且謂京卞親兄弟京中書執政卞樞密秉兵文武兩權盡出其手一旦不虞措社稷何地帝獎其直京憚之徙司門員外郎出通判寧化軍謫監壽州麻步場遇

揚州府志 卷之二十八  
赦簽書漢陽判官田法行受牒按境內躬親閱實雨雪  
不渝吏不得通賕謝而稅均晚知岳州卒於官汝明事  
親孝母病疽更數醫不効汝明刺血調藥傅之而愈其  
學精研象數貫穿經史百家所著有易索書張子卮言  
大究經傳於世 宋史

周秩字仲實泰州人與兄種同舉進士歷官有聲元符  
中當國者革元祐政痛以法繩下時邢恕等令蔡確子  
渭上書訟劉摯等謀危宗社引文彥博子及甫爲證上  
遣朝臣覆實命下卽以兵防二家悉囚其子弟召秩爲  
京西轉運使俾推治之恕等遣人謂秩還朝當以大司

寇相處及奏對哲宗面諭曰彼欲盡誅大臣以下將置  
朕何地秩到洛察其無他卽釋禁防招二家子慰諭之  
具奏語不涉乘輿非有異意事乃寢大忤時相意仕終  
集賢殿修撰贈徽猷閣待制 嘉靖惟揚志

張康國字賓老揚州人登元豐進士第紹聖中提舉兩  
浙常平豪猾望風斂服發倉救荒江南就食者活數萬  
口徙福建轉運判官崇寧元年入爲吏部左司員外二  
年爲中書舍人徽宗知其工詞章不試而命遷翰林學  
士知制誥三年進承旨拜尚書左丞尋知樞密院事帝  
惡蔡京專悞陰令沮其奸嘗許以相是時西北邊帥多

取部內官自辟置康國曰塞吏當擇人奈何私所善乃  
隨闕選用著爲令上嘗欲擢用張邦昌康國對曰邦昌  
貌復而心狠不可任金人數侵中國邦昌講修子姪禮  
康國力拒之卒贈開府儀同三司諡文簡 宋史

時丹立興化人元祐間任高郵司理蒞政仁恕民德之  
鄉人稱其所居曰時堡卒秦觀以詩挽之有懸知青史  
上又載一于公之句 興化舊志

吳敏字元中真州人大觀二年試辟雍首選蔡京喜其  
文欲妻以女敏辭擢祕書省校書郎京薦之克館職除  
右司郎官升中書舍人同修國史改給事中鄭居中方

秉政敏數言其失居中銜之坐駁盜當死者罷爲右文  
殿修撰提舉南京鴻慶宮久之復爲給事中權直學士  
院徽宗將內禪定計東幸命戶部尚書李稅先出守金  
陵敏詣都堂言曰朝廷便爲棄京師計何理也此命果  
行雖死不奉詔稅遂罷行皇太子除開封尹上去意益  
決敏因奏對遂薦李綱綱嘗語敏以上宜傳位如唐天  
寶故事故薦之帝遂召綱入議命敏草傳位太子詔欽  
宗旣立敏遷知樞密院事拜少宰與太宰徐處仁不合  
遂俱罷頃之言者又論敏出知揚州再貶涪州安置建  
炎初移柳州紹興元年復觀文殿大學士爲廣西湖南

宣撫使卒於官

宋史

儀徵志云敏欽宗時請褒贈司馬光范純仁罷元祐學術之禁又奏蘇軾言祖宗重臺諫乃是察大臣之爲奸者臣雖任相事願開言路以通下情又言漢文帝用惇厚長者天下富安武帝用材能天下多事本朝王安石用材能急功利風俗以是壞又言爲天下者當視爲一物近年以來有御錢有朝廷錢有有司錢人材亦然有親擢有大臣薦引一天下而自爲分別如此臣願陛下視天下爲一則事可成帝皆嘉納又上疏言王安石廢春秋非是願詔立春秋學官以

### 貢舉取士從之

莊徽字彥猷江都人政和初除兩浙運副二年召還歷徽猷閣待制知平江府時朱勔被寵中貴緣勔而使者冠蓋相望官吏無不傾身事之徽獨不假借朝廷命官造乘輿服御於浙西特令徽與勔協理尋詔罷勔尚遷延觀望徽曰此天子盛德事大臣亟當承奉何顧其他卽日罷之在官六年乞閒不允久之提舉洞霄宮卒

萬

曆府志

劉大中字立道楊子人父湜政和間進士分教處州不樂仕進自號拙堂居士大中經明行修大觀中賜上舍

出身時修史極天下之選得四人倪若川汪藻徐師仁而大中與焉紹興三年權監察御史宣諭江南東西路斥奸惡推善類不避權勢歲省泉司官吏費十三萬緡四年遷右司諫言大禮賞格戶部迫取物帛爲害詔爲展限一月七年以兵部侍郎知處州戢吏撫民所部肅然未幾召還八年除禮部尚書叅知政事遂奏疏中原陷沒東南民死於兵火存者十無二三奸臣虐用誅求過數最爲疾苦以致愚民怨憤殺子溺女乞自今守令滿日俱以生齒增減爲殿最首議建儲語尤懇切高宗爲之感悟賜以御書陸機文賦是年冬以與趙鼎見合

不附和議秦檜使御史蕭振劾罷之遂以資政殿學士大中大夫再知處州以疾乞閒卒於處葬白雲山括蒼新志自宣和以後賢守三人大中居其一

萬曆府志

李正民揚州人登政和二年進士第中詞學兼茂科累遷中書舍人出爲兩浙江西湖南撫諭使正民請依法具奏官吏能否其民間事干州縣實負冤抑者並聽陳訴卽爲伸理從之以奉使稱職除給事中吏部侍郎正民辭不拜上特賜詔使就職紹興十三年正民奏宣和以前通令佐階銜並帶主管學事軍興以來學校之教中輟今宜依舊給銜以示聖朝偃武修文之意爲江西



揚州府志 卷之二十八  
路提點刑獄仕至右朝散大夫克徽猷閣待制平原縣  
開國伯卒 嘉靖惟揚志

王昂揚州人少以文學知名政和八年廷策進士嘉王  
楷第一上不欲以王子魁多士昂名在第二擢置榜首  
除祕書省校書郎宣和元年昂言今後除卿監未經上  
殿者乞令如郎官之法并令閣門引見從之高宗卽位  
除尚書工部員外郎遷起居舍人祕書少監時御府頒  
降書籍四百九十二種曾收家藏書二千六百餘卷昂  
請分爲經史子集四庫委官校讎其脫落譌舛者以別  
本叅考補寫畢則繳進除徽猷閣待制知台州尋奉祠

江州卒於家

嘉靖惟揚志

王居正字剛中揚州人少入太學時習新經字說者主  
司輒置高等居正曰窮達自有時心之是非可改邪流  
落十餘年司業黃齊得其文曰王佐才也及同知貢舉  
欲擢爲首他考官持之置次選范宗尹薦於朝召入對  
高宗嘉之除太常博士遷禮部員外郎撫州守高衛言  
甘露降圖以獻居正請却其圖勿納試太常少卿遷起  
居郎帝方嚮規諫居正次前世聽納事爲集諫十五卷  
以廣帝意詔以時務訪羣臣居正獻疏數千言論省費  
尤切居正素與秦檜善檜與居正論天下事甚銳旣相

所言皆不酬居正疾其詭見帝言願陛下以臣所聞問  
檜檜銜之出居正知婺州州貢羅舊制歲萬匹崇寧後  
增五倍建炎中減爲二萬至是主計者請復崇寧之數  
居正語其屬曰吾願身坐不以累諸君手疏五不可以  
聞詔如建炎中數漕司市御炭須胡桃文鶉鴿色者居  
正曰民以炭業率居山谷安知所謂胡桃文鶉鴿色邪  
入朝以聞詔止之召爲太常少卿遷起居舍人史館修  
撰大將張俊遣卒至彭澤怙勢辱令令郭彥恭械之俊  
訴於朝居正言彥恭不畏強禦無可罪俊又乞免徭役  
居正言兵興以來士大夫及勲戚家賦役與編戶均蓋

共濟國事以寬民力俊反不能體此乎和州請蠲進奉  
大禮絹居正言進奉乃臣子享上之誠若察民力無所  
從出不能預降旨蠲之至使自陳已爲非是乞速如所  
請又論除自有自中出者不可帝皆嘉納除兵部侍郎  
入對以所論王安石父子之言不合於道者哀得四十  
二篇名曰辨學上之又陳安石釋經無父無君者帝作  
色曰孟子所謂邪說正謂是矣居正退序帝語繫於辨  
學首出知饒州改吉州被劾罷官三載起知溫州居正  
知不爲檜所容以目疾請祠杜門言不及時事檜仍使  
何鑄劾之奪職凡十年檜死復故官紹興二十一年卒

居正之學根柢六經楊時器之出所著三經義辨示居正曰吾舉其端子成吾志居正感勵首尾十載爲書詩周禮三經辨學各如于卷書成進之而楊時義辨亦列祕府二書行天下遂不復言王氏學

宋史

潘汝一字古玉海陵人博貫經史工爲文靖康初徽宗南幸童貫等勸渡楊子汝一至江都上書乞回鑿慰天下建炎間許容攝州事降金汝一不食者數日所親強之乃起金將遣人通意且曰不獨免死孤城將北借濟上富且貴焉汝一罵曰吾生於宋死於宋闔門爲忠義鬼含笑入地矣容欲作賀僞齊表召之不往金又命容

擇文士草檄容迫遣之汝一以死拒金人取城中圖書或求其所著文以獻汝一指篋曰此豈可克雞林庭幣邪鄉人高之紹興中以進士久次得官更歷州縣卒有羣玉府鳳池集共二十卷

嘉靖惟揚志

周麟之字茂振泰州人敬述四世孫也少負邁才登紹興進士中博學宏詞第一授太學錄尋擢中書舍人倅徽州明年召對授著作兼禮部員外郎翰林學士使金金主爲殊禮厚遺遣還兼吏部尚書累官左朝奉大夫同知樞密院適金人渝盟議遣使重其行乃復命麟之受詔未陞辭會天申節慶使至持嫚書且索兩淮襄漢

地中外忿之麟之因奏金人意可卜宜練甲申傲不當遣使上曰卿言是也彼欲割地何以應之對曰講信之始分封畫圻應有載言願出以示之彼將自塞使者果無語麟之又上疏極諍曰昔日之講和今日之渝盟不待上智而知若彼有速亡之形我有恢復之冀在陛下審處而應臣當竭智畢力贊成事幾使搖尾乞憐臣竊恥之疏入謫祕監分司南京居瑞州孝宗立復故官尋卒麟之學識宏富辭令得體著有海陵集

嘉靖惟揚志

李易字順之揚州人好學多聞以清素見稱建炎初高宗駐蹕維揚策試進士易為第一以上憂勞辭聞喜宴

從之授簽書江陰軍判官會金人至夏港距城數里守臣胡紉謂易曰吾曹當死城郭君有母宜急避之易歸告其母蔣氏母曰我去則汝必無意堅守死生當與汝同之由是易守益固金人亦引去紹興元年為太常博士韓世忠辟易參謀轉工部員外郎為太常寺少卿自建炎惟揚之變宗正寺所掌圖牒皆逸於江滸至是易請編次玉牒從之遷中書舍人改直祕閣知揚州以本貫辭不許官至敷文閣待制隨奉祠卒於秀州

嘉靖惟揚志

李衡字彥平江都人紹興中登進士第授吳江主簿有

部使者怙勢作威投劾歸起知溧陽縣專以誠意化民民莫不敬嘗榜夏秋二稅期日於縣門鄉無吏迹而輸送先他邑辦終任未嘗繫一重囚隆興二年金兵至淮堧官沿江者多送其孥衡獨自浙右移家入縣民心大安盜蝟起旁境溧陽獨靖晏轉運使上治狀召入爲監察御史歷知溫婺台三州加直祕閣而衡引年乞身上累卻其奏除祕閣修撰致仕上思其樸忠旋召除侍御史以老固辭不獲命差同知貢舉會外戚張說以節度使掌兵柄衡力疏其事謂不當以母后肺腑爲人擇官廷爭移時改除起居郎請老愈力上知不可奪仍以祕

撰致仕後居崑山結茅別墅聚書萬卷號曰樂庵卒年七十九衡自宣和中入辟雍同舍有趙孝孫者洛人也其父實師程頤勸衡讀論語曰學非記誦詞章之謂所以學聖賢也不可有絲毫僞飾處方可以言學衡心佩其訓博通羣書以論語爲根本臨沒沐浴冠櫛翛然而逝周必大聞之曰世謂潛心釋氏乃能達死生衡非逃儒入釋者而臨終超然如此殆幾聖門所謂聞道者與

宋史

史正志字志道江都人紹興二十一年進士授敎縣尉秩滿詣闕上保治要畧八篇丞相陳康伯薦於朝除樞

密院編修乞築和州城及舒揚防守荆襄事宜高宗視師江上命扈從至鎮江上恢復要覽五篇且指張浚之失至建康言三國六朝形勢與今日不同要當無事則都錢塘有事則幸建康以爲東西都詔下侍從司諫集議從之尋除司農寺丞孝宗卽位除度支員外郎後因論左帑南庫西庫窠名差互忤時相以散官謫永州尋復原官除右文殿修撰知靜江府未赴而罷賜爵文安縣開國男轉朝議大夫後歸老姑蘇號吳門老圃所著有建康志十卷

萬曆府志

沈度字公雅真州人播曾孫也紹興間令餘干政有善績以考功郎中除直秘閣知平江府乾道二年召赴行在上曰甲申之歲委卿守吳門治行昭著可謂得人又詢吳中歲事度奏臣初到郡水歉艱食荷陛下捐馬料四萬餘石以賑之全活甚衆上曰正賴良守措置漢宣帝所謂與我共理者惟良二千石乎卽以爲中書門下省檢正諸房公事四年又以直龍圖閣知建寧是時朱子在崇安爲度屬吏剏立社倉均糴度以錢六萬緡助役倉成民賴之朱子記其事又知臨安府仕終兵部尚書

儀徵舊志

鍾離松字其紹真州人紹興十八年登進士第乾道間

以朝請郎知興化軍事為人退然自下治郡事每窮日之力而繼以火馭吏牧民並善嘗奏蠲民租詔盡除之  
真士稱良牧者以松為首焉

嘉靖惟揚志

孫祺字若谷高郵人隆興元年進士調繁昌尉乾道六年旱攝邑事者悉以餘米獻於郡祺爭之不得乃請於郡願留米依常平法減價出糶以濟饑民自冬至春民食不缺郡悉和糶散行鄉落隨所糶之米就富食椿留未幾縣治火倉庫一空延及居民上下嗷嗷祺乃發椿留米以賑糶之民復沾惠

嘉靖惟揚志

牛大年字隆叟江都邵伯人慶元二年進士歷官將作

監主簿入對言人主當以天命人心之所繫致念又言今日士氣久靡宜體立國之意以振起之而後搢紳無貪名嗜利之習有持正秉義之操言多剴切遷軍器監主簿歷進直寶章閣為工部郎中入對請懲貪吏累陞祕書監起居郎以寶章閣待制提舉太平興國宮卒特贈四官大年清操凜然所至以廉潔自將

宋史

姓譜云大年知黎州治鎧甲增料錢以優郡兵會大水即以私帑賑民比還朝一夫荷擔而已郡人歌之  
李直養字無害揚州人正民之孫紹熙元年以薦攝華亭令是年夏久旱直養虔禱獲大雨三日畎澮沾足秋

早再禱又應歲大稔二年丞平湖以當路薦遂爲令邑沿海多溺屍乘潮上暴露沙際直養置冢瘞之未踰年瘞百五十餘人又知海鹽縣修葺學校作小學定爲章程擇教諭朱沆爲之師風俗丕變民爲立去思碑

嘉靖

惟揚志

田克悉字安叔江都人學問該博爲鄉里推嘉定元年登進士任松溪主簿秩滿試博學宏詞科崔與之帥揚甚敬禮之及鎮蜀辟置幕府資其贊畫後知沔州決疑獄抑僥倖節浮費政績茂著民甚愛之

萬曆府志

元丁濟字漑之高郵人爲寧國尹忽白晝磚石飛空而

下破屋傷人如是者累日丞簿相視愕然濟曰奸民弄法縣尹之責強鬼興妖城隍神之過也約三日不止將廢爾祀自是妖竟不復作後爲奉化尹衆務畢舉凡所判決更不復移人奉爲神

高郵舊志

崔禮字和之高郵人壯年遊京師上言海運之便授進義校尉管領海運改廣東鹽課市舶副提舉財貨淵藪一無所取尋除鹽課司副提舉歲增課鈔一萬九百錠有奇潮州大水颶風爲災江西行省遣禮往賑全活甚衆潮民德之

高郵舊志

曲出江都人爲邵武達魯花赤儉樸寬仁爲政不擾僚



揚州府志 卷之二十八  
屬化之汀寇犯境賴出保捍郡以無事

嘉靖惟揚志

揚州府志卷之二十八 終

揚州府志卷之二十九

人物二

明汪廣洋字潮宗高郵人元末遊寓太平明祖渡江召  
爲元帥府令史累遷右司郎中知驍騎衛事平章常遇  
春下贛州廣洋叅軍事遂守贛州拜江西行省叅政洪  
武元年徐達平山東命廣洋往撫納新附民庶安之召  
入爲中書叅政明年出叅政陝西三年召爲右丞左丞  
楊憲惡其軋已嗾侍御史劉炳劾之謫海南帝尋悟誅  
憲召廣洋還封忠勤伯誥詞比之子房孔明四年李善  
長致仕以廣洋爲右丞相叅政十年拜右丞相會占城

貢使至不卽引見又御史中丞涂節言劉基死毒廣洋宜知狀帝怒又謫海南行至太平再賜勅責之遂自縊廣洋少從學余闕通經史善篆隸大書工詩歌爲人寬和自守與奸人同位而不能去故及於禍

本傳

蔣宮字伯離真州人五歲誦孝經論語左氏春秋十歲善屬文從學陳子山子山銳意釋經宮乃列諸家傳疏得失進子山異之授以詩書春秋宮輒悟其旨子山謂人曰明敏若宮雖汝南應世叔不足多也自是博極羣書於制度沿革陰陽曆數之義無不通元至正初登第未幾丁祖憂負祖母避地浙東以薦授行樞密院管勾

服闋授崇明州判官攝州事有聲明洪武初部使薦宮才可備史館授翰林修撰尋擢開封蘭陽縣丞地當南北要衝兵燹之餘寇盜充斥居民存者十二三宮廣爲招徠一年復業五千餘戶彌災捍患掩骼埋胔通商販理冤滯安反側開學校崇德義邑人大和秩滿朝京以疾卒

嘉靖惟揚志

邱民字克莊江都人洪武初爲松江府學訓導慕學之士自遠而來十餘年無慮千數松江一時文風之盛不下鄒魯

列朝詩小傳

萬曆志云民洪武九年舉於浙江宋濂鄭戩以知禮

揚州府志 卷之二十九  
薦歷官禮部侍郎卒葬蜀岡禪智寺前

楊允字執中寶應人洪武十四年歲貢官御史年纔二十餘爲人明斷善治獄帝甚寵任之時人呼小楊御史歷江西按察司副使前後斷獄凡四萬餘卒年三十有

二 寶應舊志

顧謙字仲謙儀真人洪武庚辰進士授行人尋拜監察御史按治南詔時兵伍之制未成謙至編立衛所尺籍伍符釐然不紊會吳橋賊猖獗謙奏誅之按部宣朝廷德意給以冠服使知向化賊有以金繡雜物餽者歸皆奏聞帝以京師流民輻輳恐無告失所爲設飯堂市中

多備藥物使謙主其事謙曲爲嫗煦全活甚衆上嘉之洪熙初擢通政司叅議以同列連坐降本司知事宜德間以薦遷江西按察僉事再調浙江擊奸戢貪舉賢勸士並有仁聲以老病乞歸卒所著有魯齋愛梅軒遺芳諸稿 儀徵舊志

陳琰字公信江都人洪武間貢入太學授監察御史巡按雲南每出解見院東民家烟突出人手作招訴狀心知有冤猝召其家長督錮之而搜檢其家物得江西估客路引一紙乃出訊之曰爾前者沒江西估客財而殺之匿其屍竈下今露矣其人卽伏罪時詫其神歷陝西

左布政使以忤藩邸歸

陳晟字克昭寶應人自幼刻志經史洪武中以能書薦

入中書累遷五軍都督府斷事有都督某犯法當死太

祖念其有功欲釋之晟條列所犯執奏上怒命尚書茹

瑞劾實及瑞復旨與晟初鞫無異上乃悅一日當奏獄

上收其奏牘令晟背誦晟誦如流上曰見汝年少特試

汝耳陞湖廣按察僉事後使日本回有憾晟者發其用

私錢易馬謫居山東既而上悟曰彼以已錢易物何罪

召還補通政司經歷遷吏部考功主事後以老乞歸居

鄉足跡不涉城府課子孫力穡與編氓無異

嘉靖惟揚志

高穀字世用興化人永樂乙未進士選庶吉士授中書

舍人仁宗卽位遷翰林侍講正統五年尋陞侍講學士

工部侍郎十四年英宗北狩穀居守預立景帝進工部

尚書兼翰林院學士掌閣務時也先數請遣使迎上皇

廷議不決中書舍人趙榮毅然請往穀嘉榮忠奮解所

束金帶贈之及上皇將至京議迎復禮穀言宜從厚會

千戶龔遂者投書於穀謂迎上皇禮不宜薄穀袖其書

入朝示公卿曰武夫尚知禮況儒臣乎比駕至穀復上

章申前議無顧忌聞者義之二年進少保東閣大學士

都給事中林聰忤執政論死穀爲力解得減丙子順天

鄉試王文陳循以子落第奏誣考官劉儼黃諫穀奉命覆閱試卷力言儼等無私且曰大臣子與寒士競進已不可況不安義命欲因此戕考官乎儼諫乃得免裕陵復辟穀謝病賜金帛襲衣給驛舟以歸穀杜門家居瘖田僅足衣食成化初詔贈太保諡文義

本傳

董璘字德文高郵人少以才學名永樂戊戌會試第一殿試一甲第二授翰林院編修以母老乞歸養母嘗病思鱗魚已過時不可得禱於江神命漁者舉網竟得二鱗以歸人驚異以爲孝感母喪終陞修撰與修宣宗實錄主浙江試兩預會試分校咸稱得人後憤太常典禮

樂不可以畀異流乞自爲其官忤王振譴還鄉里卒於家所著有玉堂清餘集

高郵舊志

黃惟正字用中儀真人永樂中進士爲戶科給事中遇事敢言舉劾無所避嘗兩論冢宰蹇義義銜之會晉府長史缺上勅吏部推能幹正大官補之義疏惟正以聞上欲留之他用義曰能幹正大無如此人遂命以往至則王敬憚焉惟正性剛毅體幹魁梧美髭秀目時方以公輔期之爲義中傷怏怏以卒

儀徵舊志

龔謙字廷益高郵人正統戊辰進士授監察御史英宗北狩謙首疏迎復建儲二事直聲震臺中巡鹽兩浙姦

蠹悉祛旋清軍湖廣得大體都御史寇深移文他省清軍者令俱以謙爲法未幾卒於官人咸惜之孫勳以孝

聞 萬曆府志

張曦字景芳江都人景泰間以例貢授攸縣令民素強梗曦躬行化導之門禁清肅戒絕餽納昭雪幽枉寬其徭稅不事苛暴民遂感服乞歸數年民爲立生祠祀之 嘉靖惟揚志

朱暄字景文高郵人景泰庚午舉於鄉薦授御史巡按山東不避權幸有宮掖乳媪季姓者占奪民田暄覈實奏按以法改按雲南曲靖府俗素獍悍奏爲建學設官

省有險道開山路百餘里行者便之立祠道左名朱公嶺外補嚴州府九年行清政簡囹圄常虛考績爲天下第一常植柳其地人呼曰朱公柳陞福建叅政未仕而卒 高郵舊志

邱俊字漢英江都人天順甲申進士累陞雲南按察僉事念母老無他子弟侍養會捧表進京卽上疏乞終養詔許之稱孝摺紳間 嘉靖惟揚志

張冕字汝端江都人天順己卯舉人同知台州府衙署清肅直謁無敢入考滿增四品俸復任五年比歸家人誤持官金入舟至中途始覺急返之遷澂江知府操履

益峻後家居淡薄運使畢亨分俸金遺之固辭不受

嘉靖惟揚志

張文字存簡泰州人成化丙戌進士任比部郎時奉命錄囚畿內多所平反有馬平兒者報父仇抵罪文上疏謂君父之仇必報反復累數百言讀者感動平兒遂得免死陞浙江按察副使伸雪冤枉全活甚衆文平生自奉儉約周人之急則傾囊弗吝尤嗜學不倦所作詩文皆有關世教云

嘉靖惟揚志

柳琰字邦用儀真人成化丙戌進士授戶部主事監收密雲軍儲請託不行監督淮安糧餉中官不得恣構之

左遷南陽通判改廣平稍遷吉安同知吉俗健訟琰擊奸右良能聲甚著江西民逋負歲幣藩臬命琰賁金赴浙織辦餘千金歸悉還之官時稱其廉擢知嘉興府修海塘繕城郭百務具舉初里胥侵盜官租歲爲民患琰廉得其人悉抵於法釋寃囚數百人卒於官士民爲置棺以斂解無餘資所著有東津詩集

儀徵舊志

馬岱字伯瞻江都人成化丙戌進士初任戶曹會計出入人莫敢欺知泉州府民有數世不葬其親者岱至諭以禮旬月葬以千計僧每以尼爲下院岱罪其尤者餘尼悉以配平民風化爲之一變內艱解任行李蕭然泉

民戀不能舍性剛峭好面折人過不避權貴人多嚴憚  
之

嘉靖惟揚志

冀綺字文華寶應人成化五年進士授戶部主事歷郎  
中會歲饑奉詔賑河間諸府稱旨爲威寧伯督餉條上  
邊務及時政二十餘事多見採納嘗劾皇親姚福等不  
法帝嗟異之曰好狠郎中擢應天府丞遷太僕寺卿進  
府尹致仕在太僕時攤減寶應及泰州高郵江都儀真  
五州縣俵馬若干匹鄉人德之

寶應舊志

高銓字宗選江都人成化己丑進士始入仕或勸增年  
就臺諫銓謝不可累官河南按察使風紀整肅歸德有

黃河退地千頃爲親藩所據上命中官與銓按實銓欲  
還民中官怒脅以惡語執不變竟如銓議歷左布政使  
巡撫保定有奸民獻民田爲皇莊者銓奉命勘實以聞  
乃歸田於民又立九則均徭之法民皆帖服正德中爲  
南戶部尚書改衛士廩米折色每月兼給著爲令以劉  
瑾故致仕逮獄瑾誅復官銓性溫厚好禮推挽後進不  
遺餘力家居雖鄉黨小吏來謁亦必公服送迎鄉人感  
之

參名山藏嘉靖志

張稷字世用寶應人成化八年進士授太常寺博士擢  
御史巡按福建大帥某怙勢爲民患稷列其罪奏黜之



嘗以傳奉冗員淆亂仕路率同官奏曰比來末流賤伎  
妄廁公卿屠狗販繒濫居清要文職有不識一丁武階  
亦未挾一矢甚有軍匠逃匿易姓進身官吏犯贓隱罪  
希寵一日而數十人得官一署而數十人寄俸自古有  
如是之政令否也帝得疏意頗動會都給事王瑞亦言  
居三日貶秩奪官者十數人皆人心所快稷每對客撫  
掌論時事氣勃勃不能平草陳時政疏數千言未及上  
而卒所著有竹西稿

本傳

金琇江都人成化丁酉舉人正德初知保康縣廉介正  
直吏民不敢欺時歲稔兵擾民將竄去琇推誠撫安之

民始樂業尤加意學校待士以禮文風漸興去官後民  
立祠祀之

姓譜

葛萱字光庭高郵人成化十四年進士初授行人陞監  
察御史建議除盜恤軍選將及借留起運軍儲十餘萬  
石賑濟鳳陽等處一時軍民感悅弘治初巡視山東滄  
州鹽課兼理河道奏減竈民陪償消耗鹽課一百四十  
七萬餘引改巡廣東征後山瀧水擒獲賊首姚觀祖等  
斬首二千餘後山賊爲廣東害數年萱一日平之上特  
勅獎諭陞江西僉事又改陝西督征哈密軍餉有功九  
年罷歸十年上追念前績遣賜白金文綺者再

高郵舊志

儲嚙字靜夫泰州人九歲能屬文成化癸卯甲辰鄉會試皆第一授南京吏部主事孝宗嗣位疏薦張吉等五人可任諫官皆錄用進郎中尚書耿九疇器重之調考功考注臧否一出至公嘗覈實一官九疇欲改評嚙不從且云公所執何異王介甫九疇大慙徐曰郎中言是然非我莫能容也武宗立塞上有警條禦邊五事又陳馬政病民者四事多議行科道官龐泮等言事下獄嚙論救之陞太僕卿正德二年陞南京左僉都御史督理糧儲入爲戶部侍郎督倉場宿弊盡釐時劉瑾擅權數凌侮大臣獨敬嚙稱爲先生嚙憤其所爲五年春引疾

致仕瑾誅仍起爲戶部左侍郎七年改南京戶部轉南京吏部卒於官嚙體貌清羸若不勝衣淳行清修介然自守工詩文推引知名士辟遠非類不惡而嚴諡曰文懿有柴墟集

參本傳名山藏

黃瓚字公獻儀真人成化甲辰進士授南京戶部主事進員外郎督湖廣諸州軍餉父喪服闋遷本部郎中弊清事集同官憚之出爲四川布政司右叅議督松潘諸路邊儲時番人爲寇瓚至備示朝廷威德禍福順逆之勢諸洞帖然母喪歸服除起四川左叅議正德初藍鄙諸盜起巡撫林俊檄瓚分守保寧深入通巴解散賊黨

遷浙江右叅政擢江西右布政使時寧濠不法諸司多爲所制瓚獨不撓轉湖廣左布政使吏部疏天下外官治行五人瓚第一賜宴禮部陞應天府尹巡撫山東時山東寇亂之後郡縣貪殘瓚乃身示儉樸藩臬以下無敢有燕樂者黃河決城武請遷縣安民劾舉庶官貪廉臧否不私裁臨清關中官溢稅設保伍法弭響馬盜修武備繕城郭百廢悉整武宗嘉其勞遣中使齎金帶一品服賜之瓚以無功辭入爲南京兵部右侍郎江彬扈從南巡值其生日部寺俱賀瓚獨不往嘉靖初致仕卒賜祭葬所著有雪洲文集若干卷

儀徵舊志

王讓字時遜泰州人由舉人歷三縣尹有奇績復知洪雅縣縣初建城垣公解俱草創讓隨方規辦與民同畚鍤間出已俸犒賞未期工竣民不告勞興學校勸農桑暇則循行阡陌田稅均平數年戶口增五千餘麥產五岐禾穎九穗瓜茄一蒂結十實以老辭歸邑人建遺愛樓塑生像以事之

泰州舊志

陳達字兼善揚州衛人授威遠令入覲吏部舉天下廉吏七人達預焉後以病歸民立去思碑頌之

嘉靖惟揚志

盧瀚字文淵江都人弘治癸丑進士授兗州府推官政操敏肅洗冤澤物他郡獄多待決累斷大案有異政郡

人祠祀焉行取爲河南道御史首論周經許進當從衆  
薦召用文森等因論事下獄宜寬宥其邪佞如陳瑤李  
溫俱可斥免雜進如孫伯謙等亦乞罷遣又因災異力  
請開納讜言以祛敝政及清冗食用省京儲凡所論列  
並切大體遷知岳州府以疾乞歸尋卒

江都縣志

陳玉字德卿高郵人弘治癸丑進士選庶吉士授監察  
御史時災異迭見玉疏經國大務數千言皆切利病上  
嘉納之歷北畿陝西浙江三省提學累陞僉都御史正  
德初進兵部侍郎提督東西兩路邊務東起山海關西  
止龍泉關延亘二千三百餘里大小關隘三百四十餘

時邊防未固兵馬未足而朶顏等衛人勾引北敵乘隙  
竊發東路旣寡弱無援西路尤單薄不足恃玉乃條陳  
急務四事悉見施行在邊六年悉心籌策邊境肅清屢  
疏乞休不允復陞南京右都御史掌院事致仕玉敷歷  
中外幾三十年皆懋著聲績爲世名臣所著有友石亭  
集四卷奏議四卷

高郵舊志

徐蕃字宣之泰州人弘治癸丑進士乞終養歸後謁選  
授南京吏科給事中以論劉瑾逮杖幾死放爲民瑾誅  
起爲江西叅議擢浙江提學副使抑浮靡崇理學累仕  
爲都御史出撫鄖襄清覈流民得二十餘萬後以工部

右侍郎提督易州廠以疾乞休蕃性簡淡寡嗜好居處  
衣饌取給而已嘗見其子治室頗整肅之素無妾媵其  
妻在家爲購女備巾櫛蕃歸見而訝之卽日具裝遣還  
其家

萬曆府志

趙鶴字叔鳴江都瓜洲人弘治丙辰進士授戶部主事  
爲尚書侶鍾所知壬戌天下大稜鶴代草上寬恤事宜  
詔文武大臣會議蠲諸不急著爲例陞本部郎中督永  
平山海薊州糧草兼視屯田條上邊場急務十六事又  
以征收草豆積久腐敗奏請折價貯庫臨時和糴以給  
軍需其古北口等倉儲不足以供遊兵請更番操練有

警調發自是邊儲賴焉正德初陞建昌知府益府軍校  
有恣橫虐民者捕置之法閹瑾以規賄不得搜薊州耗  
糧事左遷南安同知尋擢金華知府在郡疏請廣折徵  
寬加派備積貯禁溺女諸事錄東萊北山魯齋仁山白  
雲五先生遺書爲正學編集范香溪以下諸家爲金華  
文統集劉孝標駱賓王舒元興及近世四十餘人爲文  
統拾遺表范文簡潘默存之里皆正俗誠民之要擢山  
東提學副使或以其約士過嚴爲蜚語謗之卽上疏乞  
致仕歸築精舍江滸日夕嘯咏其中嘗編惟揚郡乘著  
具區文集若干卷

萬曆府志

徐昂字文舉江都人弘治丙辰進士授兵科給事中屢疏陳治道及論邊備皆切中時務正德初劉瑾引用其黨馬永成谷大用等八人戶部尚書韓文抗疏暴瑾罪惡瑾矯旨罷文昂疏言文歷官年久端謹素著國家倚以為重不宜罷瑾矯旨并奪昂官嘉靖初卹錄舊臣起昂為廣東右叅議昂初無子就王生相生曰君今年登第但不宜子後在西安途中買一妾詢之乃良家子即焚券為擇配秩滿如京師相者迎謂曰君相頓異可得子矣後數歲果育五子

萬曆府志

左唐字堯卿江都人弘治丙辰進士為廣東叅政署司

篆吏無所容奸恨欲撓之會查盤使者至所盤計鉅萬獨羨餘百金訝其少詰守藏者曰事由署印叅政使者弗審徑以論唐唐忿而病僚友慰之拊膺曰平生砥礪名節顧乃蒙垢若此遂不食而死同寅並藩臬會呈撫按言唐寃按為覆盤庫則應有羨餘故在實不止百金將奏雪之以唐喪歸乃止唐性廉介以官為家不問生產喪歸囊橐蕭然倫以訓為誌墓且書其寃

嘉靖惟揚志

任廣輩也祖宗時恒御內閣商決章奏經筵日講悉陳時政又不時接見儒臣今幸閣之禮久廢經筵祇故事而日講又復寢罷願陛下追舉舊制凡政事闕違皆許陳說庶啓沃爲不虛也京通二倉總監內臣每收米萬石勒白金十兩以歲運四百萬石計之人四千兩又各斗級二三百人使納月錢夫監督倉儲自有戶部焉用中官願賜罷遣京操軍士自數千里至而總兵坐營等官又各分屬辦納月錢乞嚴革以蘇其困陛下遇災求言郎中王雲鳳主事胡燿皆有論奏而雲鳳等得罪則與不修省何異願利弊當興革者卽見施行東廠校尉

本以緝奸邇者但爲內戚中官洩憤報怨如御史武衢忤壽寧侯張鶴齡及太監楊鵬主事毛廣忤太監韋泰皆爲校尉所發誣以罪名臣亦知今日言之異日必爲所陷然臣弗懼也疏入下獻詔獄謫藍山丞未赴遷宜陽知縣馬文升薦之遷南京都察院經歷武宗卽位擢廣西提學僉事遷福建提學副使未任卒

本傳

嘉靖志云獻方直好古廷對策語指陳時事謂政權歸於內使大臣奉行文書呼家奴爲老先生等語尚書馬文升讀卷爲之歎服後卒於官無以爲斂同寅助之護其喪及妻子以歸稿葬三十餘年貧不能襄

事嘉靖間侍御胡植檄有司爲營冢壙

王軌字戴卿江都人弘治十二年進士正德初歷工部員外郎屢遷山東左布政嘉靖初入爲順天府尹房山地震軌言召災有由語多指斥忤旨切責尋遷右副都御史巡撫四川芒部土知府隴慰死庶子政與嫡子壽爭官政使人誘殺壽奪其印軌乃會貴州兵擒政於水西璽書獎勞爲戶部右侍郎覈九門首藉地以餘地歸之民勘御馬監草場釐地二萬餘頃募民以佃房山民以牧馬地獻中官韋恒軌釐歸之官奸人馮賢等復獻中官李秀秀爲請於帝軌抗疏劾之竟治賢等如律覈

勛戚莊田請如周制計品秩別親疎以定多寡非詔賜而隱占者俱追斷戶部尚書梁材採其言兼并者悉歸官稍進左侍郎罷歸以兵部尚書李承勛薦起故官總督倉場再遷南京戶部尚書改兵部詔舉將材薦鄭卿沈希儀等二十一人皆擢用居四年以老乞罷久之卒

本傳

萬曆志云軌初授戶部主事監崇文門稅司禮太監蕭敬家奴市猪隱稅軌執而訊之忽健卒數十擁奪去敬以告尚書侶鍾鍾笑曰乳犢寧知畏虎耶陞員外郎奉命視直隸閩浙倉庫時劉瑾怙權每使還必



揚州府志 卷之二十九  
以賄見軌獨不往瑾怒令科道覆覈卒無所加罪改  
工部員外郎監遵化鐵冶瑾黨致書爲薪炭戶請託  
且恐以危言軌不顧將具疏劾之會瑾敗乃已爲順  
天府尹時內官有迎進大祀神牲需求無所得令所  
經道路築堤費不貲軌奏其生事害民狀權璫憚焉  
軌性至孝爲諸生時父病思食柿不得遂終身不食  
柿

朱應登字升之寶應人弘治十二年進士年始二十三  
明初制義取士風雅多置不習至是則何景明李夢陽  
崛起北方江南文士相應和者顧璘徐貞卿及應登三

人而夢陽尤推許應登時劉健當國謂翰林者他日執  
政也不宜崇尚詞華抑文學士不得入翰林應登遂授  
南京戶部主事然應登雖文人精於吏事知延平府多  
善政楊一清爲吏部尚書擢陝西提學副使初一清居  
是官建正學書院應登拔秦士高等者聚其中出所藏  
書教之多所成就應登才華彪發或當人落筆一掃千  
言旁觀奪氣一時僚友見妬飛語騰起調雲南尋陞叅  
政罷歸卒

寶應舊志

葉相字良臣江都人弘治壬戌進士初司李金華平獄  
均賦郡民戴之入爲給事中時劉瑾擅政中外無敢言

相首疏劾瑾又上建儲及漕運庫藏等十餘疏皆剴切  
識治體因忤權貴出叅政貴州歷江西布政使已復擢  
貴州巡撫會芒部構亂相討平之賜鏹幣擢戶部侍郎  
尋以病予告久之起補刑部侍郎終三年不調或諷以  
賂主爵者相笑曰有納粟尚書耶尋予告歸築迂隱園  
以老卒賜葬祭祀鄉賢

萬曆府志

朱嘉會字亨之寶應人弘治十五年進士年二十三觀  
政都察院晨夕讀律有疑輒就人講貫授東昌推官諸  
大吏少之試以難決獄嘉會援筆立判悉得其情有李  
氏女訟亡夫有金藏父所無左官久不決嘉會曰無富

女誣貧父事父慚出半還之有童婦亡去者其父訟舅  
筆死匿之嘉會鞫他尼僧乃得其婦人以爲神擢兵部  
主事進員外改御史轉廣信知府時有巨盜衆數千人  
擅號攻城邑劫府庫嘉會至罷一切文法使民富者出  
粟貧者任城守習戰鬪又募土兵出不意擣其虛賊稍  
稍引去明年賊更出境寇徽衢州朝遣大軍撲勦嘉會  
主辦芻糗濟軍亂定民以不擾歲饑上請蠲田租發帑  
賑貸除民所不便十餘事民德之擢辰沅兵備副使尋

卒祀名宦

寶應舊志

楊果字實夫興化人弘治壬戌進士謁選授戶部主事

尋陞刑部員外郎以執法稱簡陞吏部文選郎中黜陟  
 明允請託不行楊廉謂其門可羅雀陞南京右通政攝  
 刑部事凡三大讞無冤聞寧王宸濠變上言九事尋乞  
 養歸嘉靖初用言官薦起南京太僕寺卿陳馬政便宜  
 數事從之陞太常寺卿再乞歸養復起為南京戶部侍  
 郎攝部事以疾卒於官果天性孝友執親喪三年號泣  
 不輟歷官南北以母老不挈妻子所受業師四喪皆為  
 舉之且恤其孤官清要自處恬退嘗謂人曰吾平生無  
 所長唯不識劉瑾錢寧江彬三人差自慰耳 萬曆府志

王儼字士望江都人弘治乙丑進士知光澤縣以廉謹

稱擢南京刑部主事人不可干以私有權要子殺人論  
 之如法陞郎中執操愈嚴出守岳州以直道不容歸鄉

人重之 康熙府志

壬戌紀乙丑

盛儀字德璋江都人弘治乙丑進士觀吏部政時劉瑾  
 以事干尚書托儀致書儀拒不許以是知名授禮部主  
 事改監察御史時文體日靡儀請崇濂洛之學以挽士  
 習陞山東按察副使勦商河巨盜寬夫役之困東人戴  
 之遷雲南叅政察屯務清宿蠹尋陞湖廣按察使督修  
 顯陵多所節省又活饑民萬計入為太僕寺卿立解馬  
 法遂著為令儀歷官以清峻著致仕歸橐無餘貲薄田

傲廬僅足自給尤篤於孝友兄弟終身同居卒祀鄉賢  
著有惟揚志二十卷 萬曆府志

高滂字穎之江都人銓子也弘治乙丑進士正德初劉  
瑾羅織大臣誣逮銓下詔獄滂伏闕請以身代疏詞迫  
切事得雪宸濠謀逆陰賄璫請添設護衛滂抗疏陳祖  
宗法無增設藩王護衛例不可許且發其不軌事事遂  
寢後宸濠反人服其先識焉時大臣出治張秋決河又  
討江西流寇久無功滂并疏治河討賊之畧仕至南京  
光祿寺卿 康熙府志

陳言字汝行江都人正德丁卯領鄉薦授棗強令治稱

廉明有權璫欲造橋衡水令棗強助費巨萬言執不可  
罷其役邑旱徒跣以禱俄雷雨大作邑大稔考滿遷處

州通判棗強士民遮道泣留建祠以祀 萬曆府志

景暘字伯時儀真人少穎敏隨父官廣州布政劉大夏  
見其文異之中正德戊辰進士廷試第二授翰林編修  
劉瑾方橫凌轢儒臣薦紳喪氣見暘獨嚴憚暘亦不少  
降在經筵必先夕齋沐曰天顏咫尺不敢不敬也甲戌

同考遷國子司業以母老乞南改中允南京國子司業  
禁諸生請託不悛者繩以法士習一變性孝友家庭藹  
然姊早寡迎與母俱視其子女無異已子友人張貢約

爲婚姻未幾貢死暘曰聘雖未行已心許之矣召其子妻之暘又有女以瞽廢其友潘準聞之曰不可使伯時女不字願字吾子人兩義之暘與鄉人蔣山卿趙鶴朱應登爲詩古文稱江北四子撰有前溪集若干卷

萬曆

府志

王大用字時行儀真人正德戊辰進士授工部主事管臨清關時流賊剽掠趨清源大用與兵道督壯勇與戰賊解去轉刑部員外郎擢廣東兵備僉事會樂昌高快馬流劫湖南詔大用合兵討獲有功又清遠徭熾帥所部渡滙江旗坑諸寨獲其酋又攻黃籐峽黃花洞諸巢

獲賊都督凡督征五載巡撫蕭翀疏其才陞本省兵備副使尋陞江西叅政遷廣東右布政未幾推都御史巡撫順天又改巡撫大同至則破巨盜劉善斬之傳首京師初與按臣張祿爭禮不合祿嗾給事秦鰲論之大用上疏乞休不允仍以整飭薊州兵備兼巡撫順天值歲大饑奏給銀米數萬循行賑濟時朶顏三衛詐貢大用單騎入城調兵扼險伏所部爲左右翼犄之朶顏謀洩宵遁復諭其酋長令獻黑谷關地暨太平塞五百餘里與飲盟去陞右都御史入掌院事張祿復論大用生事構怨坐免後以霍韜薦復命巡撫四川陞南京刑部右

侍郎侯代間會白草番變攻破平番堡坐還籍候勘乃致仕卒所著有書經指畧四書道一編易經安玩錄及聖學一貫圖說

儀徵舊志

俞敦字崇禮江都人正德辛未進士改庶吉士授刑科給事中敦在諫垣首劾遼蜀撫臣及諸藩守臣不職者時江彬潛圖不軌朝臣無敢言敦獨疏陳其逆狀不報戊寅命勘河南總兵張璠等不法事敦執法按罪踰月獄成上特賜銀牌旌之一時權倖如錢寧輩憚敦名求與納交皆峻拒之遷禮科右給事中世宗卽位敦首疏四事曰去壅蔽親儒臣立紀綱惜名器上嘉納後奉詔

使安南賜麒麟服進都給事中出知廣西梧州府卒

萬

曆府志

徐晉字文明江都人正德辛未進士歷任南京兵部車駕郎中大璫劉瑾怙勢晉繩之以法宸濠叛南都震恐大司馬喬宇參贊機務知晉才悉以軍事委之晉選將調士修備器械增置船艘晝夜不怠及武宗駐蹕南都供億旁午晉從容取辦有言宜賄江彬者不聽人爲晉危而卒無患陞青州知府以勞致疾易箒時同官憫其貧請入公堂美餒若干營後事晉謝曰吾恨不能如前輩馬伯瞻清風高節敢至死變其守乎拒不受

嘉靖惟

揚志  
王紀字理卿泰州人正德辛未進士授江西進賢知縣時洞蠻姚源古恣殺掠爲害甚劇紀身抵其穴討平之在邑三年滯獄苛征清革殆盡進南京工科給事中首疏建皇儲謹大祀及邊防時務疏凡十餘上宸濠之叛畢太監謀內應紀與大司馬喬宇策縛之武廟南巡紀屢疏請還後爲言者所中謫浙江嘉善縣丞陞武城知縣會滹沱河決捍治有功擢高唐知州以憂去起補河間未幾擢陝西僉事以賑饑積勞卒於官至今廟祀高

唐  
萬曆府志

儲洵字平甫泰州人正德辛未進士官兵部郎中左遷沔陽守歲饑積逋賦所司督責洵下令悉停止民賴以安郡多水患請修隄防言甚剴切遷台州同知陞福建漳南僉事漳舊多盜洵設條約督捕撲滅幾盡致仕歸博採建文諸臣編輯革除錄及卒門人私謚文貞子

秦

州舊志

蔣山卿字子雲儀真人正德甲戌進士授工部主事以諫南巡被杖謫南京前府都事嘉靖改元復官歷刑部郎中出知河南府改潯州再改南寧時討思田土官岑猛山卿調度軍餉以功進廣西叅政總督林富重其才

方擬薦擢坐讒言罷在南寧入覲上言思龍立縣不宜割屬田州導使攜貳移思恩而建府治於荒田尤爲失策又言兩廣總兵率用侯伯彼皆純袴子弟營求出鎮朶削無厭宜選謀勇將臣充其任又言廣西夷多民少右江如柳慶諸州縣左江如桂林平樂諸州縣皆城池圯塞千里荒涼徭賊得以出沒其間宜行撫按閱視修築城池繕道途置傳舍爲一勞永逸之計其經畧大槩如此旣罷歸以詩酒藝文自適所著有南冷休園等集

萬曆府志

樓觀字國光江都人正德丁丑進士授刑部主事陞員

外郎中出守興化政尚寬惠然吏無敢爲奸仙遊苦海寇觀鑿石築城民賴以安每行縣自庀厨傳不擾下邑陞湖廣副使致仕橐中惟圖書數卷觀之先出嗣葉氏至子懋中嘉靖壬戌進士官刑部始疏復樓姓

萬曆府志

高遷字升之銓從子正德辛巳進士授寧波府推官攝郡事會日本貢使構亂遷討平之陞戶部員外郎督糧通州值邊警歲漕四百萬石無缺陞郎中尋知順德府時車駕幸承天道出順德遷抵任甫及旬供帳立辦城沙河工竣陞河南按察司副使會河決睢州野雞岡奉勅治之遷爲鑿孫繼口塞河二百二十五里以疏橫流



復扈運口九十里上遣兵部侍郎王以旂視其役薦濬  
勞績第一明年益發民濬三河未深者漕運賴之詔增  
俸一級百姓肖像祀焉著有南兗州集順德府志

萬曆

江都志

李樹敏江都人以選貢授嘉善丞修築海隄著有勞績  
再補安福丞時值均田敏自治食具出入阡陌不以煩  
民除夕有饋豚蹄者家人受之業就鼎令挈還之其清  
介類此卒於官士民皆垂涕祀名宦

萬曆府志

李應暘字子新江都人為諸生工古文辭名噪輦下公  
卿貴人爭致之應暘以親老托疾歸後以歲薦授臨邑

訓導再遷懷慶教授時興國吳國倫為參藩特器重之  
陞南雄推官權梅嶺滄沈兩稅歲課巨萬不私一錢兩  
臺及郡守共歎羨焉以疾乞致仕卒

萬曆江都志

王大化字元成正德癸酉領南畿解額登進士授高唐  
知州州人競武大化至則首謁文廟修學宮與諸生講  
藝暇則問風俗省賦斂勸農桑察冤獄招集逋亡鋤剔  
強暴州用大治擢嘉興府同知去之日萬民遮道泣建  
祠以祀擢工部員外郎奉勅分理漕渠尋遷刑部郎中  
決獄執法不徇請託忌者中之遂外補平定知州歎曰  
直道之不見容至此今吾親老豈長能僕僕簿書間哉

致仕歸後議起用竟以疾卒著有高唐志北涓詩集續  
史詳節數十卷

儀徵舊志

方岑字高伯江都人嘉靖丙戌進士授大理寺評事陞  
南京左寺正出知杭州府先是海寧縣令某於巡按御  
史爲肺腑親引用巨猾六七人恣營奸利聞民怨乃逮  
六七人者下獄夜使人殺之以滅口事發憲臣下岑按  
驗得實庭笞逐之岑亦竟爲御史陰中罷免岑爲文宏  
博出入左氏韓非劉向諸家詩宗初唐風骨不衰著有  
竹素齋集

萬曆府志

蔣應奎字文煥先世江都人以永樂初戍大同遂家大

同嘉靖乙酉舉山西鄉試丙戌成進士授工部主事分

司呂梁陞郎中改營繕司董九廟慈慶慈寧諸大工告

成賜銀幣陞大僕少卿久之陞應天府尹時鎮田萬畝

荒弗治稅悉徵之里人應奎親往勘爲出金築堤召民

開墾成腴田以免里人困累至今便之陞都察院右副

都御史巡撫遼東請發內帑築邊牆二百餘里僅四月

工竣省費萬計陞兵部右侍郎協理京營戎政致仕歸

江都行李蕭然性嗜學手不釋卷語天下事歷歷如指

掌清修鯁介其天性也

萬曆府志

曾銑字子重江都人嘉靖己丑進士初知長樂縣擢御

史巡按遼東遼陽兵辱撫臣呂經爲亂銑急檄副總兵  
罷經苛急事爲亂軍乞赦而捕獲首惡數十人請急誅  
斬懸首諸城全遼大定擢大理寺丞遷左僉都御史巡  
撫山東俺答數入內地銑請築臨清外城工畢進副都  
御史居三年改撫山西經歲寇不犯邊進兵部侍郎二  
十五年夏總督陝西三邊軍務寇十萬餘騎由寧塞營  
入大掠延安慶陽銑遣叅將李珍搗寇巢穴斬首百餘  
級寇大懼遁去時套寇牧近塞居民不敢樵採銑率諸  
軍驅之遠徙詔增銑俸賜銀幣有加銑念寇居河套久  
爲中國患上疏請以銳卒六萬鎗手二千每歲春夏交

攜五十日餉水陸交進直搗其巢爲一勞永逸之策條  
八議以進是時銑欲西自定邊營東至黃甫川一千五  
百里築邊墻請帑金數十萬期三年畢功詔曰銑倡恢  
復議甚壯其令銑與諸鎮臣悉心上方畧予修邊費二  
十萬銑乃益銳合諸臣條上方畧十八事已又獻營陣  
八圖并優旨下廷議輔臣夏言欲倚以成大功主之甚  
力嚴嵩與言有隙欲借事傾言乃極言套不可復詆言  
以激帝怒旋復顯攻言謂向擬旨褒銑臣皆不與聞兵  
部尚書王以旂會廷臣覆奏遂盡反前說言套不可復  
帝乃遣官逮銑無意殺之也會咸寧侯仇鸞鎮甘肅以

驕恣為銑所劾逮嵩故雅親鸞乃代鸞獄中草疏誣銑  
 掩敗不奏剋軍餉鉅萬遣子淳屬所親賂當途其言絕  
 無左驗乃竟擬斬即日行刑銑既沒家無餘貲隆慶初  
 給事中章自修御史王好問訟銑冤詔贈兵部尚書諡  
 襄愍賜祭葬廕子汴判應天孫之省判湖州府

本傳

徐子麟字瑞卿其先自甘州徙江都子麟以太學高等  
 補貴州都司經歷移雲南委理五井鹽課為前官補負  
 課千餘緡前官卒又倒橐助其喪還陞澂江通判晉烏  
 撒同知會苗兵亂諭以大義諸苗帖服無何被讒論罷  
 子麟欣然曰麟待罪邊徼二十年今得生還幸矣歸築

一草閣琴書自娛竟以貧死

萬曆江都志

林春字子仁泰州人少孤好學聞王良講學慨然師之  
 為文不事奇博而發揮自得嘉靖壬辰會試第一授戶  
 部主事調禮部又遷吏部文選員外以母病乞歸養家  
 居三載未嘗干州郡有饋遺非禮者却弗受歲入不贍  
 而好賙予與鄉人處恂恂類布衣尤樂與人為善再起  
 補稽勲調文選郎中州守黷而虐春言於尚書黜之赴  
 都時泊舟淮平淮守供帳甚薄後入覲註下考春獨言  
 其廉得免人皆多之尋遘疾卒有東城文集

參嘉靖萬

曆府志

桑喬字子木江都人嘉靖十一年進士由主事改御史出按山西所部頻寇躡喬奏請盡蠲徭賦厚贖死者家叅將葉宗等將萬人陷賊伏中大潰賊遂深入天城陽和兩月間五遭寇巡撫樊繼祖總兵官魯綱以下皆爲喬劾副將李懋及宗等六人並逮治十六年夏雷震謹身殿下詔求言喬偕同官陳三事末言陛下遇災而懼下詔修省修省不外人事人事無過擇官尚書嚴嵩及林廷梈張瓚張雲皆上負國恩下乖輿望災變之來由彼所致疏奏四人皆乞罷詔廷梈雲致仕留嵩瓚如故嵩再疏辯且詆言者給事中胡汝霖言嵩負穢行召物

議逞辭奏辯陰擠言官無大臣體帝下詔飭嵩如汝霖指時嵩甫拜尚書方養交遊揚聲譽舉朝未知其奸喬首發之後咸服喬先見喬尋巡撫畿輔引疾都御史王廷相以規避劾之嵩因構其罪逮下詔獄廷杖戍九江居戍所二十六年卒隆慶初贈卹如制

本傳

萬曆志云喬戍九江念母老治廬迎養母後歸江都喬獨居一室惟一僕供掃除汲爨而已生平嗜易占得其微奧所著有廬山記真詮詩文若干卷

張旦字子明寶應人嘉靖十四年進士授中書舍人擢戶部員外郎遷郎中督餉大同會邊兵以餉匱鼓噪將

揚州府志 卷之二十九  
爲變旦爲疏請語甚懇摯詔戶部卽給一月糧更額外  
加芻豆軍士帖然歸伍帝嘉其能賜白金綵綺故事去  
任時支銀千兩號無碍銀旦獨不受數轉至四川叅政  
以憂歸旦爲人淡泊自守不肯干進大學士嚴嵩柄政  
旦爲其所取士不與通以故歷三十年不得致華要且  
遠走瘴癘之鄉家居淳謹借所善集湖村栩栩自得不  
一涉外事旣卒子孫貧甚

寶應舊志

沈良才字德夫泰州人嘉靖乙未進士改庶吉士授兵  
科給事中尋轉工科左給事中時盧綱孫存互訐奏良  
才勘問伸存而抑綱一切株連皆得釋綱卒正典刑陞

吏科給事中嚴嵩甫入閣良才疏列其奸不報陞南京  
大理寺右寺丞尋進左少卿以僉都御史巡撫湖廣陞  
兵部右侍郎倭寇南訖議遣大臣討之嵩憾其嘗議已  
奏遣良才毅然請往會已命有人不果行丁巳自陳嵩  
誣以他事罷免初良才爲諸生時富民劉欽請賑諸生  
之賢者良才獨卻之御史李東嘉其節爲備禮冠婚卽  
以是年舉於鄉

萬曆府志

曹守貞字子一江都人嘉靖戊戌進士知遂昌縣邑苦  
採礦役守貞條上其害遂得罷庚子入覲同官傾之左  
遷晉州判攝趙州移知曲周縣皆有惠政陞工部營繕

司主事權荊州關稅時遼庶人恣暴於荆守貞不爲撓  
遷員外郎陞尚寶寺丞典司者嚴世蕃與議多不合謫  
山東轉運判官久之擢南京戶部郎中有頃京營訛言  
欲裁粟布軍士大閔尚書患之問守貞守貞移牒諸將  
士擇時日覈軍稽詐冒給糧布諸軍士相顧愕曰何傳  
之謬耶事遂寢出爲平樂知府錄囚多從末減尋乞休  
歸閉戶讀書不預外事所著有畸侔軒稿

萬曆府志

崔繩字淳甫江都人嘉靖癸卯舉於鄉授清苑教諭陞  
靈壽知縣邑小民悍令多不滿任或調或罷去繩凡再  
考最民甚德之擢倅山東萊州府乞歸故廬庠陋茹蔬

飯糲翛然自適郡邑大吏多敬事之卒年八十七尚書

劉光濟志其墓

萬曆府志

楊守誠字惟一江都人嘉靖丙午舉於鄉授南樂知縣  
遷河間府判再遷益府審理所至有能聲致仕歸里與  
副使何城力請於太守吳桂芳築揚州新城並瓜洲城  
以禦倭寇至今賴之所著有防秋紀行稿屯鹽總議諸  
書

康熙府志

朱曰藩字子价寶應人應登子幼博學攻詩父友李夢  
陽顧璘見之稱賞不已舉嘉靖甲辰進士知烏程縣宿  
蠹積害爬梳靡遺大司空劉麟免歸結社峴山曰藩往

揚州府志 卷之二十九  
從之遊幅巾布衣壺觴嘯詠人不知其爲邑宰也歷南  
京刑兵二部主事轉禮部主客郎中留都事簡閉戶讀  
書詞翰傾動海內居三年出知九江府新濂溪書院以  
館諸生二百餘人修飭廢毀倡舉風化民甚德之辛酉  
景王之國曰藩病憊猶從卧榻上調度以勞卒於官囊  
無餘貲所著有山帶閣集三十卷爲詩取材文選出入  
六朝錢謙益尤深許之 參萬曆府志寶應縣志

李春芳字子實興化人嘉靖丁未進士殿試第一除修  
撰擢翰林學士累遷太常少卿拜禮吏二部侍郎爲禮  
部尚書時宗室蕃衍歲祿苦不繼春芳考故事爲書上

之諸吉凶大禮及歲時給賜皆嚴爲之制帝嘉之賜名  
宗藩條例尋加太子太保命兼武英殿大學士嘉靖末  
與大學士徐階同受顧命穆宗新政誅左道錄言官時  
有旨重建鳳翔樓春芳言土木之費終先皇世海內騷  
動今朝政聿新宜與百姓更始而復興役勞民天下謂  
何上改容謝之又奏罷太常美金及織造歲幣牙簞珍  
異皆報可隆慶戊辰主會試稱得人有科道官言事侵  
中貴中貴泣愬上前上怒不測春芳婉爲解言者得無  
罪邊鎮諸臣多喜事春芳請建戍臺而已俺答以孫闖  
邊被擒求入貢冀釋其孫朝論二三春芳與高拱張居



正共贊成之議乃定故北鄙數十年無邊警春芳之力  
爲多已進柱國少師以父母老乞致仕歸養章七上始  
得請明年上命禮部郎存問於家年七十五卒贈太師  
諡文定

參本傳興化縣志

宗臣字子相興化人嘉靖庚戌進士授刑部主事調吏  
部考功司主事上疏乞養病歸起補稽勲員外郎會楊  
繼盛論劾嚴嵩以寃死臣率同舍郎解袍覆其尸爲文  
哭之嵩慚恨出臣福建叅議戊午夏倭犯福州城中戒  
嚴撫臣阮鶚被逮三司共議城守令臣監西門先是有  
司悉部勒諸父老子弟守埤臣至悉罷其老弱疾病者

簡壯士嚴守會報寇至六門咸閉城外數萬人呼求入  
城臣開西門坐詰而入之復檄召城外百里所蓄薪穀  
悉徙之城中不徙者縱火焚之壯夫不肩薪穀者不得  
入於是城中薪穀日以萬計時有議毀城上屋以便擊  
賊臣力止不毀寇攻西門臣多製火藥中之相戒不敢  
犯西門未幾賊寇興化其先寇鎮東者尚屯海上適臣  
所部兵二千人自他郡入援合撫臣兵數千要擊之斬  
獲殆盡沉賊船數十於海中是歲八月泰寧報粵寇急  
臣卽檄延邵諸郡縣兵夾勦而身與數騎馳赴之四面  
設伏遏其衝突賊由歸化走粵臣督數百騎徑趨白蓮

賊逼永安又蹴之永安擒斬數十人追至百里外是役也犯霜露冒戈戟算無遺策爲巡撫所倚重陞按察司副使提督閩學以勞瘁得疾卒於官臣才高氣雄爲郎時與濟南李攀龍太倉王世貞長興徐中行南海梁有譽武昌吳國倫臨清謝榛稱中原七子有詩文集十五卷

萬曆府志

張膽字惟慎高郵人經之子嘉靖丙辰進士爲監察御史前後六年務持大體不事搏擊聲望自著巡京通倉劾錦衣督運官貪暴不職者巨璫爲請拒弗聽又疏奏馬政五事戎政六事及杜吏姦廣積儲所論皆根極利

害初按貴陽時送嫡母尤歸里母塗中疾故扶櫬渡淮值風大作鄰舟多溺膽撫棺痛哭顛天頃刻波平人以爲孝感奉命查剔南京畿道文案卒於官著有尚書管見若干卷

高郵舊志

李承式字敬甫先世自大同遷江都嘉靖丙辰成進士初任錢塘知縣以執法忤齷使者調溪澤除奸吏稱神明擢兵部主事上封事八條皆報可尋備兵榆林法令嚴整壁壘一新陞陝西布政使病辭歸會倭犯朝鮮以承式有邊才召用多立軍功陞福建左布政使尋致仕惟汙萊數頃以供饘粥築室湖上扁舟往來足不履城

市卒祀鄉賢

康熙府志

顧廷對字子俞泰州人嘉靖己未進士授平湖知縣減驛馬復塘長酌開河事宜一時稱便擢監察御史多所建白不避豪貴先是宣德時以宣城逼山多虎傷馬暫令泰州寄牧馬千六百五十匹久為民害弘治間儲懔為太僕奏蠲馬八百匹及廷對視馬政奏蠲種馬之半鄉人德之後巡按江西卒於官

萬曆府志

此下少與花進士張齊

張守中字裕齋縉之子高郵人嘉靖壬戌進士授工部主事奉命造重城再修京庾督工永陵賜金幣改虞衡司郎中分署遵化鐵冶墾田數百畝教以桔槔歲得穀

數百斛以給治人又城白冶以防邊上嘉獎之陞浙江按察司副使飭兵溫台時海上戍卒數月不得糧眾洶洶守中至盡給之島夷曠賊不時竊發守中計擒其魁巡按御史以不卽上功效之調官貴陽丹平苗夷叛守中率諸路兵張左右翼攻之斬獲無算巢穴蕩平督撫上功第一代督者為讒所構中以他事當再調守中曰吾已投荒萬里猶不理人口耶遂投劾歸咸為扼腕上嘉丹平功賜金幣於家屢薦不起

高郵舊志

此下少進士李存文系人

袁應祺字肖海興化人萬曆甲戌進士任戶部主事先是興邑糧三萬石有奇以鄰邑奸民誣訐欺隱溪湖港

蕩咸視田稅增糧至二萬石知縣歐陽東鳳重憫民困  
抗疏叩闕應祺在部昌言於朝力請大司農乞如東鳳  
奏得改折銀一萬兩民以稍蘇擢昌平道未任卒於京  
邑人至今德之立祠祀焉

興化舊志

李植字汝培江都人承式之子萬曆丁丑進士改庶吉  
士授監察御史十年冬張居正卒馮保猶用事植發保  
十二大罪帝震怒罪保明年巡按畿輔請寬居正所定  
百官乘驛之禁從之擢太僕寺少卿廷臣忌植適帝欲  
卜壽宮於大峪山植謂其地未善御史柯挺自言習葬  
法力稱大峪之美給事中王敬民等又迭疏攻植遂貶

綏德知州引疾歸居十年起沅州知州累官右僉都御  
史巡撫遼東墾積土得田四萬畝歲獲糧萬石戶部推  
其法於九邊又奏稅監高淮貪暴請召還不報後乞休  
家居卒贈兵部右侍郎

本傳

朱希禹字砥中江都人萬曆間以貢入太學授新昌令  
民桀驁難治希禹不事鞭笞一以至誠化民踰年民大  
悅服以勞瘁致疾不起卒之日邑人罷市比喪歸擁輻

送者幾萬人

萬曆府志

張肖孫字克甫江都人祖鎧嘉靖間江淮饑輸粟千石  
助賑詔旌以官肖孫萬曆丙子舉於鄉初令上猶再宰

南平俱疲邑難治而能化其刁悍以循良稱官至長沙郡守

康熙府志

章潤字實甫江都人萬曆丁丑進士授浙江安吉知州州故確瘠民悍難治潤廉敏通達因俗而導民以帖服陞刑部員外郎著律例贅言若干卷陞江西瑞州知府會歲饑盜起潤擒捕其渠餘悉逃竄境內以安陞四川按察副使備兵潘松甫至幕下騎士謀作亂潤廉得其主名陰授方畧擒斬之陞廣東右叅政卒於官

萬曆府志

閻士選字立吾江都人年十二能文章學臣耿定向拔置第一命隨試十四郡皆冠軍成萬曆庚辰進士仕蘄

水令以不附張居正扼抑十年始擢刑部主事多所平

反陞登萊道備兵雁門巨寇柳廷瓚倡亂以計平之晉

山西右布政使以勞瘁卒官

江都縣志

馬一駿字強吾江都人以選貢授安縣令初至以前宰

關茸吏侵庫帑逾萬株連追取邑無完家一駿惻然憫

之會臺司察其能委運松潘例有羨費駿曰是可藉手

矣盟諸神以羨金補庫三年而侵帑報完株連悉免以

卓異薦陞河曲知州安人祀之名宦

康熙府志

宋應圖字羲龍高郵人嘉靖乙酉舉於鄉謁選授招遠令清介自守無滯牘無冤獄退則侍母前甘脆承歡他

不計也五年報績馳封應圖曰吾榮親之願酬矣即掛冠歸優游林壑無疾焚香而逝

康熙府志

邱覺民字莘野高郵人太學生授常山縣丞敦樸無偽介而不苟令缺署篆一載以剩夫銀千八百兩請糴粟賑饑存活萬餘人課鹽例有羨入覺民盡蠲之當事廉其賢薦陞王府紀善邑人祀之名宦

康熙府志

盛稔字伯豐儀真人萬曆丙戌進士為戶部主事權濬關以廉覈歷遷正郎出知山西平陽府時站銀編額三十六屬率多匱屈稔查庫積七萬八千餘金蠲代之以蘇民困三藩祿羨約數千金皆不納但識原封發之巡

按以其事聞得特旨紀錄擢東萊兵備道值倭寇山左稔為備甚嚴蓄硝黃萬餘石倭平遷井陘叅政嚴勾稽增堡壘內控三關外禦九塞紓神京左臂憂有同年隸屬者怨請囑不遂構讒陷之例改調稔遂歸後褒前勩賜金綺於家復起用終堅卧不出惟杜門著書而已既歿二十餘年有寇攻東萊甚急賴稔所儲火藥退之奉旨追叙入萊郡名宦季子自今以諸生應例授河南修武縣丞張伯鯨督師武昌延入幕府叅贊遇賊難死義

儀徵縣志

此下已丑江都進士宗名

蕭灼如字茹一江都人由選貢授廣東潮州通判職司

糧民多逋賦灼如盡爲請免歲饑捐賑存活甚衆巡按周應期知其才所至以灼如從有疑難詢之立剖潮關有稅亦命代理灼如設匭中庭令自投不問羨餘巡按益重之將疏薦會灼如以積勞得疾告休卒祀鄉賢

康

熙府志

李思誠字次卿興化人少師春芳孫萬曆戊戌進士改庶吉士授編修出爲福建屯鹽道時權璫高宗橫暴激民變思誠挺身諭衆亂乃定遷浙江溫處道以計擒海中劇賊百餘人有武弁欲叙軍功陞叅戎納千金海錯中立麾却之陞江西按察使劉忠烈縉以死封疆功應

世襲縉子吉幼其弟行金直指謀以子代襲思誠力持不可以去就爭卒予吉進浙江右布政使尋內召累官至禮部尚書加太子太保逆璫魏忠賢方用事工部尚書崔呈秀其腹心黨也先是建三殿忠賢出省工思誠不與言殿成設宴又用舊制不列忠賢座忠賢大慚恨會有懷來兵備邱志充者以三千金屬呈秀謀轉京卿跡露下東廠忠賢掌東廠欲爲呈秀解脫而方怨思誠卽移其贓於思誠而命許顯純雜治之顯純故駙馬子家富初信王擇妃周后與顯純女俱在選顯純行賄內外事幾就思誠以故事無戚里重姻者力請冊周后顯

揚州府志 卷之二十九  
純銜之至是希忠賢旨鍛鍊成獄忠賢矯旨奪職追贓  
中外寃之崇徵初御史吳尚默等交章奏雪未幾卒著  
有真懶齋集 興化舊志

黃建中字良甫興化人萬曆戊戌進士授南陽府推官  
甫下車立置一獐掾於法姦吏震懼屬令密餽金杖其  
使令卽解綬去以艱歸服闋補金華署府事籍羨餘千  
金貯之庫代者至以金還建中固拒之留爲公費擢南  
戶科給事中疏湖州利弊五條上之得旨著爲令復革  
汰湖役餼資節省繕修諸費積四萬餘金歸於朝未幾  
攝兵科尋攝六科有御史致千金於建中家聞之馳書

戒其子令勉爲清白吏子孫趣還之在垣知無不言經  
畧熊廷弼有邊才中朝黨人以其不附已羣擠之建中  
抗疏言廷弼才可任羣臣不得以私鬪悞國事由是怨  
者甚衆以內計誣罷後起大理評事轉禮部主事未至  
官卒所著有留垣諫草 興化舊志

劉永澄字靜之寶應人年八歲讀文丞相天祥正氣歌  
設位晨夕拜登萬曆辛丑進士改順天教授遷國子監  
學正雖官間曹日討論累朝典章名臣言行凡六曹九  
邊職事掌故形勢阨塞迨兵馬錢穀之數皆得其要領  
與顧憲成高攀龍劉宗周文震孟友善座主李廷機爲



禮部尚書奉詔條弭災數事永澄規以開言路語甚切直大學士沈鯉數諮時事永澄引狄仁傑處張昌宗張九齡處李林甫故事權奸聞而惡之時督漕侍郎李三才雖與東林諸正人親善然性豪侈供帳陳設甚盛聞永澄至盡撤之其見憚如此陞兵部職方司主事未任卒震孟爲之狀攀龍誌其墓宗周著淮南賦弔之

參家

傳縣志

鄭茂華字實符江都人萬曆甲辰進士由部郎出爲浙江按察副使時溫處多寇茂華至皆望風遜進廣西布政使廉潔不侵一緡時靖藩爭立三司慮變茂華諭以

大義立解天啓間魏璫煽虐所在立生祠惟廣西不應其強項如此崇徵初舉卓異召對平臺稱旨陞副都御史巡撫廣西有土司陰謀起釁茂華指授方畧殲其渠魁諸桀驁者咸遵約束考績晉通議大夫御書天下清官於屏尋命擢兩廣總督以病乞休溫詔慰留者再歸里杜門未嘗營田宅卒贈正議大夫兵部侍郎廣西祀名宦

江都縣志

史啟元字蓋卿江都邵伯人萬曆甲辰進士授南戶部督淮閘稅尋移南吏部天啓初擢湖廣按察副使備兵衡永會岷藩有變中使往勘羣宗譁甚啟元至數語折

服遂定岷封粵寇闌入楚境啟元於廣贛孔道設木蘭  
臘嶺二關募兵守之賊不得奔逸殲其渠魁脅從解散  
境內獲安被病乞休歸卧林下嗜書法臨池不輟卒祀

鄉賢 康熙府志

馬呈秀字君實其先大同人隨父業鹽筴籍江都呈秀  
早孤嗜學登萬曆甲辰進士未拜官即疏請終養服除  
官大理寺評事凡奏疏諸牘援引經傳同列悚服出知  
延安徇賊入禁親督兵捕擊擒其渠魁治延五年收復  
流民萬戶墾荒田數萬畝入其租為民充逋賦尚書趙  
彥稱之陞福建按察使副使擒礦盜有功祀福建名宦

康熙府志

魏應嘉字賓吾興化人萬曆甲辰進士由汝南府推官  
擢兵科給事中抗疏請立東宮著有丰采以劾經畧熊  
廷弼落職後廷弼逮復其官累遷至兵部左侍郎尋罷  
歸里居三十年著述甚富歲饑詣兩臺為鄉人請命質  
寇帔剔帶金市粟以賑預自刻期沐浴具衣冠端坐而  
卒 叅郡縣志

王繼美字元玉興化人萬曆甲辰進士知福建順昌縣  
縣居劍州上游山水暴發漂民舍動至數千家繼美多  
造舟募善水者救援無算以忤巡按罷歸久之補江西

貴溪縣又以失撫臣指謫松江府學教授進南雍助教  
陞刑部主事轉戶部郎中總理密雲糧餉時遼初失守  
人心震驚多不敢進繼美朝聞命夕戒途至密建議謂  
海內困於加派宜省冗濫清侵冒以寬民力按籍稽核  
剔逃亡得清省銀米二十餘萬并掃除銀三千兩歸諸  
朝前後受事者畏其軋已壅不上聞繼美抗言於部大  
司農爲之失色京師稱鍊郎中云科臣解學龍疏稱繼  
美視國如家宜優擢爲賢者勸超授山東布政司叅議  
備兵兗東東齊久經白蓮賊蹂躪繼美念捕者以斬級  
爲功率多無辜檄郡縣吏殲渠魁其脅從悉原之與大

吏主勦議不合疏調簡繼美自以通籍久不得行其志

徑拂衣歸卒於家

康熙府志

朱家民字同人江都人以祖戍滇南遂家曲靖萬曆丙  
午舉雲南鄉試爲涪州知州天啟二年官貴陽知府安  
邦彥反圍貴陽家民乞援兵解其圍撫傷殘招流移寬  
徭賦遠邇悅服丁父憂奪情擢安普監軍副使加右叅  
政崇徵時就遷按察使左布政以平寇功加俸一級久  
之致仕卒於家自邦彥始亂雲貴諸土酋盡反攻陷安  
南等十六衛雲南路斷其後路雖通羣苗猶出沒爲患  
家民率叅將許成名等計平盤江外阿野魯頗諸塞於

是相度盤江西坡板橋海子馬場諸要害築石城五宿兵以衛居民帝嘉其績皆錫以名家民又於其間築城六廨舍廬井畢備羣苗惕息道途晏然盤江居雲貴交兩崖壁立水深無底廣三十餘丈家民仿瀾滄橋制置鐵索鐵柱橫木爲橋建鼓樓築月城以護之遂爲永利本傳

康熙志云家民知涪州舉卓異轉潮州再移真定舉邊才擢貴陽守爲按察時讞獄多從末減囹圄皆空進左布政節省帑銀六萬兩築十一城修山路千餘里崇徵庚辰入覲賜金帛叙功推宣大巡撫以老乞

休子潮遠官漳州都督

王納諫字聖俞江都人萬曆癸卯鄉試第一丁未成進士授行人出使榮藩辭樂郤餽榮世子敬禮之以疾假歸家居二載吏部司官缺人爭營之尚書某曰吾知有下帷著書不干進者王君可任也起爲吏部主事力疾赴召五閱月歷四司疾益甚復請告歸里匝月而逝所著有四書翼註

江都縣志

賈先春字汝後高郵人萬曆丁未進士授山東德平知縣時苦旱蝗流民載道先春招集流亡墾闢荒土民賴以安折獄平允久之囹圄空虛調繁秀水按臣奏仍留

德平民如慶更生考滿授試御史與左光斗楊漣繆昌  
期相友善舊制內批奏准有不宜行事輒令科臣封駁  
時久革不行春上疏請復封駁并疏請禁宦官不許識  
字一依洪武故事無何病沒楊左諸公爲之殯得扶櫬  
歸里

高郵州志

李茂英字君秀寶應人萬曆辛亥進士授分宜知縣調  
清江邑大水自贛江達渝水決百餘里民不得耕茂英  
發常平粟賑之又請減田租民猶饑甚數鼓譟諸大姓  
將爲變茂英懇諭富人出粟貸饑者俟歲熟官爲責償  
民始定富人獲全遷順德同知歷刑部郎中嘗恤刑淞

江平恕多所全活有以賄求未減者不許擢通政司右  
叅議轉右通政會魏忠賢害諸正人遂疏乞骸骨歸

寶

應縣志

吳牲字鹿友興化人萬曆癸丑進士除邵武令有清正  
名司理周順昌稱之舉卓異第一調繁晉江丁外艱已  
未補濰縣時責登萊諸郡縣海運米豆牲調度有方民  
無所苦尋大荒民死亡過半爲撫綏之不一一年復其舊  
壬戌擢山西道御史巡視節慎庫劾尚書姚思仁不應  
以修園陵開例鬻官又疏請視學薦鄒元標馮從吾文  
震孟丁卯以忤璫革職時璫輯三朝要典欲文致牲死

揚州府志 卷之二十九  
罪會熹宗崩乃止莊烈帝立起補山東道御史請定媚  
璫諸奸罪案已巳出按河南糾貪吏疏捐加派誅大盜  
吳思慎等庚午奉勅賑撫延綏饑民又奉命按陝極言  
招撫大誤甲戌陞山西巡撫賊首活地草鄉里人顯道  
神等以次撲滅上遣內員督開礦稅間架并力諫止特  
糾御史孫振大貪革職壬午入閣辦事救黃道周復其  
官上廷杖姜採熊開元及處劉宗周并爲疏救癸未詔  
督師湖廣討賊牲受命以待唐通兵遲行忤上意致仕  
無何武昌破上震怒逮至京擬戍金齒鼎革後閉戶著  
書卒於家 鄒漪野乘

本傳云牲巡撫山西歷陳防禦邊寇練兵恤民四難  
及議兵議將議餉議用人四事每歲暮扼河防秦豫  
賊連三歲無一賊潛渡以間修築邊牆大盜賀宗漢  
劉浩然高許皆前巡撫戴君恩所撫擁衆自恣牲陽  
爲撫慰而密令叅將虎大威劉光祚等圖之以次皆  
被殲牲行軍樹二白旗脅從及老弱婦女跪其下卽  
免死全活甚衆在晉四年軍民戴若慈母

解學龍字石帆興化人萬曆癸丑進士歷金華東昌二  
府推官天啟二年擢刑科給事中遼東難民多渡海聚  
登州招練副使劉國縉請帑金十萬賑之多所乾沒學

龍三疏發其弊國縉遂獲譴王紀忤忠賢削籍學龍言紀亮節弘猷宜召寘廊廟失忠賢意不報已劾川貴舊總督張我續貪淫漏網新總督楊述中縮朒卸責帝不罪又言兵餉日多宜度文武職官冗者汰之歲可得餉數十萬裁冗吏核曠卒衛所應襲子弟襲職而不給俸又可得數十萬京邊米民用其六官得其一莫如修屯政帝亟下所司而議竟中格五年御史智鋌劾學龍爲東林鷹犬遂削籍莊烈帝立起歷戶科都給事中以民貧盜起請大清吏治尋劾蘇撫王應豸尅餉激變又上足餉十六事帝皆採納再遷太僕卿五年改右僉都御

史巡撫江西四方盜賊蠡起江西獨無重兵學龍以爲言詔增置千人都昌萍鄉盜發並討平之封山妖賊張普薇等擁衆橫行合閩兵夾擊乃滅十二年擢南兵部右侍郎明年將解任遵例薦舉屬吏井及遷謫官黃道周帝怒詔下獄責其黨庇廷杖八十尋竟坐遣戍福王立召爲禮部尚書時方治從賊之獄仿唐制以六等定罪而馬士英阮大鍼視賄爲出入案久不決學龍議定其罪每等若干人又有身留北京俟後定奪者與另存再議者備列姓氏乘士英注籍上之且請停刑遂獲俞允士英聞之怒大鍼暨其黨張捷楊維垣聲言欲劾學

揚州府志 卷之二十九  
龍朱國弼張孫振等力詆之遂削籍學龍歸南都旋失  
未幾卒於家 本傳

張伯鯨字繩海江都人萬曆丙辰進士歷知會稽歸安  
鄞三縣崇徵初稍遷戶部主事出鎮延寧二鎮軍儲自  
黃甫川西抵寧夏千二百里不產五穀芻粟資內地賀  
蘭山東抵花馬池素沃野亦荒蕪甚伯鯨疏陳其狀爲  
通商賈轉菽粟又仿邊南市鹽意立官市法以招之軍  
民稱便盜起延綏伯鯨叅巡撫籌畫俘獲渠魁不沾泥  
遂擢兵備僉事又破斬賀思賢一座城金翅鵬等巡撫  
陳奇瑜上其功進右叅政及奇瑜遷總督遂擢伯鯨右

僉都御史代之伯鯨涖延綏久視民若子以拾遺論罷  
民大失望尋論功起用召爲兵部添設左侍郎攝尚書  
事以疾乞休南還福王立伯鯨家居不出

國朝順治二年大兵南下圍揚州與史可法分城固守城

破自經死

本傳

野乘云伯鯨爲鄞縣時鄞濱海故斥鹵地民貧多宦  
伯鯨下車躬自相度知鹵水入晦澮禾立槁乃教民  
築堰埭均蓄泄遂爲百世之利鄞俗主母刑婢妾輒  
加針於乳每數十櫛比伯鯨聞而痛治之習遂革鄉  
人有占人兆宅者恃巡方御史爲援他守令或阿私



伯鯨不可御史稱其惠而有義巡撫延綏密籌設伏  
殺西人無算敵喪胆終其任不敢窺邊乙酉之難倉  
卒身隕妻韓氏冢婦郝氏同及於難

姜士望字宗林儀真人幼以孝友聞兄里望有目肯出  
入常肩負之萬曆丙辰成進士授中書舍人爲相臣葉  
向高所知時兩廟覃恩凡誥軸餽遺皆却不受省中舊  
多藏書士望每搜羅編次之奉使冊德藩王以暑溽狃  
便裁禮士望力爭之秩滿當遷太宰左右有招致之者  
不往曰昔人恥爲呈身御史我豈爲私謁曹郎謝之歸  
養母喪服闋補稽勲司主事遷驗封謂人曰此要津實

羶途也吾懼甚遂引疾代者例有酬峻拒之是時大璫  
魏忠賢方張璫黨崔呈秀巡按淮南士望以部下曾不  
一過門狀崔銜而構之將中以禍卒不能返里清約端  
恪布袍蔬食無異諸生

儀徵縣志

倪啟祚字允昌江都人萬曆己未進士改庶吉士授編  
修同館姚希孟顧錫疇皆重之天啟間逆閹魏忠賢毒  
虐善類啟祚方在告聞之憤甚草疏論其奸狀會遘疾  
不果上旋卒

康熙府志

解學夔字章卿興化人天啟壬戌進士授福建沙縣知  
縣巡撫薦治行第一擢吏部主事陞文選司郎中銓選

維公不受一錢一時名傾朝右後爲權要所中調大理寺右寺正恤刑浙江全活者甚衆時有夜餽白金數千兩求改重辟者堅却之報政歸圖書一橐而已崇徵四年河堤大決五年又決同御史吳甦合疏入告奉嚴旨重究河臣河堤因之鞏固三十年內七州縣百姓不爲魚者由此也歷陞廣東兵備副使勦海寇劉香老叙功晉二級以師中積勞成疾告病歸終於家祀沙縣名宦興化縣志

喬可聘字君徵寶應人天啟壬戌進士授中書舍人時魏忠賢勢方張卽請告終養崇徵改元補前官中書事

少日夜與劉宗周黃道周倪元璐馬世奇陳龍正諸人切劘問學吏部侍郎張捷嘗薦呂純如爲本部尚書帝以純如在逆案中不許給事中呂黃鐘遂薦捷爲之可聘乃上疏言逆案乃陛下所欽定百世不可改易臣聞道路之言羣小方輿金載寶欲翻此案今觀捷舉純如黃鐘卽舉捷則前言可驗矣羣小猶黨逆於溷濁之世而黃鐘獨黨逆於清明之朝捷罪浮於逆案諸人黃鐘又浮於捷不蚤折其萌大禍自此始矣疏上可聘聲望大著黃鐘迄外轉閣臣溫體仁頗畏忌可聘欲致其到門投一刺竟不肯往坐是滯留十年始考授監察御史

陳官守言責疏帝嘉勞焉巡按浙江士大夫下訖吏民俱相戒勿犯喬御史可聘外剛內和不尚刻礮詭激之行雖與東林人往還及臨事是非可否不肯雷同嘗出行舟阻水漲求緯夫不得蘭谿知縣盛王贊持手版立雨中大聲言民方耕令請代之可聘乘輿冒雨去人疑其怒而可聘卒薦之既而可聘緣事降官遂謝病福王立仍起御史數言罷廠衛停燕飲君臣交傲以圖中興之治皆不省後又上疏論治兵亦不報

王師下江南可聘棄官歸終於家

汪琬喬御史傳

徐耀字蓼莪泰州人崇徵戊辰進士知龍溪縣收海寇

劉香老功著八閩歷禮科都給事疏凡數十上摘權要朋比無所畏避分校禮闈所拔皆奇士進太常卿終都察院右僉都御史泰州嘉靖時自江南飛派鳳米萬石民苦之後遂爲例耀特疏奏請得豁免州人賴之卒賜祭葬贈副都御史

泰州舊志

俞都美字士中江都人由廩例入太學授安州州同州瘠而多水都美爲治隄梁歲饑捐俸以賑攝定興縣篆嚴絕苞苴時客氏子弟狂橫里中以幣交都美毀刺笞其使聞者危之隨乞休歸草衣蔬食清介逼人

江都縣志

姚思孝字永言江都人崇徵戊辰進士改庶吉士授兵

揚州府志 卷之二十九  
科給事中首陳保固民心一疏言甚剴切又疏糾輔臣  
奪情罷歸後起太僕寺卿尋晉大理寺卿丁父艱返里  
思孝在諫垣前後上八十餘疏皆昌言讜論時望歸重  
焉 康熙府志

閩汝梅字和陽江都人布政使士選子崇徵辛未成進  
士卽署門自戒不預外事授陽穀令居官清慎擢刑部  
主事初汝梅舉於鄉時知府劉鐸以詩觸魏闈被逮人  
莫敢往汝梅獨省焉鐸貧爲緹騎所窘歸質百餘金以  
贈又勸紳士爲助有願輸金不書名汝梅哂曰有不測  
我獨任之奚慮焉其忠直尚義如此 江都縣志

李長倩字維曼興化人少師春芳曾孫崇徵甲戌進士  
性豁達以忠義自許居官勤敏力鋤强暴初授歸安知  
縣有貲郎恃姻黨與援橫於里中民患苦之長倩廉其  
實跡捕繫獄權貴請乞書盈案不一啟視巡按御史欲  
寬之亦不從卒抵法在任五年舉卓異第一至京當權  
者以前事銜之乃遷主事教習駙馬都尉鞏永固永固  
殉國難最烈人以爲稟長倩之教云後長倩以副使視  
福建學政亦以憂勤國事而死閩人哀之有奏疏及存

懶齋集

興化縣志

李清字暎碧興化人少師春芳元孫也崇徵辛未進士

由寧波推官擢刑科給事中熊文燦撫張獻忠清論其失策言後皆驗以久旱請寬刑忤旨貶浙江按察司照磨未赴憂歸起吏科給事中俄出封淮府國變得不與福王立復命南京進工科都給事中請追諡開國名臣及武熹兩朝忠諫諸臣於是李善長等十四人陸震等十四人左光斗等九人並得諡遷大理寺丞南都失守清方奉使祭南鎮復不與歸而著書以終

本傳

興化志云清在吏部上言諸臣持門戶於內不若奠封疆於外門戶之鬪兩敗之道宋洛蜀朔黨可鑒宜量懲一二人以靜議論不報清於史學最爲專勤纂

述近百種其中史論史畧正誤女世說已行世南北史南唐書合証十餘種藏於家

李時開字黃白儀真人天啟辛酉恩貢崇徵時授蜀儀隴令地比苗洞俗獷悍難治徵輸尤艱開至以廉正取信於民積逋有六七載者勸之輸恐後流賊五萬餘驟由漢中奔蜀抵儀隴儀隴故無城開率士民退保縣後山上壘土石爲砦凡六日粒皆絕但令取麥花與士民同茹得不死開猶韎韐小帽身率勁民馳射賊中賊始却事平理官李良基按視隴無恙求賂開不應以囚有越獄者譖於巡按使劾之開檄囚囚還按使亦悔然疏

已行矣罷歸舟車皆不能具時故儀真令王伉家居濟之始還閉戶著書撰毛詩解意三百五篇隴民繪開像祀之有歲事禱則立應

儀徵縣志

魏應星號弁山興化人以副榜貢授雲南趙州通判署州事土寇犯境庫無寸兵日晡下令家輸鐵一筋竟夜督造達旦戈戟林立賊望風遁署鄧川州鄧城為蛟鬻遷於山無城郭應星相山之凸坳者削平之勢遂壁立州距鶴慶麗江僅十里餘而古道迂曲行旅終日不得達應星捐金市油豆縱火十餘日夜道遂通來往便之稱魏公路焉

興化縣志

韓宗愈字斗望寶應人崇徵七年拔貢授安化知縣妖民黃邦明叛郡邑震恐宗愈修戰守備募死士用間出奇卒擒戮之遷銅仁府同知會諸苗煽亂獲其渠魁釋而不殺遣歸諭黨眾苗患悉平擢知府尋罷久之歸田里卒

寶應縣志

顧士奇字伯常興化人以拔貢授江華知縣江華屢被賊圍士奇內撫民獠外措兵餉威惠大行賊遂解去有府吏為姦誣一薦紳子奪其瑩域持府牒下江華士奇身至其處吏訴曰此有碑記在土中士奇令昇碑來破之又令昇土中他石來亦破之曰此濕被燥殆爾埋之

土中耳吏卽首伏時寧遠永明兩令皆貪墨與士奇同  
謁巡按巡按命左右解兩令印以授士奇攝其事兩令  
愧欲死而士奇廉能之聲震於全楚會母喪去任三邑  
之民號泣馳送百餘里服闋補浙江太平縣未任卒所  
著有檀兮樓集 興化縣志

韓如愈字唐山興化人崇徵辛未進士授貴州安化令  
土司安某與總兵殷朝陽有郤誘至家霍其目殷訟於  
官安輦重賄徧營黔大吏獨如愈叱弗受力請抵法竟  
削其秩辛巳奏最入都上親策以兵食大計稱旨擢工  
科給事中督漕江西奏真人張應京不宜賜第京師時

論躉之陞兵科右給事中時戎政不修而封疆告急如  
愈巡視京營稽核隱冒無所徇山東總兵劉澤清數失  
事陰使人刺取兵垣章奏如愈疏發其奸下其人於理  
澤清恐走書幣請解如愈詈而麾之澤清大恨後出都  
澤清遣麾下要於道遂遇害如愈廉直敢言不畏強禦  
天下惜之 康熙府志

興化志云時東林浙黨皆以門戶相爭如愈大書其  
堂曰見地一分南北卽是小人脚根不着東西方爲  
君子黨人悚愧

徐葆初字元赤江都人崇徵甲戌進士例授部主事以

親老乞改南工部時流寇毀鳳陽陵寢尅期復建佑費四十餘萬金工部尚書劉定國疏薦葆初督工役未三載竣工止費二十餘萬金朝廷嘉其廉幹擢本部郎中

康熙府志

宮繼蘭字貞吉泰州人崇徵丁丑進士授工部都水司主事時建烽臺重城衆皆退避大司空劉遵憲知繼蘭才望委以專督節簡甚多視河夏陽倡議築城卒如其議出知兗州府究爲藩封重地繼蘭嚴於立法親族莫敢撓清宿逋錢糧至二百六十三萬有奇當事欲薦繼蘭備兵兗東以母老請養歸嘯咏邱園者踰二十年復

起羅定兵備不赴卒於家祀鄉賢及兗府名宦

康熙府志

鄭元勳字超宗先歛人家江都崇徵癸未進士以母老家居甲申三月聞變痛哭出家資募勇俠貽書營道謂宜建大帥統精銳以守河北會福王立興平伯高傑鎮揚州傑與元勳有舊揚民喧傳元勳招傑來必蹂躪我因閉城拒之傑怒掠城外將攻城元勳單騎入傑營曉以大義傑爲心折曰前事特別將楊成爲之爾出禁令退舍且誅楊成而揚民誤傳爲揚城矣時巡撫黃家瑞等會議於南城樓揚民洵洵持杖環列元勳至下馬就坐爲言城外事由楊成語未畢而聞者遽升樓攢刃害



之督師史可法斬倡亂者三人頭以祭元勳逾三日有兵部職方之命而元勳已及於難

李清鄭職方傳

傳又曰元勳年二十一舉天啟甲子應天鄉試第六時弟元化子爲虹生甫彌月一嫗抱而前曰昨得異夢他年小郎君當與主同作忠義進士叩其詳媪不復言至崇徵癸未會試元勳始與爲虹同榜後元勳遇害爲虹亦以監察御史巡視仙霞關殉難嫗所云果驗焉

國朝王永吉字修之高郵人明天啟乙丑進士授大田令

累遷戶部郎以才望備兵通州州多大俠亡命憑內璫

爲不法王永吉嚴治不少貸崇徵末巡撫東省尋遷薊遼總督

王師定燕召王永吉授大理卿陞工部侍郎以辭職違例罷歸

尋召爲戶部左侍郎入見上十三疏皆允行晉兵部尚書轉左都御史拜祕書院大學士規畫大政凡十七事旋以公事左遷爲倉場侍郎條上十九疏僉報可復進國史院大學士加太子太保兼領吏部尚書上銓政二十餘疏多著爲令以科場事自劾左遷太常少卿擢左副都御史卒於官贈少保兼太子太保吏部尚書諡文通

康熙府志

宮偉鏐字紫懸泰州人明副使繼蘭子崇徵癸未進士授翰林院檢討入

國朝兩以薦舉起用援獨子終養例乞休歸築春雨草堂於小西湖遺址扃門高尚惟以著書爲事雖親朋罕觀其面著有春雨堂集五十卷泰州續志亦所手輯以子夢仁貴累贈光祿大夫

康熙府志

陳卓字懋修江都人順治丁亥進士由刑部郎遷四川提學僉事時蜀新定諸生文業荒廢卓出所攜經籍令諸生傳寫轉相教授由是文風日振按試保寧值賊劉文秀猝至卓乘城分守拒却之叙功擢陝西臨鞏道副

使覈驛傳侵漁之弊復官商分茶之法辨部民授逆狗

僞劄者民咸德之擢湖廣叅政告歸卒祀鄉賢

康熙府志

車從軾字五車江都人以明經授太平府訓導郡值兵變御史毛九華委從軾守陴禦敵動中機要兵燹之後修文廟樂器及補輯尊經閣藏書課士從軾皆預有力

焉

康熙府志

孫宗彝字孝則高郵人少負雋才性骨鯁以天下爲己任中順治丁亥進士授祕府中書累遷吏部考功郎中清嚴峭厲凡內外官餽遺槩却不受時有以城工授職者宗彝力持不可爲堂官所恚遂誣陷之幸獲免尋外

陞薊州分巡道副使予告歸念切桑梓誓除民疾苦高  
郵徭役爲民切膚害者有六曰優免馬差房差田差現  
催丁差宗爨力請當事設法捐除永著爲令民至今便  
之所論河工要害宜開海口堵六壩聚清水刷黃水爲  
淮揚治水石畫終以剛致禍被逮削籍卒於獄子弓安  
孫濩孫曾孫中俱舉於鄉

高郵州志

朱克簡字澹子寶應人順治丁亥進士授中書科中書  
擢監察御史巡按福建時海寇方熾首請仙霞嶺增兵  
築漳浦等處十餘城爲瀕海諸邑保障按巡至興化見  
流民載道疏請發粟賑濟更親加檢察官吏畏憚民沾

實惠念漳州殘破尤甚疏請連蠲兩年租賦民慶更生  
至汀州甫數日忽報省城被圍克簡卽率兵兼程赴援  
乃與巡撫各官殫心防守數旬不懈官軍告捷省城獲  
全時大帥駐漳海上擒獲者輒戮之克簡察知沿海居  
民多被俘掠請驗其髮短者從寬編戶爲民活者萬餘  
人泄閩止一年疏凡數十上如汰冗弁革帶辦禁株連  
蠲鹽課恤驛困諸疏懇惻剴切皆蒙

允可歸田後築環溪草堂博覽史籍至老不倦著有奏議四

卷政畧二卷

寶應縣志

李宗孔字書雲江都人濂之子也登順治丁亥進士由

揚州府志 卷之二十九  
部郎授御史改給事中在臺垣先後疏凡四十餘上皆  
關吏治民生每同九卿奏事侃侃直言不附不阿後請  
假歸康熙三十八年

翠華南幸卽家晉大理寺少卿

御書香山洛社額以寵異之子錦鑰孫夢昂同聲皆先後登

科第 江都縣志

陳忠靖字爾位泰州人順治丁亥進士由中書科中書  
擢刑科給事中首陳早舉

經筵速差恤刑二疏皆報可時揚郡下河疊罹水患賦額  
不供部議擬分年帶徵忠靖疏言臣鄉頻年饑饉雖帶

徵無益惟懇全蠲以廣恩卹辭甚剴切得荷

俞允後以建言左遷歸里養父操几捧杖恂恂如孺子時生  
平著述極富以疾卒於家 泰州志

石瑋字雯豐興化人順治丁亥進士任漳州府推官有  
德政漳人稱爲石佛時海氛未靖洋艘環伺境上瑋竭  
力守禦賴以無恙旣補東昌不數月遷兵部郎尤有聲  
出守順德郡人相慶曰吾土隣東昌久稔司理治狀以  
惠東昌者惠吾土幸矣未抵任卒於京邸 康熙府志

孫自成字物皆江都人順治丁亥進士知福建歸化縣  
時閩廣初平旁邑多爲賊壘自成蒞任甫數月招徠七

揚州府志 卷之二十九  
十餘寨民得休息事耕桑歸里遇桑梓利弊秉公直言  
所著賦役管窺一帙言江都田賦最切要至今採擇之  
江都縣志

徐烜字符禺興化人順治己丑進士時兩廣初入版圖  
遴才能官撫綏烜甫釋褐卽授廣東督糧叅議時

王師集粵東烜備糗糧供芻茭大著勞績遷陝西叅政立州  
縣更番轉運之法士馬藉以飽騰官民胥便晉山東按  
察使獄囚多誣枉滯數十年不能理烜訊出之咸懽躍  
慶更生臬司堂前有松栢久枯至是復榮父老傳爲烜  
祥刑之驗云轉山西右布政遷貴州左布政復補廣東

以丁艱歸卒於家

興化縣志

趙應翰字述陽興化人順治己丑進士從

王師征粵西授分守道屢擢霸州叅政往例閱兵兵各斂錢  
爲使者費而供億仍責之州縣應翰至一切革除軍民  
安堵值計典惟以直道甄別賢否毫無瞻徇以勤勞致  
疾乞休歸里

興化縣志

鄭爲旭字方旦本歙人世居江都順治辛卯拔貢授中  
書舍人遷工部主事擢御史巡視東北兩城掌京畿道  
多所建白如選官須加驗看視學應遣詞臣申講讀律  
令之條以厚風俗分進士舉貢援例班次以疏銓政臬

揚州府志 卷之二十一  
司遇命案不得率結罪人發遣減等者卽中途遇赦并  
在部未結諸人皆應照例寬恤等疏俱次第舉行卒祀

鄉賢

江都縣志

郭礎字石公江都人順治壬辰進士授戶部主事歷知  
順德府府東北有古大陸歲漲爲田廬害礎至先挑牛  
尾河三百餘丈漸濬大郝黃楊諸口自是夏無橫溢其  
積水可灌田數萬頃邢臺南和各屬邑皆賴之又修學  
宮備祭器時與諸生論文課藝士民咸誦之

江都縣志

楊演字次羲興化人順治壬辰進士任邵陽知縣地值  
兵燹之後供億浩繁民生困敝演至均撥夫徭官養驛

馬設循環冊以稽出入歲省民費數萬及卒於官敝麓  
中惟圖書數卷而已

興化縣志

俞鐸字天木泰州人順治壬辰進士選庶吉士逾年授  
御史時值秋讞上疏停刑幾中危法巡按宣大疏罷監  
司之不職者又念淮揚數苦水患凡修堤勘災官每以  
供應擾民請單騎減從永著爲令疏入報可轉口北道  
叅議以估計獨石城工染疾卒於官

康熙府志

沈喬生字國望泰州人順治甲午拔貢授中書舍人歷  
處州同知保定知府皆有惠政擢陝西副使撫治肅州  
營辦軍需清勤自勵百姓安堵遠邇頌之以積勞成疾

乞休歸蕭然一身至不能給衣食有州守某稔其名屏  
騶從造廬訪之時屆嚴冬喬生棲敗屋中裹緇袍曝日  
守愕然曰固知公清貧誠不意一寒至此喬生笑謝而  
已終無所干請焉

泰州志

郭士璟字眉樞先世涇陽人遷江都順治乙未進士改  
授常州教授常士以逋賦株連被黜甚衆士璟按名清  
查得實爲免數百人遷助教晉工部主事督權九江潔  
已恤商廉惠並著差竣乞歸惟故友數輩論文賦詩以  
老生平敦孝友有餘俸分給兄弟及族人貧乏者晚年  
著作益多有雜體詩文十七卷子元鉅元鈺

江都縣志

高凌雲字尺木江都人順治戊戌進士授嚴州府推官  
折獄平恕人稱長者旋告歸閉門課子樂與後進講舉  
子業決科名驗如卜筮焉凌雲爲諸生時家貧甚假館  
授徒迨登仕版食貧如故人益賢之子天驥康熙辛酉  
舉人官山陰知縣

江都縣志

金懷玉字式如江都人順治戊戌進士授泉州府推官  
時海氛未靖沿海州邑數十里外築牆爲界有踰牆出  
者以通海論懷玉至錄釋繫獄千餘人白上官曰此不  
過小民資漁利爲活者保無他也未幾弛禁人咸服其  
得政體遷瑞州府同知

江都縣志

吳元萊字北海明大學士牲子由中書歷部郎累擢直隸巡道以清廉著名吏民愛戴里居篤於孝友無私事干謁郡縣惟有裨於桑梓者力任其事邑遭水患多逋賦民苦敲朴舊有留抵糧餉為墨吏侵蝕元萊毅然發其狀幾為所中弗恤也里人德之卒祀鄉賢弟翔鳳博學能詩為士林所推

典化續志彙

鄭為光字晦中本歙人世居江都父俠如明季官工部司務以才能著為光登順治己亥進士選庶吉士授監察御史巡視中城能禁豪強出冤獄以州縣賦稅叢弊請設循環簿稽之剔揚州關鈔積弊及請科舉廣額收

推陞實效節鳳米浮費諸疏皆報可卒於官祀鄉賢

江

都縣志

詔求

陳志紀字雁羣泰州人父凝祉由鄉舉歷任湖廣糧驛道以勞績著志紀幼穎異工文章順治己亥成進士選庶吉士辛丑會試分校所得士皆名雋及授編修會有言志紀獨以翰林具疏劾天下督撫貪婪不法狀督撫并力營救志紀反為所中謫戍寧古塔貧不能自存乃習醫拯人以給饗殮卒於戍所

泰州志

陳以恂字長恭興化人康熙辛丑進士任平遙知縣嘗有富室兄弟爭財構訟恂單騎至其家諭以至情兄弟



揚州府志 卷之二十九  
皆大感動泣求改過和好倍篤所轄洪善驛額索民車  
供差使後改折銀民大受困恂為詳革民乃安堵其助  
勦山賊支應大軍竭盡心力不以分文派民以疾告歸  
杜門著書家貧衣食不足恬如也所著有周易心學篇  
春秋三傳合註檀弓解畧宋元明三朝史鈔共八十餘  
卷 康熙府志

王有容字遠度寶應人少侍東林高顧諸正人力學砥  
行有利物之志久之不遇鷹歲薦康熙二年選泰和知  
縣時年七十有八子凝鼎等阻其行有容曰余年雖老  
志存利物今得作親民官敢以老辭耶治泰和一年餘

却耗羨薄徭役修葺學宮及楊文貞羅文莊王文端祠  
卒之日泰和之人為之罷市 寶應縣志

劉梁嵩字玉少江都人有綸子幼有文名登康熙甲辰  
進士知江西崇義縣甲寅賊犯崇義孤城無援梁嵩募  
義勇身先士卒登陴固守擒賊七十餘人城得不陷境  
內以安以勞瘁卒於官 江都縣志

賈其音字叶六高郵人康熙癸卯與兄良璧同舉於鄉  
丁未成進士初任陝西咸寧知縣當吳逆蹂川咸寧為  
屯聚地

王師征勦供億旁午又初裁司李重案悉由縣官爰書判牒

揚州府志 卷之二十九  
三  
煩如蝟毛其音手自擘晝游刃有餘再爲浙江麗水縣地瘠民貧治一如初丁卯鄉試入浙闈分校夜宿公館有人從神龕中出袖中出小帖云當道所遣其音厲聲曰我從寒士起家荷

國厚恩今不遴選真才而敢蹈不法自開其實耶龕中人惶恐去已而榜頭出其房餘俱有盛名歸後卜築城東謝絕外事惟以厚鄉里卹宗親爲亟務著有雨香亭百

四樓倦還堂諸詩集

高郵州志

喬萊號石林寶應人可聘子康熙丁未進士授內閣中書舍人

召試博學宏詞改編修累遷日講官起居注翰林院侍讀

館閣代言之文後進遵爲模楷尤工史法爲同館汪琬朱彝尊等所推服奏對河工事上四不可議關淮揚民生休戚鄉人德之歸田後著易俟二十卷子崇烈丙戌進士翰林院庶吉士亦工詩善書

寶應續志藁

張問達字天民江都人明末爲諸生值史可法守揚州高傑以鎮將欲屯兵城內問達詣軍門力陳傑克悍擾民狀可法怒其阻撓將按以軍法有龔克初者從旁大呼曰此壯士不可殺可法遂召入論時事改容禮之康熙五年舉順天鄉試適有奏撤揚州兩東門城垣者部

議問揚人問達堅持不可乃止尋署休寧教諭遷知趙城縣多善政罷歸以講學終老

江都縣志

宮夢仁字宗衮泰州人偉鏐子十歲善屬文長益博極羣書康熙庚戌會試第一人選庶吉士改授御史多所建白疏十數上皆切中利弊尤諳河務因淮黃泛溢急請疏理海口且繪圖入告出爲河南督糧叅議補湖北驛鹽叅議晉山東提學副使皆清勤有德政累遷右副都御史巡撫福建察臺灣之勒派稽通省之盈虛禁人命之株連嚴兵餉之扣剋俱有功於閩疆逾年罷歸卒於家弟鴻曆丙戌進士翰林院編修孫雖乙未進士中

書舍人 秦州志

金相玉字水蒼高郵人康熙庚戌進士任保定新安縣知縣邑有巨盜王磐恣爲橫虐前令畏其猾黠不敢問相玉下車卽按捕寘於法四境肅然治內故有蘆葦水利久爲豪強侵占相玉理於上官力爭之盡復其舊聞高士杜紫峯名折節禮之爲邑人矜式未幾卒於官士民哀號咸歛賻紀其喪祀之名宦相玉好讀書自爲諸生至仕進手不釋卷著有地官十卷策畧全書尚書說約史漢纂禮記春秋纂秋齋詩文集若干卷

高郵州志

陳瑄字仲宣高郵人康熙庚戌進士初任四川遵義知

揚州府志 卷之二十九  
縣丁內艱服除起浙江昌化縣皆有廉能聲行取入都  
補刑部主事奉

命監通州大西倉通倉故多猾吏善以利惑上官因得恣意  
侵漁瑄至定斛面革科派簿籍清明無毫髮染擢戶部  
河南司員外郎轉山西司郎中歷官二十年橐無私積  
俸入不能贍孑身僦屋以居卒於官蕭然一窶士也人  
服其清白云 高郵州志

李柎字木庵興化人明少師春芳五世孫給事中清子  
也康熙癸丑進士選庶吉士授檢討歷宮坊閣學晉工  
部侍郎祭告南嶽旋奉

命督學兩浙在道聞母喪奔歸服闋就職轉戶部擢左都御  
史疏凡數十上其言河工如挑新河以疏清口聯木筏  
沉鐵釜以殺水勢塞顏家莊決口使黃流循行北岸毀  
雲梯關北壩使下水暢流入海又宜乘時深濬河底不  
致堤勢日高民居益下皆切中機宜先後報可他如論  
督撫覆奏不當詆毀言官巡撫察吏安民當許出境諏  
訪藩司宜停陞本省巡撫以杜虧空兵餉就近支放以  
便兵民撥糧儲海運以急拯東省饑民遴刑部司屬以  
慎重人命大案俱有關國計民生之大者秉憲五年以  
原官致仕卒於家

賜祭葬如例所著有大遠堂奏議文集藥圃詩集律例集解  
若干卷子炳石丁卯舉人曲靖同知 參誌銘奏議

張琴字桐峯泰州人康熙癸丑進士授內閣中書琴少  
時遭父喪適輪充河所里長河所花戶以船為家漂泊  
無定凡額徵麻膠皮羽菱蒲之屬皆責成里長自解部  
寺奏銷琴由是家業蕩然日則辦役夜則讀書入庠後  
復輪里長因走白臺使極陳困苦狀得邀咨題改折彙  
入地丁欸內官解自是河所六里永除積困生平尤留  
心經濟實學嘗著淮黃交會開濬海口諸議及曆法兵  
刑樂律漕運鹽法馬政屯田諸篇當事多採擇其言用

有成效 泰州志

許承宣字力臣江都人康熙丙辰進士選庶吉士授工  
科給事中首陳揚州水利賦役二疏剴切詳明大禱桑  
梓辛酉典陝西鄉試還京條奏晉間利弊六事上之并  
請刊

御製文集及廣捐修學宮之例悉見嘉納後假歸卒於家著

有詩文全集奏議若干卷先是承宣父明賢倣儻多才  
畧兄承宗善紹父志視兩弟極友愛今明賢承宗及承  
宣并祀鄉賢 江都縣志

汪楫字舟次先世休寧人遷江都官臆榆教諭康熙己

未薦舉博學宏詞

御試授翰林院檢討與修明史旋充冊封琉球正使既至宣示

天朝威德爲其國撰孔子廟碑默識尚氏世次撰中山沿革志瀕行例有餽贈楫概卻不受國人建郤金亭志之以才畧出知河南府置學田於嵩陽書院聘詹事耿介主其事擢福建按察使布政使治績尤著內陞京卿途次得疾卒於家祀鄉賢子寅衷能世其文學

江都縣志

成康保字安若寶應人康熙己未進士授中書舍人遷浙江台州府同知台山深箐密奸宄易滋康保飭聯保

甲摘發擒治盜賊屏息百姓安枕台衛屯田地多磽瘠又弁役需索承墾者寡康保招墾布惠數年皆成沃壤屬邑仙居額徵秋米撥解兵糧歲二千石山路崎嶇每米一石約費白銀一兩有奇康保署縣時詳請改折歲省仙民金錢無算又攝麗水凡盜案疑獄歲久不決者康保一鞠卽明沉寃盡釋一郡稱頌卒祀名宦

寶應續

志藁

劉國黻字禹美寶應人康熙壬戌進士選庶吉士改授戶科給事中晉都給事念天下田畝不一賦役不均或田少而賦重或田多而賦輕疏請詳覆折數顯明畫一

揚州府志 卷之二十九  
刊載賦役全書以垂永久

上可其奏遷通政事叅議歷督捕理事官考覈則例刊布內外凡逃人根株連累勒取州縣官職名待劾者弊盡剔除由是督捕案牘濶稀

朝廷乃裁其官而改國敝爲鴻臚爲人和平篤厚凡疎戚貧宗無不收恤噓植後進不遺餘力雖早達不懈於學有詩文集若干卷子師恕庚辰進士內閣學士福建觀

風使

叅誌銘奏疏

吳世杰字萬子高郵人康熙乙丑進士少讀書不爲無用之學遇天下大計手指口畫皆能見諸施行當甲寅

三逆亂後江浙婦女被俘掠在金陵者至數百人髡面誓死道路酸鼻杰方辦入都挾三百金裝罄囊贖之不足仍募所知具舟計道里費次第遣歸諸婦女復得生聚庚申歲洪水入高郵城一晝夜高數尺老幼胥溺杰率民夫徒跣立水中壞所置房舍塞城決處水勢乃止全活數萬人乙丑水復至風雨暴作朽骨浮齒漂蕩蔽水面杰多賃小舟偏赴拯救水落復瘞埋流尸無算時州民就食郡城者多栖河干下濕上蒸慮死癘疫則出貲治藥餌市米麥以給不能歸者買舟送還故土郵舊苦役重有公正排年等名公私交困杰以書謁巡撫湯

斌媿媿數千言爲民請命斌廉得其狀悉捐除之歲省費鉅萬他若白寃表節恤喪扶孤皆爲人所不能爲者至今江淮間稱有用之學云惜未仕而卒著有甓湖草

堂詩文行世

高郵州志

張瑾字去瑕甘泉人康熙癸卯舉人知雲南昆明縣時吳逆初平民未復業瑾爲給牛種招墾荒地請開白沙清水馬裏三河灌之又於近郊三十里令種桑柘民資其利聽訟片言立折凡他郡疑獄上官悉下瑾理之將行取卒於官百姓哀號送喪者數萬人祀昆明名宦江都鄉賢子元幹歲貢生望江教諭孫祖雲庚子舉人

朱辰字劬孺寶應人康熙丁丑進士授浙江諸暨知縣諸暨田地濱湖歲憂旱澇辰夙諳河務爲倣南河規制於泌湖建石閘隨時啓閉以資蓄洩由是水利大興暨邑爲立生祠時巡撫趙申喬以辰清正極器重之郡守某與辰素不合且奉職無狀屢被巡撫督責守疑辰之下石也適有僧出入制府幕中守賄僧文致辰欵制府遂劾罷辰萬民爲之稱寃里居十八年尚書張鵬翮將以辰名列薦劾以年老婉辭卒於家

繆沅字湘芷泰州人曾祖欽明崇徵間以布衣伏闕上書歲免泰州浮糧一萬五千餘石沅生八歲卽能詩文



長而學業益富康熙己丑登一甲第三人授翰林院編修提督湖廣學政請託盡絕不染一私訓士子殫心經學每試一郡畢必與諸生會講三日而後去使竣改授給事中凡有關國計民生之事多所陳奏歷陞內閣學士奉

命平糶江西穀石察審山東案件皆稱公平再遷工部左侍郎轉刑部每閱爰書反復詳慎平反中全活甚衆雍正七年卒於官事聞

賜白金五百兩助其喪卹典有加子四人俱登科甲方覲字近雯江都人康熙己丑進士選庶吉士授編修

督學四川葺文翁講堂爲書院令多士肄業其中月給薪米費遠近就者甚衆雍正二年改授御史轉戶科給事中巡視船廠覲條陳事宜十一款皆報可使竣隨差管通州坐糧廳以勤慎著擢浙江按察使署布政使兼護理兩浙鹽政未幾晉西安布政使病已劇扶病就道至六合縣卒於旅舍奉

旨加太常寺正卿銜給帑金五百兩治喪仍

賜祭葬子夢駟庚子舉人

唐繼祖字序皇江都人詩之子素以博學爲名諸生康熙辛丑成進士改庶吉士授檢討轉禮部主事以薦擢

監察御史數有建白皆見施行陞工科都給事中巡南  
漕有功復使巡湖南北將還授通政叅議旋改鴻臚卿  
既入卽遣署河南按察使尋調湖北辨冤獄多平反爲  
楚人愛戴以病歸尋卒家無餘財鄉人稱之

揚州府志卷之二十九

終

揚州府志卷之三十

人物三

忠節

漢臧洪字子源廣陵射陽人舉孝廉補卽邱長中平末  
太守張超辟爲功曹時董卓圖危社稷洪說超誅之超  
乃與諸牧守大會酸棗設壇將盟而更相辭讓莫敢先  
登咸共推洪洪乃攝衣升壇搽血而盟辭氣慷慨聞其  
言者無不激揚自是之後諸軍各遲疑莫適先進超乃  
遣洪與劉虞共謀而值幽冀交兵行途阻絕因寓於袁  
紹紹奇之與結友好以洪領青州刺史遷東郡太守時

曹操圍張超於雍邱甚急超謂軍吏曰今日之事惟有臧洪必來救我或曰袁曹方睦而洪爲紹所用恐不能敗好遠來違福取禍超曰子源天下義士終非背本者也或見制彊力不相及耳洪聞超圍乃徒跣號泣將赴其難自以衆弱從紹請兵紹竟不聽超城遂陷張氏族滅洪由是怨紹絕不與通紹與兵圍之歷年不下使洪邑人陳琳以書譬洪洪荅曰昔晏嬰不降志於白刃南史不曲筆以求存故身傳圖像名垂後世洪投命君親策名長安夫復何言紹見洪書知無降意增兵急攻城中糧盡外無援救城陷生執洪紹盛帷幔大會諸將見

洪謂曰今日服未洪瞋目曰惜洪力劣不能推刃爲天下報讎何謂服乎紹乃命殺焉

後漢書

陳容廣陵射陽人少爲諸生親慕臧洪隨爲東郡丞袁紹之難先城未破洪使歸紹及紹將殺洪容方在坐起謂紹曰將軍舉大事欲爲天下除暴而先殺忠義豈合天意今洪本爲郡將奈何殺之紹慚使人牽出謂曰汝非臧洪疇空復爾爲容顧曰夫仁義豈有常所蹈之則君子背之則小人今日寧與臧洪同日死不與將軍同日生也遂復見殺在紹坐者無不歎息竊相謂曰如何

一日戮二烈士

後漢書

揚州府志 卷之三十  
蔣子文廣陵人漢末爲秣陵尉逐盜至鍾山爲盜擊傷其額死後吳主追封爲都中侯立廟祀之

明南畿志

梁來嶷字德山廣陵人幼有奇節侯景陷臺城廣陵太守祖皓在城中將見殺嶷乃說皓起兵討逆皓曰僕所願也死且甘心爲要勇士耿先等百餘人襲殺景黨董紹先及皓敗嶷并兄弟子姪遇害者十六人

梁書

隋來護兒字崇善江都人幼好奇節讀詩至擊鼓其鏜踴躍用兵羔裘豹飾孔武有力舍書歎曰大丈夫當如是安能久事隴畝羣輩壯其志賀若弼之鎮壽州也常令護兒爲間諜授大都督平陳之役護兒有功焉進位

上開府從楊素擊高智慧於浙江賊據岸爲營周二百餘里船艦蔽江素令護兒率數百輕艦徑登江岸直掩其營破之賊潰散護兒追至泉州智慧窮蹙遁走閩越進位大將軍除泉州刺史時盛道延擁兵作亂護兒進擊破之又破汪文進於黔歙進位柱國仁壽三年除瀛州刺史賜爵黃縣公大業六年從駕江都賜物千段令上千人家宴父老州里榮之數歲轉右翊衛大將軍遼東之役護兒率樓船指滄海入自沮水去平壤六十里與高麗相遇進擊大破之乘勝直造城下破其郭郭明年又出滄海道師次東萊會楊元感作逆勒兵與宇文

述等擊破之封榮國公十年又帥師渡海至卑奢城高麗舉國來戰大破之斬首千餘級將趨平壤高元震懼遣使上表請降尋有詔旋師轉左翊衛大將軍開府儀同三司江都之難宇文化及忌而害之長子楷以父軍功授散騎郎朝散大夫楷弟弘仕至果毅郎將金紫光祿大夫弘弟整武賁郎將右光祿大夫整尤驍勇善撫士擊羣盜所向皆捷賊甚憚之爲作歌曰長白山頭百戰場十五五把長槍不畏官軍十萬衆只畏榮公第六郎化及反皆遇害惟少子恒濟獲免

隋書

唐來濟江都人護兒少子也宇文化及之難濟以幼得

免轉側流離篤志爲文章善議論曉暢時務入唐擢進士累官同中書門下三品封南陽縣男遷中書令高宗將以武氏爲后濟諫曰王者立后以承宗廟母天下宜擇禮義名家幽閒令淑者副四海之望稱神祇之意武氏立銜之顯慶初兼太子賓客進爵爲侯二年兼詹事尋坐褚遂良事貶台州刺史久之徙庭州龍朔二年突厥入寇濟總兵拒之謂其衆曰吾嘗絀刑網蒙赦死今當以身塞責遂不甲冑而馳敵歿焉贈楚州刺史

唐書

宋沈攸字子宜楊子人建炎三年賊邵青犯真州攸攝揚子簿以狀白府乞以所糾士兵禦之賊勢張甚攸挺

身拒敵北門死之

嘉靖惟揚志

唐璟字用章楊子人父寔紹興間嘗領鄉兵拒敵馬鞍山獲功補官開禧間金人南侵六合至儀真將逼惟揚時璟總轄民兵親率子弟及所部強勇斷橋填堰謀決陳公塘以拒之塘隸轉運使擅決水者死罪衆欲請之官璟曰必待請豈能及事乃決水俾東與句城塘會接廣陵城南西連儀真南際運河北距岡隴平原曠野不日成巨浸敵騎登焦家山望而驚遁州賴以免臺府欲上其功將命之官以疾不就後權和州倅金人屠城遇害事聞贈官錄其子弟

儀徵舊志

吳駿發江都人紹定間李全攻揚州郡守募良家子守禦駿發應募賊平補將校後以轉戰有功累遷鎮江右軍統領元兵據盱眙宋遣兵攻之駿發爲前鋒建螯弧先登將一鼓而下會元援兵至駿發死之事聞賜恤甚厚

明南畿志

張琰字汝玉廣陵人身七尺修髯侗儻有節概宋末補州牙兵隨制置李庭芝潰圍赴行在爲追兵所及力戰死琰能詩皆忠憤所發

明南畿志

嵇聳高郵人所居名嵇家莊當文丞相天祥見逐於真州潛行至聳莊聳迎事於家修禮甚謹復津遣之使其

子與客伴送至泰州於是天祥得由通州航海達閩赴  
行在及工部侍郎柳岳奉降表於元道經嵇莊聳憤而  
殺之明學士程敏政嘗稱爲義俠有弔嵇莊辭

名勝志

龔準字溪文高郵人累官中奉大夫歷知長洲縣官至  
司農卿宋亡士大夫居班行者隨例北上準行至莘縣  
憤惋不食而卒

高郵舊志

元樂鳳高郵人任諸暨知州會方國珍叛總制謝再興  
謀襲城以應之鳳與妻永訣曰爲臣守國而舉城降賊  
非忠也吾得死國事足矣及賊入與其妻王素英俱罵  
賊被殺州人收其屍葬苧蘿山

高郵舊志

劉秉中高郵人授兩浙行臺御史方國珍叛秉中懷印

將走大都遇害

嘉靖惟揚志

王信字國寶父瑄元末爲淮南北義兵都元帥田豐作  
亂信從察罕帖木兒大破之還鎮沂州領沂國公印授  
江淮中書省平章政事明太祖命其甥顧師魯致書帛  
往說之不就羈師魯欲殺之徐達師至淮安復使人說  
瑄瑄佯許降上密諭達令勒兵趨沂州觀變達至沂又  
約瑄瑄又佯許之而閉門堅拒達遂進兵攻破其城勒  
瑄招降信瑄陰遣家將鄧春從間道語信且命之曰見  
當奮臂一呼以報國恩以雪父恥無以余爲念而以僞

揚州府志 卷之三十一  
書付使者信殺使者罵不絕口達遂殺瑄信走山西陰  
集兵再舉不遂避跡於興以憂憤卒其子孫占籍興化  
更其姓曰任 興化舊志

明王鼎儀真人為趙忠養子明初忠渡江從征有功沒  
於陣鼎襲其職復姓王命守太平陳友諒以重兵來犯  
城中僅守兵三千鼎與花雲竭力堅守友諒攻城三日  
不下引巨舟泊城西南士卒緣舟尾攀堞而登城遂陷  
鼎罵賊不屈死之追封太原郡侯立忠臣祠於太平命  
有司歲時致祭 嘉靖惟揚志

顧師勝字惟賢興化人洪武十二年由辟薦知四川眉

縣事川賊天龍保作亂謀襲城師勝率兵禦之賊勢猖  
獗師勝親督兵於三橋舖與賊力戰屢敗之因追賊下  
阪馬傷足被刺露腸而死事聞贈奉議大夫眉州知州  
仍陞眉縣為眉州 興化舊志

郭任江都人建文時為戶部侍郎靖難兵至被執不屈

死裔孫永寧以進士官御史

按李氏續藏書謂任丹徒人而萬曆府志載入江都

因之

成諧字和仲興化人少補邑諸生負奇節好佩刀劍嘗  
信數術自詫當立功異域久之總督翁萬達招置幕府  
與河南諸生王邦直皆見倚重嘉靖乙巳秋大同有寇



警諸以鐵裹關鶻鴿峪係諸邊要害勒兵備之敵從隍中突入諧與邦直合戰殲其半敵憤恚合左右部落數萬人環七札圍之矢石俱盡援兵不至與邦直俱戰死事聞贈指揮僉事廕一子世襲百戶立祠於陽和賜額曰奮忠

萬曆府志

張恒江都人世襲揚州衛指揮使恒長身廣額負膽畧善談論能拊士卒累官淮揚叅將致仕嘉靖丙辰倭由通泰犯揚州撫按卽家起之賊薄城而攻恒與千戶羅大爵百戶曾沂率兵禦之賊設伏教場後門以數人挑戰伏發恒與大爵沂皆及於難後賊平以恒非見任官

不以聞萬曆間巡撫白其事始以恒從祀報功祠春秋

與祭

嘉靖惟揚志

王烈泰州人世襲守禦正千戶嘉靖三十三年倭寇通州巡撫鄭曉檄烈往援至黃茅港遇伏與揚州千戶洪岱文昌齡共力戰死之奏聞加贈一級與世襲指揮僉事

泰州舊志

陳輔堯字九室江都人萬曆中舉於鄉令歸善考績以天下第一清官擬授御史旣而改牧膠州有餽山繭者受而懸之公署陞永平府同知甫至任經畧檄赴瀋陽印馬事未竣而遼陷從者諷之急去輔堯曰孰非封疆

臣奚去為引佩刀自刎以死事聞贈按察司僉事諡忠烈建祠於江都西門高邦佐並祀稱雙忠

本傳

高邦佐字以道襄陵人隨父業蹉於揚萬曆二十三年成進士歷官薊州道終養歸天啟初起叅政分守廣寧值熊廷弼王化貞構隙邦佐知事必敗乞歸方報允而化貞棄廣寧走衆謂邦佐可入關邦佐叱曰吾一日未去則一日封疆臣也將安之夜作書訣母策騎謁廷弼請授兵赴難廷弼不納邦佐仰天長歎泣語從者曰松山吾守地當死此汝歸報太夫人遂解印綬自經僕高永亦自經於側事聞贈太僕少卿諡忠節

本傳

高孝鋹字仲達江都人尚書銓之曾孫天啟丁卯舉於鄉初授豐縣教諭陞信陽知州時流賊橫熾楚豫間歲復大歉人相啖孝鋹竭橐糴穀以賑又晝夜備守禦防不測監司王珵恣睢乖戾更置孝鋹所部署命弛備以撫賊孝鋹力爭不得未幾賊舉火登陴城潰孝鋹方率衆巷戰賊已踞州堂矣縛孝鋹逼降罵賊不屈死事聞贈河南布政司叅政廕一子入監崇祀名宦鄉賢

康熙

府志

古道行江都人崇徵辛未武進士慷慨任俠行兵按司馬法以叅將守駱馬湖庚辰寇至道行帥兵禦之戰累

勝後援師不至力竭竟歿於陣

康熙府志

郝景春字自古江都人萬曆壬子舉於鄉署鹽城教諭罷歸起雜職歷知房縣時賊張獻忠等九營就撫鄖陽羅汝才屯房東白貴屯房北黑雲都屯房西景春以賊叵測獨請勦上官不聽一日汝才合三營逼房城景春擊之多斬馘上官數以朝命諭景春景春乃單騎入汝才營與結盟信既而獻忠叛穀城率眾圍房縣景春部署其子鳴鸞及僚吏分門守賊掘人墓取棺戴之首以攻城景春於城上然草并投石擊之賊掘城城上以蕪油灌之賊立雲梯則設鈎鈎其梯斷之又設銃擊斃數

百人凡五晝夜獻忠欲解去降賊指揮張三錫繼一賊上羣賊繼之城遂陷羅汝才以數十騎擁景春去景春待其子鳴鸞至以手畫其頸曰此下不甚痛吾父子決計死耳汝才從容勸景春降景春勃然曰天下豈有降賊知縣乎於是與其子及僕陳宜見獻忠罵益厲獻忠怒牽景春父子并僕陳宜俱殺之贈太僕寺少卿建祠江都以鳴鸞祔

郝太僕家傳

王道隆字萱生江都人天啟甲子舉於鄉除壽州教諭以端亮範士陞濱州知州治訟明允他邑咸質成焉壬午冬寇至濱陷道隆身被數創慷慨不屈死家屬十餘

口俱被難及櫬歸濱之士民哭送數十里外立祠表其忠

江都縣志

楊廷璧字荆璞江都人以明經授舒城教諭賊張獻忠寇邑璧分守西門語縣令曰予職非守土今日之事義不可辭萬一不守張許吾師也鼓勵軍士嚴守三晝夜矢石皆盡城陷被執罵賊遇害子諸生濟之亦殉父死

江都縣志

倪可大字簡白儀真人少有文名以歲貢授霍邱訓導崇徵丁丑流寇東下急縣令黃日芳適考滿預請以城守屬可大可慨然身任賊圍城督民兵千餘逆戰斬

賊數百級賊少却偵知邑無火備以巨炮攻南門城遂陷可大守北門賊趨執之可大嚼指血噴賊面罵不絕口遂被害妻戴氏與女未笄皆自縊僕倪表亦從死舉家死義者十有一人事聞贈國子監學錄霍人爲立廟北門外

儀徵縣志

梁于涘字飲光江都人崇徵癸未進士知萬安縣蒞任甫一月大兵下萬安于涘自投於纆家人救之不死又投江爲邏者所獲囚之南昌獄幅巾布袍談笑賦一詩自經死其詩云但知生富貴誰識死功名到頭成箇是方見古人情時家奴梁善杜忠龔明張聰聰婦徐俱

從死 家傳

鄭爲虹字天玉江都人崇徵癸未進士除浦城令擢御史巡仙霞關駐浦城時鄭芝龍盡撤守關將仙霞嶺二百里間虛無一人 大兵入閩爲虹亟還浦城縱士民出走自守空城爲我兵所執死之年二十有五僕陳龍亦從死 本傳

王道淑字善長其先豐城人四世遷儀真道淑由恩貢生授金華府經歷陞湖廣按察司經歷雖官微職小道淑節義凜然守城陷以身殉焉其子棫瑞從之闔門俱死 儀徵縣志

李信字吾斯興化人以歲貢授和平令 大兵入廣郡縣望風歸附和平邑最小衆憂懼不知所出信意氣自若呼二子泓遠淑遠語之曰死自吾分汝輩乘間速去二子跪泣曰大人死忠兒獨不能死孝乎相率爲守城計邑人懷信恩爭用命城旣陷父子俱被執泓遠縛急而泣淑遠叱之曰吾父子死猶生也何泣爲遂皆遇害 康熙府志

吳明卿字伯亮其先歙人以業鹺家儀真性剛介不屈崇徵癸酉領鄉薦授崇義令縣俗健訟明卿至竟月無差票鞭笞不施日具壺茗坐堂上洞重門聽訟者出入

揚州府志 卷之三十  
就質數語折之半載巡按御史以政簡刑清薦於朝會  
甲申變扼腕數日不食死長子諸生應蛟隨任適往贛  
聞訃亦自經死 儀徵縣志

韓默字文適先世臨汾人家揚州補江都學諸生揚州  
城破時默急歸謂妻蕭氏曰吾讀聖人書當守義死不  
可苟活若自爲計乃易儒巾服襴衫皂絛鞞旣肅遂墜  
井死長子彥超亦墜井死蕭與女皆自縊另有傳越一  
年居人有浚井者出默尸面目如生衣冠整潔惟左手  
損一小指左足脫一鞞而已家人伏尸哭左鼻忽出血  
人皆驚異乃棺殮以葬焉 王巖異香集

饒餘字吉人江都人性至孝父母歿家貧葬祭不能成  
禮每讀書至夜分則哭哭已復讀聞者爲之泣下乙酉  
城破自縊年三十六先餘聞李自成陷京師慷慨激烈  
憤不欲生至是竟死 康熙府志

韓鼎新字煥然江都人以明經授浙江某縣教諭城破  
公服縊堂上死 康熙府志

高孝纘字申伯江都諸生城破書衣衿曰首陽志睢陽  
氣不二其心古今一致入學宮自經先聖座前同時諸  
生王士琇設莊烈帝位泣拜與其弟同縊死邵伯鎮諸  
生張映發投井死汪應坤自縊子銓觸石死諸生劉慶

遠投江死指揮高一麟自刎死諸生金颺衣青衿同妻  
 某氏對縊死越八日面如生諸生王廷珮同弟廷璉廷  
 瑜飲酒從容談笑題壁作大書縊死諸生呂家齊投新  
 橋河死王纘字伯綿績字亞綿績字叔綿兄弟三人並  
 縊死諸生汪自盤同妻蔡氏投井死醫者陳天拔畫士  
 陸愉武生戴之藩義兵張有德市民馮應昌舟子徐某  
 皆自盡其餘無姓氏可考者不勝其數

參史藁郡邑志

**國**

朝董潏字禹門江都恩貢生順治三年隨征福建以功  
 授沙縣知縣時閩疆新定潏善撫字百姓安之四年有  
 山賊羅某與妖僧米逢年共為亂羅賊來寇沙潏屢出

戰屢敗之賊環攻三閱月不退潏守益堅一日賊攻東  
 門潏并力禦東門而逢年誘縣丞黎某開西門納賊潏  
 急令其子亦舒壻張思治率家丁五十三人與賊巷戰  
 並死焉潏被執罵賊甚厲賊怒叢射之仍割其頭去妻  
 葉氏抱一歲孫齎匿民舍以免事聞 贈按察使僉事

孫長廕知縣歷馬湖知府

江都縣志

孫之烈字式武江都人武進士官江西都指揮 國初  
 調征楚寇至鄱陽上蘭力戰俘馘無算以援兵不至死  
 之士人王紳有悼忠歌紀其事

康熙續府志

陳錡字龍臣高郵人武進士初任山海關守備累遷副

總兵時山賊猖獗賊首李來亨結巢溪峒提鎮進兵會  
勦命錡為前鋒錡奮勇擒捕以火焚林箐破其四峒乘  
勝深入伏發從騎皆沒錡轉戰三日手格殺數百人馬  
力不能支乃拔腰劍自刎事聞

賜葬廕一子千總

高郵州志

王相呂字望子泰州人順治丙戌舉於鄉授睢寧教諭  
以文行教士士皆懷之適海弁亂攻睢寧城陷不屈死  
之

賜祭一壇

贈助教祀鄉賢

康熙續府志

劉欽鄰字江屏其先江西新昌人曾祖讓官兩淮運司

後遂占籍儀徵欽鄰康熙辛丑進士康熙戊申授廣西  
富川知縣縣新定欽鄰百計撫綏循聲日著甲寅孫延  
齡叛兵圍富川欽鄰率親丁鄉勇戰却復至有弁士為  
賊內應城遂陷欽鄰巷戰不勝被執罵不屈延齡欲授  
之官欽鄰怒擲其印北向拜闕南向拜母作絕命詩曰  
反覆南疆遠辜恩逆醜狂微臣猶有舌不肯讓睢陽遂  
自縊死事聞 贈卹如例諡忠節

儀徵縣志

孝友

漢董永海陵西溪鎮人少失母獨養父父亡貧不能葬  
乃從人貸錢一萬以身作傭葬畢道遇一婦人求為永



妻永與俱詣錢主令織絹三百匹以償甫一月而畢辭  
永去曰我天上織女也緣君至孝上帝命我織絹償債  
言訖凌空去今丁溪場永與父墓並存西溪鎮有天女

纜絲井

參方輿勝覽諸舊志

按山東省志永西漢千

乘人今青州府博興縣有永墓博興古千乘地  
或又云永徙居湖廣德安父歿黃州賣身以葬德安碑  
碣可攷豈海陵別有董孝子而歲久傳譌遂傳會為永  
耶乃勝覽謂海陵西溪鎮為永故居而孝子祠天女  
寺纜絲井皆以永傳故因舊志存之亦傳疑事也

吳奉廣陵人性至孝廣陵守張載舉為孝廉

明南畿志

晉盛彥字翁子廣陵人少有異才母王氏因疾失明彥  
不應辟召躬自侍養母食必自哺之母既病久婢使數  
見箠撻婢忿恨伺彥暫出取蟻螬炙飼之母食以為美

然疑其異密藏以示彥彥見之抱母慟哭絕而後蘇母  
目豁然復明仕吳至中書侍郎吳平本邑大中正劉頌

舉彥為小中正太康中卒

晉書

高悝廣陵人少孤事母以孝聞年十三值歲饑悝菜蔬  
不厭每致甘肥於母撫幼弟友愛寓居江州刺史華軼  
辟為西曹書佐及軼敗悝藏匿軼子經年會赦乃出元  
帝嘉而宥之以為叅軍遂歷顯位至丹陽尹光祿大夫

封建昌伯

晉書

南宋劉宗武廣陵射陽人魏大武南伐至安宜宗武母  
為亂軍所害宗武蔬食終身人號所居村為孝義鄉

寶

應縣志

五代徐鍇字楚金廣陵人與兄鉉相友睦常共用墨一圭弟馬未歸兄馬不肯茹草兄出亦如之鉉以直諫被逐鍇思念涕泣至失心其母請於李主曰法有兄弟相罪及今願鍇與鉉俱貶以緩其疾李主哀之爲召鉉鉉還而鍇病已昏瞶不識人家人反覆告之猶自記兄背有黑痣子發衣驗之遂抱持噬其痣號哭幾至氣絕鍇嘗著說文解字韻譜十卷說文解字繫傳四十卷

嘉靖

惟揚志

宋沈政泰州人端拱初政父爲屯田院衙官凶暴無賴

使酒毆平人死政中途見父恐懼問其故卽號呼褫衣故毆其屍巡者捕送官獄具政怡然就死聞者悲之

萬

曆府志

朱壽昌字康叔揚州天長人徙居高郵以父巽蔭試將作監主簿歷知閬州鋤姦擿伏郡稱爲神遷知廣德軍壽昌母劉氏巽妾也初巽守京兆母劉氏方娠而出壽昌生數歲始歸父家母子不相聞五十年後壽昌行四方求之飲食罕御酒肉言輒流涕熙寧初與家人辭訣棄官入秦曰不見母吾不反矣行次同州得之劉時年七十餘嫁黨氏有數子悉迎以歸京兆錢明逸以其事

聞詔還就官由是以孝聞天下壽昌以養母求通判河中府數歲母卒居喪幾喪明既葬有白鳥集墓上拊同

母弟妹益篤累官司農少卿遷中散大夫

宋史 蘇軾 賀壽昌刺血

寫經求母五十年得之蜀中詩嗟君七歲知念母憐君壯大心愈苦羨君臨老得相逢喜極無言淚如雨不羨白衣作三公不愛白日昇青天愛君五十着綵服兒曉卻得償當年烹龍為炙玉為酒鶴髮初生千萬壽金馬詔書錦作囊白藤肩輿簾感繡感君離合我酸辛此事今無古或聞長陵竭來見大姊仲孺豈意逢將軍開皇苦桃空記面建中天子終不見西河郡守誰復譏潁谷封人羞自薦

許俞黥縣人從父居海陵為胡瑗所知俞事父以孝謹聞供給甘旨晝夜不怠與妻子共食粗糲供父則盡珍異父病篤澣濯衣服必躬親之曰寄於家人之手吾恐

厭怠也胡瑗為作孝子傳

嘉靖惟揚志

張熹字立道海陵人事母至孝家苦貧自絕葷膳而日營甘肥以奉母赤芝生於門越七年又產舍後竹間前後凡十四本光潤如塗丹朱扣之鏗然有聲乃築三秀堂內閣劉旣濟為之記侍郎蔣粲筠州守毛敦書皆以詩頌其孝感

萬曆府志

錢涪字申伯海陵人家貧竭力以養母飲食極豐腆母病湯藥必嘗而進居喪哀毀骨立悲動鄰里廬墓三年

嘉靖惟揚志

蔣伍寶應人嘉定間母孫氏兩目俱盲伍自剗左目和

粥以進母母目忽明縣上其事郡守直秘閣應純之賜予甚厚詔表所居曰昭孝坊 嘉靖惟揚志

元袁智周字道濟泰州人世為丁溪鹵戶至正間父敬夫為總催劉正二虐辱死智周誓復讐陰佩刀伺間便

凡六年會正二為人所殺乃以刀棄之邗溝州守趙儼

上其事旌之

參梧溪集小傳泰州志 王逢袁孝子佩刀歌鹵豪煑海地沸蒸忽報孝子蒼天崩

披髮誓雲雨若磨百金一片陰壑冰六年泣血絳雲凝悲風淒淒常夜與妖狐戴體鬼物憑含沙時干左右肱陸阻習坎渡阻湖歎歌獨漉氣填膺刀亦汝知龍梭騰神鋒寒芒鐔威稜仰號彼蒼奚嘗斯須間隙不可乘坐令骨立枯屋藤墓廬青冷松明燈矧有母老鬢鬕鬕破涕為笑躬豆登無何讐家死棘荆臭肉厭厭蚋與蠅天其假手俾世懲人生五倫首父子復讐義昭春秋禮見遺刑書著諸史宗元議足垂千祀倒行逆施伍員恥

舞陽吉玃同轍軌老涉遲鈍幼超偉固關時命非偶爾嗟卿被兵家轉徙事往行存宜繕紀醑醢花香鯉搖尾癯然鶴行過客邸欲言復吞鬢颯耳嫫嫫猶嬰慕焉已酒酣問刀首如七忍歸武庫投邗水水收烟消淨霜葦電光霍霍無時起安得河伯以鑄授烈士來丹積寬從一灑 梁寅袁孝子篇袁孝子事死如生欲死海鹽場上淚眼枯哀心無窮海之水誰云猛虎凶誰云長蛇毒咄爾凶毒人何獨無骨肉爾身雖齧斷腸已裂我腹父也銜冤螻蟻鄉兒猶飲食被服裳皇天昭昭運三光如山之罪胡可以掩藏暑卧埃塵寒卧雪霜狡兔躍我前野狐嗥我傍父魂有知兒共處母身未忍兒身亡嗚呼天下幾人寬且苦孝子三年獨廬墓官書大字表門戶更願除却人間蛇與虎

卜勝高郵人奉母至孝泰定間母病為嘗糞又割股作

糜以進母尋愈郡上其事詔旌之 嘉靖惟揚志

張緝字士明其先膠州人父宦惟揚因家江都至正間

緝與兄紳弟經同領山東鄉舉緝授泰州幕職棄之養親居揚州十五年揚州兵亂母姬氏方卧病賊突入卧內舉槍欲刺姬緝以身蔽姬槍中緝脇三日而死

元史

李茂大名人徙家揚州父興壽臨卒語茂曰吾病且死

爾善事母茂泣受命奉母孟氏益謹母嘗病目失明茂

步禱於泰山三年復明又每夕祝天乞損己年益母孟

氏年八十四歿居喪哀慟聞者傷之大德九年揚州火

燒千餘家已及茂廬風返火滅事聞旌之

元史

張毅泰州丁溪場人元季奉父母避兵大同入明為大

同行都司掾以勤幹廉潔著稱性至孝母歿扶櫬南歸

道直沽父又歿負骸骨歸葬服除補浙江都司令史季

叔客死瓜洲仲叔亦貧老毅時感泣求謁告省墓葬季

叔奉金帛以養仲叔時人高其義蘇伯衡為作傳

泰州

舊志

孫質高郵三塏人元末避兵揚城賊張鑑兵入城質度

不得俱免謂其妻曰不幸罹此父母年老我子女俱幼

若使父母殞於兵則抱終天之恨莫若棄子女負親以

逃妻泣而從之遂奉父母奔蘇州後二親以壽終洪武

五年質還高郵會稽楊廉夫為之立傳

高郵舊志

明吳汝寧泰州人洪武初伯兄汝陽以鹽事戍雲南烏

撒衛越六年歸里心憚遠行臨發愀然不忍去汝寧慊  
慨代兄役行至黃陵廟遇風覆舟溺水死焉其七世孫

吳嘉紀記之以詩

康熙府志 嘉紀詩曰我聞洪武皇  
帝二十年中原子弟多戍邊開邊拓

宇歲不歇故鄉那得歸耕田海樹烏棲溪月圓烏撒軍  
人萬里還盡室驚看如夢寐老親喜極轉潸然骨肉欸  
欸重依依不知假期難久延訪舊比鄰方載酒催行里  
正已備羈妻子更牽衣雙親齊撫臂頓足仰面向天哭  
高天曠日為昏晦就中一弟心中煩呼人寘兄起相代  
入門自裹頭出門自束帶軍令不用暫留戀彎弓插箭  
隨前隊驅馬渡吳山山溪日落無人行密林峭壁馬蹄  
側枝上鷓鴣時一聲慷慨征夫顏色苦開眼不見親弟  
兄行行歷楚疆七澤魚龍鄉波濤旬旬氣帶翳回頭數  
望爺與娘危檣欹舵望前去黃陵廟前風大狂風狂舟  
檝覆壯士逢天殤未把吳鉤舒國奮翻成李樹代桃僵  
白骨從此日漂泊閨中延頸復何望君看東海瑩篔引  
悽愴哀音  
千載長

張起海陵人父遭兵亂與母相失起晝夜悲泣行求四

方三十年得母於濟陰成廷珪贈以詩比之朱壽昌焉

泰州舊志

王鳳字朝陽寶應人少孤事母至孝母嘗病頭癰潰爛

不可近鳳朝夕奉湯藥手拭膿穢敷洗必親為之母竟

弗起鳳時年十七哀毀骨立既葬廬墓有盜夜入其廬

見鳳容色哀戚曰毋驚孝子以所盜他物遺之去墓上

忽生松篁數株日就叢茂人以為孝感所致後仕山東

平度州同知嘗輸租銀於京羨餘千兩歸貯公帑當道

考覈有昔聞孝行今著廉聲之語

嘉靖惟揚志

趙岱字謙中興化人父病岱取中衣躬為澣滌母周氏年九十岱日營甘旨以奉之自製樂詞帥子弟歌舞以侑食處兄弟尤友睦恒共被服宗族皆仰以為生

萬曆

府志

周鳳字天瑞儀真人少為諸生後以歲貢主吉安永寧縣簿初父逋客錢被訟逮治追杖垂死鳳誓賣身傭直以救父燕商蘇榮憐之出黃金一斤償客父得釋鳳詣榮傭弗納請質以宅亦弗許竟投券去後榮以他事被誣鳳為力辯獲免榮卒服衰以報人並高其義焉

儀徵

舊志

王沂字本道儀真人正統間有伯父為人所誣謫戍開平天順改元大赦伯未得返沂嘆曰伯不幸受讎吾為猶子顧不能雪之耶乃重趼上疏訟寃竟得釋

康熙府志

徐恩江都西鄉人家貧業農兄弟數人俱析爨恩獨終養膝下父患瘍侍藥餌甚謹日夜吮其患處父死母病痰不飲食者月餘時盛暑恩伏牀下身為蚊嘍無完膚每晨焚香籲天偶一老兵勾其門暑著絮繒肘後懸竹筒貯藥恩為母懇一粒大如粟母服之尋愈人疑老兵者仙也母竟以高壽終有司獎之稱徐孝子

萬曆府志

史得儀真人兄能為指揮坐法當死得念兄乏嗣請於

揚州府志 卷之三十一  
官願以身代爲之荷校者幾十年兄竟出獄生子得喜  
曰不負吾心矣會赦並釋人咸異之

儀徵舊志

楊璽字國玠儀真人事其父出入必告晨夕定省不懈  
寒暑父有所適必迎於道飲於他所雖夜分必俟其歸  
旣歸俟寢而後退比其亡也哀毀逾常事母益篤嘗買  
易於市日必三返視食入厨滌器其誠如此母或不悅  
必長跪自責曰兒婦之罪也母顏解而後起人皆稱曰

楊孝子

嘉靖惟揚志

徐鈇高郵人父濟民早世母劉氏遺腹生鈇母疾篤鈇  
禱天請以身代時暴雨如注而香燼不滅人咸異之母

疾尋愈母出鈇必親與僮僕扶輿及卒鈇廬墓三年

高

郵舊志

魏堯民字欽夫江都人家貧年四十始婚婚時值父病  
未幾父歿就苦塊及葬廬於墓三年旣歸婦猶處子也  
伯兄舜民爲山東驛丞病卒負官錢堯民徒跣二千餘  
里走控當道得寬其逋而貧不能昇喪土人憐之予地  
以葬堯民痛哭識其封而歸嘉靖間里人聞其行於官  
予巾服等諸生復其家

萬曆江都志

栢英江都人延安衛指揮使秉性孝友父卒哀毀幾絕  
廬墓三年感狐兔爲侶有司以聞旌表其閭

姓譜



揚州府志 卷之三十一  
陳璉字廷玉儀真人世業農璉與其兄耕樂友愛甚至  
耕樂無子璉始生子抱與鞠之再歲而殤繼與之復數  
歲而殤如是者三耕樂不可曰吾弟之子猶子也已而  
乃勸卜妾卒無子日夕令子女遠膝以悅其心耕樂晚  
年爲江臯六老會絕意家事璉亦喜曰兄之樂吾之志  
也怡怡終身士人稱之 儀徵舊志

嚴效字應之江都貢生性婉順事父母能色養有所規  
諷雖責逐無悔父母亦悟愛之如初嘉靖初奉詔旌表  
授遼東都司經歷 康熙府志

王雋江都人郡諸生七歲喪父哀毀如成人長奉母極

孝母病九月不解帶侍母榻左二十餘年母壽百歲比  
卒哀毀骨立三年不葷酒有司請爲鄉飲賓辭不赴巡

按御史命旌其門

萬曆府志

顧承學字思敏江都人鎮遠侯承光弟補郡諸生自處  
若寒士與兄承光甚友愛承光奉朝請京師承學每思  
之輒泣下因往省薦補錦衣居半載乞歸承光嘗奉使  
南還躬侍飲食病則煮藥進之其篤於天倫如此 萬曆

府志

孫著寶應人父鸞嗜飲著常置錢酒家令其恣飲父病  
氣壅醫云須百蠍蟆納猪肚中食之可愈時冬月著覓

揚州府志 卷之三十一  
之野中得百蝦蟆里人大異之著曰傷百命以生吾父  
吾不忍也乃盡放之自以股肉納豚肚中父食之尋愈  
知縣李瓚白於當道旌其門 寶應舊志

白所聞字獻廷儀真人世襲衛指揮使事寡母以孝聞  
朝夕必問所嗜寒暑必問所服四十餘年無異一日母  
死盡哀骨立由殯以及祭葬皆中於禮撫季弟所見衣  
必共筭食必同案萬曆初凡三督漕運後以捍城池卹  
軍士有功陞授大河總司上勞績計部卒 儀徵舊志

張仁寶應人自幼寢食未嘗離父母左右既長不娶曰  
恐間吾父母也父母既歿復曰無親可養何娶為遂終

其身不娶亦以兄有子能不絕親後云同時楊科蒯源

胡悌並以孝稱直指行部皆給粟帛旌其門 寶應舊志

魏全興化人事母至孝母畏雷全每他出見天欲雨則  
顛蹶遄歸夜見有電光雖宿於市廛必鑄門而還抱母

卧終身不怠 興化舊志

桑履直字日鄰江都人萬曆間貢生少孤事母篤孝母  
性嚴色微不豫則長跼終日候霽乃起後子捷事履直  
亦竭盡孝養晨興必請親所嗜卽遠道難得務力致之  
友愛兄弟自居敝廬而以新築之舍子弟里人咸以為  
履直有子 江都縣志

蕭維堅江都人生而樸誠性至孝父病痞堅侍湯藥數年未嘗安寢及母病亦竭力焉親逝弟妹俱幼堅撫養成立經營婚嫁之弟婦溫氏早孀撫其遺孤俾得守節及維堅夫婦疾劇子廷瓚後先刲股瓚妻病孫日曠割肝以救一門三代篤孝里中未有也日曠另有傳

江都

縣志

李思謚興化人少師春芳孫少讀書篤於至性居嫡母喪三年不入內刺舌血寫佛經以報遂茹素終身異母弟思讚幼失恃與同卧起飲食必共案撫愛甚篤年二十九卒所著有春秋纂義懿行類編敦好堂一二集諸

書

興化舊志

龔勲字世臣高郵人九歲母疾隆冬思藕勲禱於神求獲之後貢入太學心動馳歸五日而父卒隱居不仕以壽終今祀鄉賢

高郵舊志

王隲江都人性孝友朝夕侍養其親必致所嗜兄早逝撫其遺孤同己子又嘗出已資助人婚喪周人貧乏里中誦其孝義

萬曆府志

陸典高郵人幼有神童名年十五補州學諸生父龍慷慨任俠時有衛弁侵屯田事敗法當戍乃謂龍曰某罪不敢辭所惜祖宗汗馬勞自我斬爲泣下龍憫之卽挺

身代任其罪謫戍遼東毅然不返典時年少抱痛無如  
 何隆慶初遂發憤出塞求親而訃適至悲號躡屩奔喪  
 塞外欲扶櫬歸里而法不得入關乃徒跣京師泣陳於  
 當道薊督王某檄護之歸舉明經授常寧令以忤上官  
 改府教授不之任終於家修郵志十二卷 高郵舊志  
 任材興化人父患背疽勢甚惡醫莫能療幾危材禱神  
 而吮之得膿數升而愈事繼母曲盡孝養鄉人稱之 興  
 化縣志

楊守業江都人事父槐母張氏曲盡孝謹母病藥餌親  
 嘗不解衣卧起者浹旬後病日篤醫不能治業日夜顙

天號泣母一夕忽愈眾以為誠孝所感踰年母歿業擗  
 踊哭絕者數四家人救之甦勺水粒粟不入口越旬而  
 死有司旌其門 萬曆府志

孫諫高郵人父嬰寒疾諫割股食之而愈繼又病疫割  
 右脇出肝寸許飲父父立起創久不愈有神人至門以  
 藥傅患處即無恙里中驚為篤孝所致巡撫李三才給  
 以金令有司以粟帛存問 康熙府志

倪本燹儀真人崇徵丁丑父可大為霍邱訓導城破罵  
 賊死母戴氏方雉經賊將取其手釧以刀斫指指盡落  
 本燹先已匿免聞之痛呼奮出以身翼蔽母身中三十

揚州府志 卷之三十一  
餘創僵仆衆屍中賊去復甦刀瘢如縷

儀徵縣志

國朝陳嘉謨字我師興化諸生七歲失母嘔血成疾事繼母以恭謹聞順治初嚴禁私鹽猾吏構鹽徒爲黨妄株大姓破其家嘉謨父弘道張酒肆城東羣盜入飲指畫授計數側目之未幾事敗詞連弘道嘉謨赴縣自明因窮詰其黨與賊大恨遂誣弘道造舫船通海與其弟弘猷俱繫府獄賊黨日夜謀殺之胥吏索賂累百金嘉謨欲一見父不許詣賊所請以身代賊交口唾詈毆之見血獄且成嘉謨痛哭於城隍之神乃作血書置袖中出廟去是夜其僕獨卧邸舍三更聞哭聲且叩門甚急起

視無所見大怪之及明當事有傳家書至署者啟封則嘉謨所作血書也曰父死子亦死徒死耳無益死於今猶可明父冤誠得鋤奸暴安善良嘉謨死不恨當事大驚令求尸不得越七日髮上指屹立城外官河中脫其父叔於獄收葬嘉謨而盡殺賊黨

康熙府志

方立禮字武城本歙人遷江都父伊側室魏氏子也八歲魏卒繼母汪氏有二子曰立化立乾愛之惡立禮汪性嚴酷每怒輒與大杖立禮受杖惟謹一日提甃傷立禮幾絕及蘇無變容年十八父卒汪益逞逐立禮立禮時時候門外問母起居欲入不敢低首淚暗下汪疾則

揚州府志 卷之三十一  
憂懼不食日夜奔走戶外少安乃已妻洪氏孝謹如立  
禮日受鞭撻無違色不使立禮知歲乙酉汪及立乾俱  
死立禮哀毀骨立立化亦早歿子女婚嫁喪葬立禮皆  
已任焉明崇徵間用宦者王坤督饘立禮伏闕上書言  
不便狀爲通政所格雍正六年題 准建坊旌表 參雷  
士俊王巖傳狀

金玉節江都廩生乙酉 大兵下揚州時親歿未及葬  
玉節穴室中地瘞之封未完城陷一卒至疑所瘞者金  
也將斫棺玉節匍匐伏棺大呼以身翼之復跪守土穴  
八晝夜得免子奇選彥選皆諸生亦孝友父子俱祀鄉

賢 江都縣志

郝明龍字雲蒸江都諸生明末父景春殉難房縣明龍  
號慟走戎壘中扶喪歸葬又北走上其事得卹典及廕  
乃念父死事之慘麤衣蔬食絕意仕進至九十四歲終  
孫旭光拔貢生 江都縣志

蔣垣字次斗江都瓜洲人歲貢生順治二年 大兵至  
瓜洲人皆避去垣方十一歲父母俱卧病屬族人攜垣  
去垣呱呱親側日侍湯藥不忍離兵見而憐之全其家  
旣長讀書敦行以儒學擅名一時遊其門者多致通顯  
子承慶歲貢生 江都縣志

張汝化儀徵人母徐氏卧病不起汝化延醫不效欲取  
肝啖母乃懷利刃跪神前自刺其胸血流仆地幾絕鄰  
人奔救急以麻縛之移時始甦母聞驚汗疾遂解若有  
默相之者母子皆全里人異之

康熙府志

金志堅字貞吾高郵人七歲事母盡孝道每食必具甘  
旨親上食飽乃退晨昏造榻前問安否或自外歸至  
漏下數十刻必伺於寢門之外親歿後每逢祭日終夕  
慘然執爵灌奠伏地嗚嗚不能起教人嚴而有法博極  
羣書所纂錄甚多咸有凡例可觀子相玉庚戌進士

高

郵州志

蕭日曠江都人幼有至性母朱病篤日曠炷香告天自  
剖其肝始剖之不得再剖之乃得肝二片而脇下洞開  
露見五內天將曙日曠危坐燈下血滿衣裾手持其肝  
令婦俞氏和藥以進母猶戒婦勿洩母服之瘳日曠創  
甚殞焉年二十六時康熙七年六月四日也里人感其  
孝立祠梅花嶺祀之

江都縣志

人子剖股割肝抉目

以療親疾是以親遺體行殆非孝

之經也顧如蔣伍卜勝孫諫張汝化蕭日曠之行孝雖

愚而情可憫亦何忍概沒之爰因舊志所傳錄而存焉

其餘則各書名於後以

警世之熱視其親者

張中達字九達江都歲貢生幼孤事母最孝先意承志  
纖細必周母好潔每日爲母滌拭踰器生二子後卽不

復入室冬夜曲卧母足後母或遣之泣曰母氣衰非兒  
 不暖母病篤嘗糞以希其愈子庸德戊午副榜亦以孝  
 友稱嘗哭父病日哭母日加昏再哭弟遂失明著有四  
 書尊註會解行世

江都縣志

張京字羅萬興化人七歲即知孝養願減已算以益親  
 年父母歿畢世哀慕久而不忘撫育弟妹皆能成立遇  
 親族周貧濟困不遺餘力屢奉檄旌表其門

興化縣志

李元健江都人少有聲諸生間尤篤於孝友母年八十  
 病雖矢遺必躬自浣濯孺慕之色終身不改與兄弟備  
 極友愛鄉人咸重之

康熙府志

趙蔭雄江都人生稟至性母薛氏抱沉疴蔭雄年十八  
 見醫藥罔効遂齋沐絕粒長跽泣禱於天願減已算以

延母年母病方愈蔭雄尋得疾不起里人哀之

江都縣志

張廷樞字天木高郵諸生少失怙孝事孀母以賣字錢  
 供母甘旨嘗遊學虞山心忽怛怛動聞武安王廟中籤  
 著靈往祈之道者詳解曰當速歸能三日抵家母子始  
 獲面時暑雨滄沒道塗舟行風又逆廷樞徒步行泥淖  
 中日百二十里如期而歸母果病頸疽膿不得出廷樞  
 以口吮之乃獲痊所著有寄庵詩集孫夢鯉郡廩生曾

編州志 高郵州志



宋飛雄高郵人少讀書事親至孝父逝停柩未葬母病  
卧牀十年飛雄朝夕奉事惟謹忽雪夜聞母房火起卽  
赤身奔抱母出母幸未沾火而飛雄皮膚已焦灼矣又  
見火逼父柩卽身赴雪中滾濕長號躍入火中赤手撲  
救火雖稍滅而飛雄遍身糜爛死時肌膚脫落猶呼曰  
吾父母無恙吾何恨乎其勇於死孝如此知州張德盛  
旌其門

高郵州志

王賓字仔園江都人能文善書法康熙癸卯舉於鄉歲  
壬戌赴禮部試試竣聞父訃血淚迸下客往弔不能發  
一語惟兩手據地目直視髭髮竦豎晝夜哀號水漿不

入口者五日而卒

江都縣志

程願學字負若儀徵人祖死於法父徙寧古塔願學以  
幼免成童以後思其親日夜泣爲諸生不交一人有延  
爲師者往教焉自食於家雖杯茗無所啜屏除酒肉并  
不啖菜果每食亦未嘗飽粗糲免飢而已冬月則忍寒  
不衣綿纊終身以喪禮自處年六十而卒臨終戒其子  
勿與妻合葬以不知其父骸骨所在也里人稱之曰苦  
行先生私謚曰貞孝

儀徵縣志

俞士瑄字宣玉甘泉人天長籍歲貢生年十二侍母病  
口承其唾母歿哀毀骨立及長父病籲天請代瀕危獲

痊後父歿泣血三年身不入內口不茹葷寢苦枕塊皆按禮而實踐之奉生母色養逾至生母歿喪葬盡禮一如其父與母焉生平孝敬誠篤里人信服之康熙四十四年題 准建坊旌表 江都縣志

李棟字吉士興化人住高郵明少師春芳五世孫天性孝友八歲失怙弱冠與弟棫先後補諸生橫經講授者三十年所得館俸悉奉母區給織毫不入妻子手且稟母曰弟子女多用宜倍勿與兒均康熙壬午中順天鄉試座主房考皆稱其文行卓絕今之曾閔為延譽公卿間名重一時無何卒於京邸當路賢士大夫哭泣相弔

歛賻以歸其喪棟著述甚富工書畫子炳且中乙未進士 高郵州志

成原正寶應人年十七母張氏得羸疾原正五割股肉以救朝夕坐卧母榻下母食斯食母寢斯寢湯藥必嘗而後進及母疾篤勺飲不能入原正以口度米湯逾十晝夜母歿原正哀毀骨立蔬食水飲號泣哀思歷三年如一日因致疾身亡鄉里惜之 寶應志稿

黃展字慕渠泰州人性孝友家貧歲儉母臧氏元夕浙米掄屑為粉團展見之曰年饑可省也母因止踰年母歿展遂終身不食糞見之輒流涕輟餐竟日待子姪慈

揚州府志 卷之三十  
愛如所生每秋成糶穀得金或就手攫之桁上衣無常  
主徑取服去展皆不問也常云人惟循理安命事親課  
于外少有他營便屬分外非士君子素位之學矣 康熙  
續府志

高成琦字軼韓江都諸生父以罪流三原母抱病不能  
起成琦每歲徒步三千里省父歸又負米養母一日父  
潛歸江都復還流所成琦侍行途中無貲驢費輒負父  
以行足裂流血及歸未久父歿成琦晝夜哀號乃抱父  
木主投義濟橋下死 江都縣志

陳乞見高郵黃蕩橋乞者每乞食先以供母得米飯必

以進已不敢嘗預為母乞棺木人皆感而厚施之母死  
每日必乞以祭於墓 高郵州志

孝行附錄 依萬曆府志所載參以康熙府志及各州縣志增錄之

明蘇應芳 諸生 胡易 崔一鳳 儒士 華時叙 諸生

李承廕 指揮 趙聚奎 諸生 王自強 胡澆

李相 汪有誥 華時中 蘇眉鍾

朱蕙 陳世雍 崔上言 宋朝臣

宋朝卿 俱江都人 萬應徵 李恂 徐文明

葉明 沙稷 孔貞選 侯新

陳嘉試 李鵠 李毓 柳璫

經世緯 詹鍾吉 殷王友 殷湯達

金湯 江應全光祿署丞 趙文炳 汪道宏

周文顯俱儀徵人 張効先 華梓 馮守業

吳宗祐俱高郵人 朱永壽 潘夢龍 王與立

禹萬節 任性 袁晟 沈永

李宗甫 趙忻 陸權 楊縉

徐霖 陳思敏 解謙 魏應周俱興化人

萬中英 李廕 錢誼 孔學文

繆好直 劉光宁 宮景隆俱泰州人

國朝車鳴和 方陳章 車映昌 仲儀

汪恕 汪源澍 蕭維基 倪成三

史大生 吳兆麋俱江甘人 程桂生 董世榮

路之鼎 任三俊 陳爰 宮於庭

詹宗祥 錢尚志 湯名揚 經一儒

陳國柱 戴士誠 劉繼漢 張翀俱儀徵人

胡倣 楊三策諸生 陳文憲貢生 劉延禧

侯建 車象歲貢 林紹榮 宋長春諸生

宋學龍俱高郵人 李國楷 王紹卿 徐際明

徐熿 李灃俱興化人 范峒 吉琳俱寶應人

割股附錄 皆嘉靖萬曆康熙府志及各州縣志所載

宋吳汝明儀徵人

明王輅

趙宗普

趙天澤

林中馨

林中喬俱江都人

詹大全

徐光裕

王維亮

王國輔

江九萬俱儀徵人

費廙

張佛

王維慶

姚輔

高之榮

孔應試俱高郵人

周溢泰州人

國朝高

策武進士

閻士彥

周之藩

黃士誠

李之瑀

黃琮

汪三才

管士俊

朱呈祉

吳士俊

金天錫

胡宗安

余鏞

梁崇

甯宗越

史行義

程國柱

蘇汝爵

蘇汝祿

蘇汝顯

吳遂八歲

陳道諸生

郝玉三九歲

史璜

藍鍾華

金維良十二歲

江晉十三歲

王詢俱江甘人

李應婁

吳廣杰

張兆璉

劉駿烈

王定全

王鏞

殷趙

王尚宗

王家珍

吳欽國學生

卞玉振俱儀徵人

劉夢舉

徐應熊

邱雯

葉令

王士芳俱高郵人

朱有恒

朱自明

解良弼

顧有義

石璋

徐士貴

劉允祚

王元曾

王嘉爵俱興化人

袁懋良

楊江

王日相

蔣承龍

朱雲龍

陳秉憲

楊日藻

高 琰

吳應裕

沈大江

徐九章

俱泰州人

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

朱自明

揚州府志卷之三十

終

朱自明

朱自明

